


WANTOK

Wan Wik, Jun 23 - 29, 2005 NAMBA 1614


Niuspepa bilong yumi ol PNG stret! K1.00 long Mosbi tasol - Ausait Mosbi K1.30



GLASIM MUSIK WANTAIM JK i stori long tupela brata husat i bin lus long solwara bihain long ol i rekodim namba wan musik albam bilong ol. Nau musik albam bilong dispela tupela brata TWINHOX i wok long kukim PNG musik i stap. Ritim stori bilong tupela long PES 21.



Kofin wokabaut long Hagen-
Pes 3



Pinat i gat hevi
- Pes 3



Ol rot long bus ples i bagarap- Pes 19



NRL NIUS
Pes 29



Prinses Anne bai kam

NAMBA wan na wanpela pikinini meri tasol bilong Kwin Elizabeth 2, He Royal Haines Prinses Anne bai makim Kwin Elizabeth 2 long amamasim namba 30 krismas bilong PNG indipendens long mun Septemba.

Praim Minista Sir Michael Somare i bin tokaut long dispela aste.

"Mi kisim pinis wanpela pas i kam long Sir Robin Janvrin, Praivet Sekretri bilong Kwin, husat i toksave olsem Prinses Royai bai stap long Pot Mosbi long namba 28 inap long namba 29 de bilong mun Septemba.

"Gavman bilong Papua Niugini i amamas tru long dispela toksave olsem wanpela long ol Royal Famili bai i ken kam na amamas wantaim mipela," Sir Michael i tok.

Em i tok tu olsem Komiti i lukautim raun bilong Royal Prinses bai sanap klostu taim bilong stretim program bilong em pastaim long ol i salim i go long kisim tok orait bilong PNG gavman na Prinses Royal yet.



Allan bilong Sami amamas nau!

LONG pinisim amamas long kirap bilong nupela Otonomes Gavman, liklik Hortense wantaim ol lain bilong em i bin go aut long piknik long White Ailan namel long Taiof Ailan na Tsiroge long Buka Basis. Piksa bilong Wantok i soim Hortense na mama bilong em i no isi long bungim na wasim ol gram sel na ol narapela gam bilong solwara ol bin kisim long rip. Liklik Hortense i gat 4-pela krismas, tasol em i hap liklik meri bilong pul long kanu tu ya.

Brian Bell & Co. Limited
Shop with a friend

BB June

SPORTING GOODS, GLASSWARE,
CUTLERY, GIFTWARE, AUDIO VISUAL,
SMALL APPLIANCES, MAJOR APPLIANCES,
TOYS AND MUCH MORE!

HUNDREDS OF LINES REDUCED!

CLEARANCES SALE

Port Moresby 325 5411 Lae 472 3200 Toptown 479 1918 Madang 852 1899 Goroka 732 1622 Mt Hagen 542 1999 Kokopo 982 9027

Lus tingting long ECP, Wenge tokim gavman

Andrew Molen i raitim

GAVANA bilong Morobe provins Luther Wenge i mekim strong-pela singaut long Minista bilong Foren Afeas Sir Rabbie Namaliu long em i mas lus tingting long dispela ECP progem namel long PNG na Australia.

Mista Wenge husat i bin winim kot egensim dispela progem we kot i painim olsem ol polis bilong Australia i rong long i kam stap na wok insait long PNG wantaim imuniti o banis long mekimsave aninit long lo bilong kantri.

Em i tok olsem taim em i winim dispela kot, i gat toktok i kamap olsem ol bai i go bek na toktok moa long dispela

na traim long lukim sapos ol i na pasim tok long kam bek gen.

"Nau mi laik senisim dispela tok. Mi laikim bai gavman i lus tingting olgeta long ECP na husat ol narapela i stap long ol arapela dipatmen tu i mas raus na i go bek," Mista Wenge i tok.

"Sapos ol i toktok yet long dispela orait, 'immunity' i mas noken stap insait long ol toktok bilong ol."

Em i tok Australia bai i no i nap senisim tingting bilong ol long kisim imuniti bilong ol polis bilong ol.

"Long dispela as olsem na mi laikim bai Rabbie Namaliu na Bire Kimisopa husat tupela i wok long toktok wantaim ol i stap i mas lus



• Wenge: Lus tingting long ECP. Foto: Andrew Molen

tingting long ECP na painim ol narapela rot long helpim kantri," Gavana Wenge i tok.

Mista Wenge i tok em i stap wantaim gavman long tingting bilong en long stretim hevi bilong lo na oda tasol ol i mas

na kam bek long PNG bai olgeta i go long kalabus bilong wanem ol i brukim tok bilong kot o contempt," Mista Wenge husat i wanpela asisten jas bipo i tok.

Em i tok i no i nap wanpela kantri i tok orait long ol lain bilong narapela kantri i go insait long ples bilong ol na lo bilong dispela kantri bai i no inap holim ol.

na kam bek long PNG bai olgeta i go long kalabus bilong wanem ol i brukim tok bilong kot o contempt," Mista Wenge husat i wanpela asisten jas bipo i tok.

Em i tok i no i nap wanpela kantri i tok orait long ol lain bilong narapela kantri i go insait long ples bilong ol na lo bilong dispela kantri bai i no inap holim ol.

"Dispela em nogat stret na Sir Rabbie i noken tok em i no save long dispela lo bilong wanem em i klas met bilong mi long lo skul.

"Lus tingting nau long ECP na painim ol narapela rot long helpim kantri," Mista Wenge i tok.

Sandaun LLG i no wok gut

GAVANA bilong Sandaun provins Carlos Yuni i askim sapos Minista bilong Inta Gavman Rilesens Sir Peter Barter i gat rot long mekim eksen long ol presiden bilong ol lokal level gavman long Sandaun provins.

Mista Yuni i tok ol presiden i no save holim bung bilong wanwan lokal level gavman kaunsil bilong ol na i nogat wanpela wok ol i mekim inap nau.

Olsem na minista bai mekim wanem eksen long dispela taim ol i wok long sindaun nating na kisim nating mani long potnait.

Em i tok i gat rot long ol i ken kamapim vot i nogat bilip long ol dispela kaunsil presiden o nogat na husat i gat pawa long rausim ol LLG presiden long holim sia bilong ol sapos ol i no mekim wok bilong ol gut.

Sir Peter Barter i tok em i save long dispela hevi bilong ol LLG presiden long Sandaun provins long 18 mun olgeta nau na em i gat pawa long mekim eksen long ol dispela presiden.

Tasol em i askim provinsal gavman long skelim gut na stretim gut edministresen wok bilong ol we i lukautim wok bilong ol LLG insait long provins.

Tasol sapos ol kaunsil eksekutiv i no mekim gut wok bilong ol orait bai eksen i kamap long mekimsave long ol.

Tasol em i tok pawa bilong rausim ol presiden o sapsen em i nogat dispela pawa tasol i gat rot ol i ken mekim em long lusim presiden i go sindaun ausait long opis long sampela taim pastaim inap ol i stretim hevi na singautim em i kam bek long opis.

Dispela em long sotpela taim tasol.

Spesel sapot mani i no stap long baset

NESENEL Eksekutiv Kaunsil (NEC) i bin kamapim wanpela wanbel pinis wantaim olgeta memba bilong palamen long givim wanpela kain helpim ol i kolim Spesel Distrik Sapot Grant (SDSG).

Olsem na long palamen long dispela wik memba bilong Muf Baiya, Kuri Kingal i askim minista bilong Rurel Dvelopment Arthur Somare sapos dispela mani istap redi long ol memba iken kisim long mekim ol wok long elektoret bilong ol wanwan.

Mista Kingal i askim long wanem taim bai dispela program i go het bikos ol i redim mani bilong ol pinis long putim i go wantaim dispela helpim bilong nesenel gavman long go wantaim na kamapim projek bilong ol.

NEC i bin pasim olsem bai Nesenel Gavman i mas putim mani mak olsem 80 pesen (%) na ol memba yet i mas kamapim 20% long kamapim projek o wok bilong ol aninit long dispela program ol i kolim Spesel Distrik Sapot Grant (SDSG).

Tasol Minista Somare i tok dispela mani i no stap redi yet na tu i no stap insait long baset bilong dispela yia. Em i tok i tru NEC i pasim dispela tok tasol em i no strongim insait long baset. Olsem na em i no klia bai dispela program i go het o nogat.

Em i tok samting i stap nau wantaim NEC long skelim sapos em bai go het yet long dispela spesel program o nogat.

Dispela progem i mekim na planti memba i redim pinis hap mani bilong ol na makim nem bilong projek pinis tasol ol i wetim yet nesenel gavman long givim hap 80% bilong ol i kam.

Yawari askim long K1.5 milien distrik mani

Distrik mani bilong wanwan memba i mas go antap long K1.5 milien olsem bipo we olpela gavman i save givim long olgeta memba bilong palamen. Dispela em toktok bilong Gavana bilong Sauten Hailans provins Hami Yawari.

Em i tok dispela i no gutpela tru taim dispela gavman i senisim na givim tasol K500,000 long ol memba.

Olsem na em i askim gavman long lukluk sapos i gat sampela rot bilong kisim mani i kam long en., orait ol i mas apim dispela distrik mani ig o antap nau long wanwan memba nau.

Tasol Minista bilong Nesenel Plening Arthur Somare i tok dispela i no isi bikos mani i no stap long baset tasol em wanpela bikpela samting olgeta memba bilong kabinet i mas sindaun na lukluk long en. Bikos em yet i no inap mekim wanpela disisen long dispela.

Tasol i gat arapela progem we gavman i kamapim olsem DRIP na distrik sapot grent we gavman i bin givim helpim na sapot long ol memba wantaim ol wok na projek bilong ol long iektoret bilong ol.

Mak olsem K200,000 em ol memba i wok long kisim nau aninit long DRIP program long ol rot na bris projek long distrik na arapela developmen projek em gavman i wok long mekim mani i redi aninit long ol distrik sapot grent. Tasol bai gavman i ken lukluk gut long dispela.

A COLLEGE TO CHANGE YOUR WORLD IN 2005 YOUR accredited international awards

Invest in accredited qualifications and skills to gain a successful career. Everything you need for study success is provided; Training Materials, Guide, Exams, Revision Tests, Exam, Award.

Diplomas (£150/US\$300/AUS\$360)

- Accounts, Hotels, Tourism, Computers
- Business, Management, English, Stores
- Personnel, Office, Purchasing, Advertising
- Marketing, Insurance, Secretary, Office

Advanced Diplomas, BBA, BCom, MBA

- Business, Marketing, Finance, Organization

For a FREE Prospectus/brochure contact: CAMBRIDGE INTERNATIONAL COLLEGE P.O. Box 1378, Southampton, SO17 3WX, Britain

Web: www.cambridgecollege.co.uk
email: info@cambridgetraining.com
Fax: +44 2380 337200

Accredited British Training & Education registered with the National Training Council & Ministry of Labour of Papua New Guinea

TORO

TORO SALIM DEDIKESEN IGO LONG TUPELA DOK MERI BILONG EM, SENDI NA BAFI...

KASTI, MI LAIK SALIM DEDIKESEN IGO LONG TUPELA LAVLY GELS BILONG MI!

KASTI LONG YUMIFM TOK ORAIT NA TORO SALIM DEDIKESEN IGO LONG TUPELA...

...MI LAIK SALIM DEDIKESEN IGO LONG TUPELA YANG GELS HUSAT I STAP LONG HAUS BILONG MI... MASKI PATI TUMAS... INAP LONG PAINIM DISKO TUMAS... DISPELA FRAIDE BAI YUPELA I STAP LONG HAUS TASOL...

OL PORO BILONG TORO HARIM DEDIKESEN NA LONG FRAIDE OL I LAIK ESKIUS LONG TORO NA KARIM TUPELA IGO LONG DENS BILONG OL...

TORO! MIPELA KARIM KATEN BILONG YU I KAM... ER... MIPELA LAIK KISIM OL GELS NA GO LONG DENS BILONG MIPELA...

NAU TORO WISEL NA SINGAUTIM TUPELA DOK MERI I KAM...

DOK MERI? !?!

EM NAU! TUPELA FEIVARET GELS, BAFI NA SENDI!

EMI ORAIT!

Kofin wokabaut long Hagen siti



Aloysius Aisi i raitim

PLANTI tausen marmeri i bin karim 5-pela kofin bokis na wokabaut raunim Maunten Hagen siti long bik moning Sarere las wik long soim Westen Hailans Provin-sel Gavman na nesenel gavman olsem ol i abrus long stretim hevi i bin kamap long ples Kimil. Dispela bikpela wokabaut we i bin pasim rot insait long Hagen i no bin i gat planti pipel bilong Enga, tasol i bin lukim planti Simbu na Sauten Hailans manmeri i wokabaut na soim bel hevi bilong ol. Ol manmeri i bin brum i kam long Hagen na ol manmeri i laik kam insait long siti i wet sampela aua pastaim long rot i klia gen.

Taim ol i wokabaut, ol i singaut "Mipela i krai long Westen Hailans Gavman - ol i no harim krai bilong mipela, mipela i krai long nesenel gavman - ol tu i no harim krai bilong mipela."

"Mipela i bin askim Westen Hailans gavman - ol i no harim singaut bilong mipela - mipela i askim long helpim bilong nesenel gavman - ol tu i no harim singaut bilong mipela."

Dispela protes mas i bin pinis long Queen Elizabeth Pak we wanpela lotu sevis i kamap we Pas-to Emmanuel Lopain yet i bin prea long ol famili bilong ol lain pipel i lusim laip bilong ol long Kimil.

Wanpela lain tasol i bin kam helpim ol Enga pipel em Simbu provinsel gavman, we Gavana bilong Simbu Peter Launa i soim ol pipel bilong Enga olsem ol pipel bilong Simbu i tingim ol famili na lain

turangu long dispela taim. Ol i givim 13 kofin bokis na helpim long karim ol long kar.

Long dispela 13 kofin bokis, 8-pela i go pinis long Enga provins long ol wan wan liklik ples bilong ol na 5-pela ol i karim raun long Hagen pastaim long ol i go planim ol long Hagen ples matmat.

Ol Enga, Sauten Hailans na Simbu pipel i wokabaut i bin autim bel hevi bilong ol long ol famili bilong ol lain i bin lusim laip bilong ol. Ol i tok dispela kain indai bilong ol i wankain olsem ol i laik rausim olgeta pipel.

Ol i tok ol Enga, Simbu na Sauten Hailans husat i kam long wok long ol kopi na ti plantesen long Westen Hailans i givim bikpela hat wok long provins na sampela kopi bosman i mekim bikpela mani long hatwok bilong ol na nau ol i salim kofin bokis bilong ol i go nating na nogat luksave.

Ol Enga, Sauten Hailans na Simbu pipel i wokabaut i bin autim bel hevi bilong ol long ol famili bilong ol lain i bin lusim laip bilong ol.

Singaut bilong kompensesen i no stret yet na Enga Kimil Kraisis komiti bai stretim taim ol i bung gen.

Siaman bilong Enga-Kimil Kraisis Komiti, Paul Watai i tok 13 pik na K70, 000 kes mani i go pinis long ol Enga pipel olsem bel kol mani i kam long ol Kimil pipel bilong Westen Hailans provins long ai bilong Philip Kapal, bipo Primia bilong Westen Hailans na sinia polis inspekta Michael Kapal long Banz las wik.



• Dispela poto bilong Aloysius Aisi hia i soim ol manmeri bilong Enga, Sauten Hailans na Simbu i karim kofin na raun long Mt Hagen siti long soim bel hevi ol i gat long ol lida.



• Ol kofin i lain ap long ol manmeri i lukim



• Ol i planim ol kofin long bikpela Mt Hagen matmat

WANTOK i amamas long lukim ol yangpela pikinini bilong tete i stap insait long ol kain kain spot pilai.

Insait long Mosbi siti yet, olgeta wiken bai yu ken lukim ol yangpela i pilai, soka, kriket, netbol, osi ruls, ragbi lig na hoki. I gat ol arapela spot i stap, tasol mipela i skin kirap long lukim ol long wanem long bihain taim, ol dispela yangpela bai i namba wan long ol dispela pilai na PNG bai i gat nem long spots.

I GAT planti ol manmeri husat i save mekim gutpela wok long lukautim graun, bus na wara bilong yumi hia long kantri. Planti taim ol dispela lain i no save kisim luksave long hat wok bilong ol. Dispela em ol lain NGO husat i save skulim ol as ples lain long ol hevi na gutpela kaikai bilong bus, solwara na graun bilong yumi. Sapos yumi olgeta i senisim tingting na luksave long hevi mipela i save givim ol dispela samting, bai ol tumbuna bilong yumi long bihain taim bai sindaun gut.

YUPELA i save laikim ol pani stori bilong Papa Kanage tu? Sapos yu gat wanpela poroman i save mekim ol kain kain kranki na pani samting wankain olsem Papa Kanage, salim stori bilong em i kam na mipela bai putim long Kanage stori pes. Sapos em i pani nogut tru, bai yu lukim piksa bilong stori tu bai kamap.

LEWA bilong wanpela brata i bin bruk nogut tru taim tim bilong em i bin lus long Stet ov Ori-jin las wik. Em i sore na go long haus na i nogat wanpela wan tim bilong em i stap long haus. Long 3 kilok moning ol lain famili i painim em na em i no stap. Ol i lukluk long hapsait haus na em i sindaun daunim sore bilong em wantaim sotpela braunpela meri ya. Noken wara brata, namba tri gem i stap yet. Em bai kamap long as ples tru tru. Na bai yu stopim?

TIPNG laikim wok painimaut

TRANSPARENSI Intanesenel PNG i laikim bai i mas i gat wanpela wok painimaut i go long ol sut toktok olsem Minista bilong Haus Atimeng Buhupe i wok long strong long Nesenel Hausing Koporesen (NHC) long givim haus long ol memba bilong palamen na ol wanlain bilong ol.

"Nesenel Hausing Koporesen i gat rot bilong bihainim long makim haus na graun, na ol dispela rot i mas wankain bilong olgeta Papua Niugini manmeri. I noken i gat narapela rot bilong ol politisen na wok manmeri bilong

ol," Siaman bilong Trans-parensi Intanesenel Mike Manning i tok. Mista Manning i mekim dispela tok-tok bihain long ripot i kamap olsem ol politisen i wok long strong long NHC i mas makim haus i go long wan wan politisen, ol wok manmeri bilong ol na ol poroman bilong ol.

Dispela sut toktok i tok Mista Buhupe i bin salim ol nem i go long NHC menesmen long kisim haus. Mista Buhupe yet i tok ol dispela ripot i no tru na i kam long ol bipo wok manmeri bilong NHC.

Pinat i ken kamapim hevi: NARI

NESENEL Agrikaisa Risets Institut (NARI) i tok klia pinis olsem sapos yu no lukaufim gut pinat bihain long yu rausim long graun em i ken kamapim ol sampela binatang o marasin we i ken bagarapim bodi bilong husat manmeri i kaikaim.

NARI i wok long glasim dispela marasin ol i kolim aflatoxin we i save kamap

insait long ol pinat taim ol i no draigut o taim wara i go long ol bihain long yu rausim long graun.

Ol i givim tok lukaut olsem sapos ol manmeri no kaikai pinat kwiktaim bihain long ol i kamaut long graun, o ol i no drain ol i ken bagarap na kamapim dispela aflatoxin. Ol pinat we sel bilong em i bruk i ken kamapim

dispela hevi tu na ol manmeri i noken kaikai.

Dispela binatang o marasin we i save kamapim dispela hevi insait long pinat i stap long olgeta hap long wol na i stap insait long kain kain graun.

NARI i tok oli painimaut tu olsem maski yu kukim pinat, em bai no inap long rausim dispela hevi.

Sapos yu lukim skin bilong pinat i stat long kamap grin o wait, em nau em i bagarap pinis na yu mas tromoi.


NARI i tok taim ol manmeri i baim pinat, ol i mas sekim ol gut pastaim. Sapos skin bilong pinat i bruk em i ken karim dispela hevi. Sapos yu no drain gut pinat, em i ken kamapim dispela hevi.

Ol kantri olsem Australia na Amerika i ken karim dispela hevi moa long ol arapela kantri long wanem ples bilong ol i save painim bikpela ples kol.

NARI i wok long glasim dispela hevi bilong pinat stat long 1997 yet aninit long ol kain kain eid projek. Long dispela wok glasim, NARI nau i kisim



• Antap: Gutpela pinat



• Daunbilo: Pinat i gat sik

Namba wan Bogenvil Palamen bung

Veronica Hatutasi i raitim

LONG namba wan bung bilong Otonomes Bogenvil Gavman (ABG), ol bin tok oraitim 4-pela Bil o Lo.

40 ilektet memba bilong OBG Asembli i bin sindaun long nupela Haus Palamen Long Buka Yunivesiti Senta long Hahela na paitim toktok i go na i kam long ol samting we ol i lukim olsem ol i mas stretim pastaim bipo long ol i ken skruim ol wok bilong ol insait long dispela nupela Otonomes Gavman we i bin kirapim wok bilong em long las wik Trinde Jun 15.

Planti long ol memba em ol yangpela man husat i kam insait long namba wan taim olsem ol lida i makim ol pipel bilong ol insait long ol konstituensi. Taim sampela long ol i bin toktok long dispela namba wan bung bilong Asembli long Mande Jun 20, sampela i bin sindaun isi na harim ol toktok we i soim olsem ol i wok long lukluk long glasim na skelim na lainim ol samting long redim ol yet long neks bung we bai kamap long Julai 26.

Tripela long ol Lo we dispela namba wan bung i bin tok oraitim em long Singautim Bung Lo 2005 long Haus Palamen, Salaris na Rinumeresens Ekt o Lo bilong makim Pei bilong ol Palamen memba na ol arapela lida, Apropriesen Ekt bilong 2005 na Bogenvil Geset. Long wankain taim tu, olgeta memba i bin luksave long ol gutpela wok redi we i bin kamapim gutpela ileksen i nogat trabel long em na i bin kamap long taim stret bilong em na ol wok redi bilong tupela de selebresen long kirapim wok



• Presiden Joseph Kabui

bilong nupela Otonomes Bogenvil Gavman (OBG). Na tu, tok tenkyu na givim luksa ve long olgeta lain na grup long PNG na intenesenel komyuniti husat i bin putim han wantaim na givim olgeta kain sapot long painim gutpela sindaun we i kisim Bogenvil long sanapim gavman yet bilong em.

Lo bilong makim pe bilong ol OBG memba i bin lukim planti lain i autim ol toktok na tingting bilong ol long em.

Planti i bin tok ol i mas putim ol yet olsem ol wokman na kisim semis

i go long ol pipel bilong ol i mas kamap olsem namba wan samting na tingting long pei bihain. Ol i bin tok tu olsem nau ol i mas luksave long ol samting i kamap long sait bilong ol Pei bilong ol bikman long PNG na wokim gutpela disisen we bai no larim korap pasin i kamap.

Bai Bogenvil i gat Saplimenter i baset bilong em na ol bai toktok long dispela long namba tu bung long Julai 26.

Presiden Joseph Kabui i bin tok aninit long Bogenvil Mama Lo i sut long Saplimeteri Baset

na aninit long Apropriesen Ekt, ol i ken transferim mani we i bin stap long Interim Bogenvil Provinsef Gavman i go long ABG.

Presiden Kabui i bin tok Julai bung bai tok oraitim namba wan baset bilong nupela Otonomes Gavman inap long 5-pela mun i kam.

Long wankain taim, ol lain we Asembli i bin givim luksave long bikpela wok ol bin mekim long kamapim gutpela ileksen na ol wok redi long Jun 15 na 16 olsem taim bilong sanapim OBG na tu, wok bilong painim gutpela sindaun na nupela gavman i go long ol dispela lain. Ol ilektorel tim bilong nesenel na provinsef level we ileksen Menesa Mathias Pihei na lain bilong em i bin go pas long em, Etrministreta Peter Tsiamalili na lain Pablik Sevan bilong em long Bogenvil, ol Distrik Menesa na ol woklain bilong ol, ol pipel bilong Bogenvil, olgeta grup olsem ol eks BRA na resistens lain, ol sios, ol NGO, ol intenesenel komyuniti na dona kantri olsem Australia, Nu Silan, Fiji, Vanuatu, Solomon Ailans, Yunaitet Nesens na ol han bilong em long PNG, Yuropien Yunien, Japan, Saina, Gemeri na ol arapela kantri na grup moa.

Presiden i no bin lusim tingting tu long tok tenkyu i go long leit Bogenvil Primia Theodore Miriung, olpela gavana bilong Bogenvil John Momis husat i bin mekim bikpela wok na Francis Ona.

Mist Kabui i bin tok em na gavman bilong em bai wokim bel isi pasin wantaim Mista Ona tasol taim tasol em i no makim.



Rait olgeta!

Tripela ya i makim ol meri long Otonomes Gavman i gat stail. Magdalen Toroansi i stap insait long kea teka gavman i makim ol meri long Sentrel, Francesca Semoso i Deputi Spika na makim ol Not Bogenvil meri na Laura Ampa i makim ol meri Saut Bogenvil.

Poto: VERONICA HATUTASI

Kabui luksave long ol meri

Veronica Hatutasi i raitim

BOGENVIL i bin mekim histri long PNG na planti arapela Kantri long wol long makim wanpela meri long kisim wok olsem Deputi Spika.

Francesca Semoso i bin kisim namba long makim ol meri long Not Bogenvil em ol nupela Otonomes Bogenvil Gavman memba i bin makim em long kamap olsem Deputi Spika long nupela gavman bilong Bogenvil.

Mis Semoso taim em i tok tenkyu long ol lain i givim luksave long em na makim em long dispela bikpela na tu, makim tripela meri long dispela

nupela gavman i bin tok em i amamas long ol pipel na lida long givim luksave long ol meri bilong provins.

"Makim tripela meri na mi olsem Spika em i stat long gutpela luksave na wanem samting yumi ken mekim olsem ol meri long Bogenvil na tu long jenda ikwaliti. Jenda ikwaliti i min olsem givim wankain luksave long ol man na meri wantaim.) Yumi mekim histri bikos dispela em i nambawan taim long long kamap long PNG. Mi tok tenkyu long yu Presiden long luksave bilong yu long mi na ol mama bikos dispela em i wanpela bikpela samting tru long mipela ol meri," Mis Semoso i tok.

Bogenvil bai save long ol nupela minista tude

Veronica Hatutasi i raitim

OL PIPEL bilong Otonomes Bogenvil Rijen (OBR) na ol memba long Bogenvil Palamen bai save husat tru i Minista long tude.

Presiden Joseph Kabui i tok em bai makim ol nupela kabinet minista bipo long tude bikos kea teka gavman we i lukautim nupela gavman bilong Bogenvil inap long 14-pela de i pinis tude.

Mista Kabui i bin tok bai em i gat gren koalisen gavman we bai i nogat oposisen bikos dispela bai i mekim olgeta memba, maski ol i kam long wanem pati i wok gut wantaim wanpela bel.

Memba bilong Hagogohe Robert Sawa i bin tok wok bung wantaim wantaim yuniti em i bikpela samting na ol i mas putim bikpela tingting long givim gutpela semis i go long ol pipel.

Em bin tokim ol memba long tingim olsem ol i gat bikpela wok i stap long mekim na kisim Bogenvil i go long gutpela rot we bai em i kamap gut long olgeta eria.

"Nau em i taim bilong wok na yumi mas lusim tingting long ol pati politiks na wok bung wantaim," Mista Sawa i bin tok.

Ramu memba Moses Koiri taim em i autim wankain tingting i bin tok ol i mas givim semis i go long pipel na wok long kamapim gutpela faundesen o as long staim ol wok we bai lukautim ol pikinini na bubu hust bai i kam bihain.

"Wol i was long yumi long yumi olsem namba wan lain long kirapim Otonomes Bogenvil Gavman. Bai histri i tingim yumi olsem ol lain husat i bin kamapim gutpela faundesen o ol lain we i bagarapim ol samting", Mista Koiri i bin tok.

Long wankain taim, Presiden Kabui i tok em i wok long glasim na skelim ol memba long makim tasol ol stretpela na rait lain long kisim ol ministri long kabinet bilong em.

Bikpela toktok i bin kamap long namba wan bung em long gat lidasip i gat yuniti we bai lusim tingting long ol pati politiks na kamapim gavman we bai ones o wokim ol tok tru tasol na i noken wokim ol pasin i no stret na em noken wokim hait pasin.



Ol Palmal na Kambubu skul i kisim skul laibreri buk

OL skul sumatin insait long Pomio eria bilong Is Nu Briten provins bai skruim save bilong ol long ol nupela buk we AusAID i givim ol long dispela wik.

Dairekta bilong AID Program ol i kolim long HOM DAP.

Deahne Turnbull taim em bin givim ol buk i go long han bilong Paul Tiensten em Tred na Industri Minista husat i memba bilong Pomio i bin tok gupela edukesen em i ki o mak bilong gupela futja.

Ol dispela buk i kos-tim moa long K15,000. ng Turnbull i bin tok helpim program HOM DAP bai kamapim ol gupela samting insait long ol komyniti.

Em bin tok dispela program em i bilong helpim ol wan wan man, ol komyniti grup na ol Non Gavman Ogenaisesen husat i karimaut ol projek long kamapim ol wok divelopmen. Na i no dispela long kamapim profit o win mani

Em bin tok Hai Komisin bilong Australia i amamas olsem ol dispela laibreri buk bai helpim edukesen bilong palnti sumatin insait long Is Nu Briten provins.

Em i namba wan taim long dispela program i kamap insait long Pomio Distrik. Tupela skul we dispela program bai karamapim em long Palmal Hai na Kambubu Ewentis Kolis.

Insait long ol buk we Australia i donetim i gat ol dikseneri, ensaiklopidia, ol megesin na ol novel.

Taim Mista Tiensten i tok tenkyu i go long long Australia bilong luksave long helpim bilong em we bai skruim save bilong ol yangpela pipel na eduketim ol, em bin tok ol dispela buk bai helpim tu ol komyniti i stap klostu long dispela tupela Hai skul long kisim moa save long ol samting we ol i laikim long helpim sindaun na laip bilong ol.

Rokus na Kania i gat nupela musik album

TUPELA musik man bilong Is Nu Briten bai autim ol nupela musik albam bilong ol klostu taim.

Man husat ol bin kolim Rokus the Kid na musik bilong em i bin save pairap strong tru long ol yia long 1990 taim em i wanpela manki tasol na Uralom Kania bilong Junia Kopex Ben.

Ol plen i stap nau long Rokus bai go singsing long Les, Hagen na Kavieng long promotim nupela albam bilong em.

Em bai singsing tu long Tolai Warwagira Festival we bai kamap long neks mun.



Taim yu go raun long Kokopo maket bai yu lukim kaikai i pulap kapsait na planti ol samting i stap daubilo tru long prais. Foto: CIMC

COURTS XSELL

TRENT #LA0025
2+1+1 Launs Sia
Bipo Kes K1,199
SEIVIM K400
DIPOSIT K1.00 Tasol
K36 LONG FOTRAIT
K919 DINAU PRAIS K799 KES MONI
FRI GIFT
TUPELA Amasol KETEN

SUNFLOWER DP303 #DA0012
Tebol na Sia
*Stronpela tebol ol wokim wantaim diwai
*4 pela sia igat kusen sit, ol wokim wantaim stronpela diwai.
Bipo Kes K899
SEIVIM K200
DIPOSIT K1.00 Tasol
K31 LONG FOTRAIT
K805 DINAU PRAIS K699 KES MONI
FRI GIFT
KINASE

COURTIER #BB3001
Sinkol Bed Freim
*Sinkol bed freim ol i wokim wantaim stronpela diwai
*Matres na pila igot prais bilong ol yet.
Bipo Kes K299
SEIVIM K100
DIPOSIT K1.00 Tasol
K12 LONG FOTRAIT
K229 DINAU PRAIS K199 KES MONI
FRI GIFT
Sinkol Bed

COURTS
Edim valu **OLGETA** deil

Olgeta Dro bai igat NIUELA Praiz long...

Dei bilong Dro: 02nd JULY, 2005

BAIM NAU! Na Kisim Sans long winim BIKPELA SURPRIZE! KES MONI

K15,000.00
K12,500.00
K10,000.00
K8,000.00 or **K5,000.00**

long Courts "Surprize"
Toksave: Ol "SURPRIZE ENTRI TIKET" igat DEIT APRIL 1st igo inap 30th JUNE, 2005, bai stap insait long dispela JULY SURPRIZE DRO.

Bogenvil sumatin laikim gupela edukesen sistem

OL sumatin long Bogenvil i laikim gupela edukesen sistem na singaut i go long ol lida long nupela Otonomes Gavman bilong mekim dispela i kamap long helpim ol sumatin husat i pinis long skul long lainim samting we bai helpim ol gut long laip na sindaun bilong ol.

Ol i laikim bai dispela gavman sistem i noken kamapim planti drop aut o ol sumatin husat i no go hetim skul moa. Ol i laikim sistem we bai i gat wok patna name! long sios na gavman.

Adelyne Imako husat i wanpela Gret 12 sumatin long Tarlena Sekonderi skul long Buka i bin makim maus bilong olgeta Bogenvil skul sumatin na em i wokim dispela toktok long Jun 15 long ol selebresen nupela Bogenvil Otonomes gavman.

Mis Imako i bin tok ol sumatin i paul long kain edukesen sistem we bai i kamap aniniti long nupela Otonomes Gavman.

"Taim yumi sanap- long dispela nupela Otonomes Gavman bilong yumi, mipela ol sumatin i askim bai dispela i min wanem long mipela. Na ol pikinini husat bai i kam bihain. Bai yumi bihainim dispela edukesen sistem nau yumi bihainim we 90 pesen bilong ol sumatin i lusim skul bikos i nogat spes bilong ol long go hetim skul o bai nupela gavman i painim narapelsa gupela rot," Mis Imako i bin tok.

Em bi toktok tu long ol sosel wari we strongpela dring na ol drag o stromngpela spakbrus i kamapim, planti yangpela na ol sumatin i gat bel na HIV/AIDS.

Em bin tok ol i laikim edukesen sistem we bai helpim ol gut.

Ol skul sumatin long Bogenvil i laikim kain Edukesen sistem we i no lusim planti pikinini i lusim skul na stap nating

COURTS - GORDONS Spring Garden Road, Gordons, Port Moresby Ph: 302 5800 • Fax: 325 4149 • E-mail: sales@courts.com.pg
COURTS - LAE Millfordhaven Road, Lae, Morobe Province Ph: 472 4800 • Fax: 472 4621 • E-mail: courts_lae@courts.com.pg

EM TAIM BILONG ORISEN PILAI LONG COURTS! Waintaim ol Trade-In, Fri Gift na planti moa!

Kar Kar komyuniti strongim lo na oda

Gabriel Bego (DWU Sumatin) i raitim

KAR KAR Ailan komyuniti insait long Madang provins i kirapim nupela program bilong strongim lo na oda insait long ples bilong ol.

Pasto Columbus Dalag bilong Ivenjelikel Luteran Sios i statim wanpela nupela ministri long daunim ol hevi bitong lo na oda long Kar Kar Ailan.

Pasto Dalag i tok em i go pas long kirapim dispela long wanem hevi bilong lo na oda i wok long kamap bikpela tru na long helpim long daunim, gavman na ol sios i mas wok bung.

Em i pasim tok wantaim komyuniti bilong em long ailan yet na long Madang taun na nau ol i save go raun lukim ol kalabus manmeri bilong Kar Kar i stap long Beon haus kalabus.

Aninit long dispela ministri, Mista Dalag i tok ol kalabus i mekim wok ministri na karimaut

wok aweanes insait long wan wan hap bilong ol.

Mista Dalag i bin toktok wantaim Beon Haus Kalabus riabilitesen menesmen we i stap aninit long lukaut bilong Jackson Gubag na ol woda i wok long karimaut dispela ministri we i namba wan long kamap insait long kantri.

Em i tok sampela kalabus man i go aut long kalabus na ol arapela husat i bin ronawe nau ol i kam bek gen na wok wantaim em insait long ministri.

Pasto Dalag i tok namba wan ministri raun bilong komyuniti i bin go long haus kalabus long mun Disemba las yia na namba tu raun em long Ista Wiken.

Namba tri raun bilong ministri em long Sande taim Watabag komyuniti bilong Kar Kar i go raun lukim ol kalabus.

Ol i bin bung wantaim ol kalabus man, givim stia tok, kaikai, sop, toilet pepa, tutpes na ol tutbras.

Ministri Siaman Malus Pupalang i bin tokim moa long 30 kalabus man olsem ol i stap aninit long komyuniti na ol i mas i go bek.

"Mipela kam hia long toksave long yupela olsem yupela bilong mipela tasol.

Taim yu lusim dispela ples na go bek long wan wan ples bilong yupela, yu mas tingim olsem yupela i gat komyuniti na yu mas traim long mekim gutpela wok insait long komyuniti bilong yu.

"Planti taim ol papamama i save lukautim yu taim yu stap long hia, tasol i no save stretim ol pasin nogut taim yupela i go aut long wanem yupela i pilim sem olsem komyuniti bai lukim yu olsem wanpela kalabusman.

Dispela kain tingting i no stret. Mipela i kam hia long soim yu olsem yu ken mekim wok insait long komyuniti na karimaut wok aweanes na lotu ministri," Mista Pupalang i tok.



• Ol man Kar Kar i kalabus long Beon i kisim sop, toilet pepa, tutpes na tutbras long Watabag komyuniti siaman Malus Pupalang.

46 nupela haus kalabus bai kamap

Michael Novingu i raitim

BAI i gat 46 nupela haus kalabus we Koreksenal Sevises (CS) bai opim long dispela yia.

Dispela toktok i kam long Komisina bilong CS, Richard Sikani taim em i opim wanpela bung bilong ol bikman bilong CS long Madang long wik i go pinis.

Moa long 20 sinia menesa bilong ol haus kalabus long PNG i bin sindaun long dispela bung.

Tok i go pas long dispela kibung em long kamapim wok bung

wantaim ol arapela long kamapim gutpela sindaun.

Dispela em i toktok bilong Komisina Sikani taim em i opim bung bilong ol long Madang long dispela wik Mande.

"Yupela olgeta i save Koreksenal Sevises i nogat inap risoses long karimaut ol wok bilong mipela. Ol dispela hevi mipela i bungim em nogat kar, nogat komyunikesensamting olsem tuwei radio, telepon na ol arapela samting bilong karimaut wok.

"Mipela i laik karimaut polisi bilong gav-

man long karimaut ol wok tasol gavman i no givim mipela ol samting bilong wok. Mipela i no inap mekim ol dispela wok," Mista Sikani i tok.

Tasol em i tok i gat sampela gutpela wok i kamap pinis long CS olsem lonsing bilong CS Straksa, infomesen teknoloji we em i stap insait long fremwok plen bilong CS long 2005 i go inap 2010.

Em i go moa na askim ol haus kalabus komanda long lukautim gut wanem samting ol i gat long karimaut gut wok bilong ol long wanem gavman i nogat mani bilong helpim ol.

Dadae luksave long komyuniti risos senta



• Mista Dadae i kisim ol buk NARI i save mekim long Ekting Dairekta Jenerel bilong NARI Dokta Sergie Bang.

MEMBA bilong Kabwum, Bob Dadae i luksave olsem ol komyuniti risos senta i ken kamap pos bilong givim save na kamapim senis bilong ol lain manmeri i stap long ples.

Na taim ol manmeri i kam kisim dispela kain save bilong wok agrikalsa na didiman ol i ken strongim wok faming bilong ol na kamapim gutpela sindaun insait long komyuniti bilong ol.

Mista Dadae i bin mekim dispela toktok taim em i go raun lukim Het Opis bilong Nesenel Agrikalsarel Risets Institut

(NARI) long Sir Alkan Totolo Risets Senta long Lae las wik Fonde.

Em i tok dispela kain risos senta i ken helpim ol liklik fama long sanap long tupela lek bilong ol yet.

Mista Dadae i tok ol nupela masin na save bilong wok agrikalsa bai helpim ol manmeri long wanem ol dispela nupela save em i kamap long PNG yet.

Em i tok long givim sans long ol fama, ol dispeal risos senta i mas i gat luksave na kisim sapot.

Olsem na em bai sanapim wanpela risos senta insait long Kabwum distrik bilong em.

Em yet i tok ol Dengendo manmeri insait long Deyamos Lokol Level Gavman eria i givim 25 hekta graun bilong dispela risos senta na wok long sanapim ol haus i go het pinis.

NARI i kamapim dispela kain rot bilong givim skul long ol fama long kirapim wok bung namel long ol lokol level gavman, ol NGO, sios grup, fama grup, praiwet sekta ejensi na ol risets ogenaisesen.

Wok bung i ken abrusim ol bagarap

Michael Novingu i raitim

WANPELA wok painimaut ol i bin karimaut insait long Pasifik Rijen stat long 1994 i kam inap long 2004 i soim olsem planti ol samting na manmeri i bin kisim bagarap long ol bikpela disasta long ol developing kantri we PNG i stap insait long em.

Ol risoses, ol samting olsem sais bilong namba bilong ol manmeri insait long Pasifik rijen i kam namba tu long ol kantri olsem Afrika we i save bungim planti bagarap.

Dispela em toktok bilong Kenel Eric Ani, taim em i givim bikpela toktok long namba 12 Pasifik Rijnel Disasta Menesmen kibung i no long taim i go pinis.

Kenel Ani i tokim olgeta i sindaun long dispela kibung olsem olgeta Pasifik kantri i mas wok bung wantaim gavman, ol NGO, sios na ol arapela lain long trupela pasin long helpim mipela yet long sait bilong mani na ol samting long luksave long bagarap i stap we i ken kamapim hevi long traim na abrusim.

"I no isi long toktok wantaim gav-

man long kisim helpim long sait bilong mani na ol arapela samting long karimaut ol dispela wok long daunim ol hevi i laik kamap. I tru em i hat tasol yumi ol stek holda i mas kamapim gutpela wok namel long mipela long kamapim gutpela sindaun long ol pipel bilong mipela insait long Pasifik Rijen," Kenel Ani i tok.

Em i go moa na tok ol wansolwara bilong mipela, ol rijinel ogenaisesen, dona patna, intanesenel ejensi, NGO na ol arapela i ken wok bung long kamapim nesenel na rijinel yunuti.

"Mi ken tok sapos mipela i tingting strong long kirapim dispela wok yumi mas helpim mipela yet long sait bilong mani na ol arapela samting.

Mipela mas tok klia long ol pipel bilong mipela long abrusim ol birua olsem maunten paia i pairap, taitwara, bikpela win na ol arapela birua i laik kamap."

Kenel Ani i tok dispela em i bikpela samting namel long mipela ol Pasifik Ailan kantri long serim ekspirisen o save yumi gat long helpim mipela yet long kamapim gutpela sindaun bilong ol pipel bilong mipela.

Raskol pasin bikpela long Barola maunten.

James Kila i raitim

OL BIKPELA bisnis na ol papa bilong ol PMV husat i save ron long Hailans Haiwe i mekim bikpela singaut i go long nesenel gavman na tu lsten Hailans Provinsel Gavman long lukluk i go insait long hevi bilong raskol pasin we i save kamap bikpela long Barola maunten long lsten Hailans hap bilong Hailans Haiwe.

Wanpela mausman bilong ol PMV opereta o bosman long Hailans Haiwe, John Kontz bilong Westen Hailans i mekim dispela bikpela singaut bihain long ol raskol lain i bin stopim 15 sita bas bilong em las wik na stilim mani bilong bas na tu mani na ol arapela samting bilong

ol pasindia. Konts i tok olsem raskol pasin long barola maunten em wanpela bikpela hevi tru namel long planti ol lain husat i save ron long PMV na tu ol bikpela haiwe trak husat i save ron i go antap na kam daun long dispela bikpela rot.

"Yu ken askim olgeta papa bilong ol PMV bas bilong Hagen, Goroka o Simbu na ol bai tokim yu olsem planti mani na kago biong mi i save go long han bilong ol raskol o bikhet man long Barola maunten na mipela i les pinis," Konts i tok.

"Planti taim mipela i save karim ol pasindia i kam long Hailans Haiwe na ol i save amamas gut tru long kisim kol win. Tasol taim mipela i

kamap long Barola Maunten, lewa bilong ol i save suruk stret i kam antap long nek stret," Konts i tok.

I no long taim i go pinis wanpela papa bilong PMV bas i bin lusim moa long K2000 na ol pasindia bilong bas i lusim planti ol samting bilong ol taim ol raskol man i stopim bas long Barola Maunten na stilim ol samting bilong ol.

Insait long ol ripot i kamap long las yia opis bilong gavana bilong lsten Hailans na provinsel etminstresen i bin kamaut na tok olsem ol bai sanapim wanpela polis gat pos long Barola Maunten. Ripot i tok olsem AusAID bai givim mani long kirapim dispela polis pos

long Barola.

Tasol dispela toktok bilong ol i no karim kaikai na turangu ol pablik na ol manmeri husat i yusim dispela rot long Hailans Haiwe i kisim hat taim yet long han bilong ol raskol.

Ol PMV bas draiva long Westen Hailans, Simbu, Sauten Hailans na Enga i save pret tru taim ol i ron long dispela hap bilong haiwe. Planti man i laikim polis pos i mas i stap long dispela hap stopim dispela pasin.

Ol man i nogat moa rispek na laik pasin long ol narapela lain. Planti i laik bagarapim nating ol narapela manmeri.

Ol mama kisim mani long rausim grin bin kopi pipia

James Kila i raitim

PLANTI ol mama long Hailans rijen husat i stap klostu long ol bikpela kopi fektori o prosesing weahaus i save mekim gutpela wok tru long stretim na rausim ol liklik pipia long ol grin bin kopi pastaim long ol kopi bilong kantri bilong yumi i save go ovasis.

Sapos yu wanpela nupela man long save long dispela em bai yu ken lukim ol dispela mama i mekim dispela wok long taim bilong kopi sisen. Planti ol mama bai sindaun na daunim het na stretim ol grin bin kopi bin em masin i stretim pinis tasol i gat sampela pipia i stap yet.

Dispela wok ol i mekim em long kamapim gutpela ekspot kwaliti na tu ol i rausim ol liklik pipia o hap stik o ston we i pas nabaut long ol grin bin kopi.

Dispela wok em long wok bilong kopi indastri em ol i kolim 'hen soting'

Dispela liklik wok ol i mekim i save helpim ol long kisim liklik mani long helpim sindaun bilong ol na tu bikpela samting em strongim kwaliti bilong PNG kopi insait long wol maket.

Wok bilong hen soting o rausim pipia long grin bin kopi em planti ol mama i save mekim long l bikpela kopi fektori long Goroka, Maunten Hagen, Kundiawa na Lae we ol prosesing fektori i stap long en.

Wanpela mama Agnes Kua em wanpela bilong ol dispela meri husat i save painim liklik toea long helpim em wantaim famili long dispela wok bilong hen soting o rausim pipia long grin bin kopi.

Em i save stap long Genauka setelmen long Goroka taun na i save wok-abaut bihainim Epot Rot long Goroka long sekap

sapos ol kopi fektori i gat dispela wok bilong rausim pipia bilong kopi i kamap.

Long sait bilong Epot rot long Goroka i gat planti ol bikpela kopi kampani olsem PNG Kofi Expot, Niugini Hailans Kopi Export, Nambawan Kofi, Kofi Koneksins na tu ol lain PNG Kopi Groas Federesen i save kisim ol mama long mekim dispela wok bilong rausim pipia long grin kopi.

"Mipela i save kisim K5 long wanpela bek kopi em mipela i kapsaitim na sekim long rausim ol pipia," Mama Agnes i tok.

"Sapos insait long wanpela wik mipela i wok long 10-pela bek em mipela i ken kisim K50 sapos reit bilong rausim pipia long wanpela bek em K5," em i tok.

Em i tok tu olsem dispela reit o mak em ol lain kopi fektori yet i save makim na ol i save wok.

Long sampela taim taim bikpela namba bilong grin bin kopi i go long fektori em ol mama i save hatwok tru na brukim stret baksait bilong ol long mekim dispela wok.

Taim ol i mekim olsem ol i save kisim gutpela mani.

"Mipela i save amamas long wok bilong rausim pipia long grin bin kopi bikos dispela wok i save helpim mipela long kisim liklik toea long sapatim mipela na famili bilong mipela," Agnes i tok. Kopi i bikpela samting long Hailans rijen olsem kakau na kopra i bikpela samting long nambis.

"Sapos mipela i klinik pipia long 10-pela bek long wanpela wik mipela inap kisim K50"

Lida senis klostu klostu bagarapim wok developmen

GAVANA bilong Simbu, Peter Launa i mekim bikpela singaut i go long pipel olsem ol i mas tingting gut na makim ol gutpela lida long makim ol insait long nesenel palamen.

Mista Launa i tok dispela pasin ol pipel i save mekim long senisim ol lida olgeta 5-pela yia na makim ol narapela man i givim hevi long wok developmen insait long ol distrik long go het. Senis long ol developmen plen tu i save bagarap.

Gavana Launa i tokaut strong tru long dispela sait long Minj las wik Sarere long lonsing bilong Taiwan Rais Maltiplikesen na Distribusen senta.

Dispela bikpela bung long mink i lukimplanti ol nesenel na provinsel lida i stap na harim.

Ol narapela palamen lida husat i stap long dispela lonsing long Minj em Agrikalsa Minista Mathew Siune, Westen Hailans Gavana Paia Wingti, memba bilong Anglimp Saut Waghi Jamie Maxtone-Graham.

Mista Launa i tok olsem em i moa gutpela long ol pipel i iuk-save gut na makim ol lida husat i gat gutpela tingting na save ong karim hevi bilong ol pipel na lida we i tingim gutpela bilong developmen insait long distrik we i ken karim gutpela kaikai long helpim ol pipel long bihain taim. Ol lida ya i mas gutpela Kristen pasin.

Mista Launa i tok olsem dispela pasin long votim ol nupela lida olgeta 5-pela yia em wanpela samting we i lukim ol wok plen insait long ol distrik na provins i no karim kaikai bikos taim ol nupela lida i go insait ol i save kamap wantaim nupela tingting na ol plen we ol pipel i harim olsem bipo bai kamap i no save kamap.

Mista Launa i tok em i sapatim ol gutpela wok memba bilong Anglimp-Saut Waghi i kamapim long distrik bilong em. Ol dispela wok em ol pipel yet i mas sapatim long bringim gutpela senis na developmen i kamap long distrik bilong ol.



Gavana Launa i givim strongpela toktok long Minj. Foto: JAMES KILA

The All-New

TOYOTA

HIACE

- Bigger 3.0 litre Diesel engine
- Standard LWB 15 seater & Hi-Roof LWB 16 seater.
- AM/FM Radio cassette
- Airconditioning (Optional)
- Power steering
- Stability and comfort
- Most popular vehicle in it's class

Instrument Panel Mounted Gearshift

Open the front Panel

Mechanical Lock Type slide door

SRS Air Bags (Optional)


Ela Motors

TOYOTA

TOYOTA TSUSHO (PNG) LTD.
www.elamotors.com.pg

Now Available Nationwide

For More Information Contact: Port Moresby Ph 3229400 Fax 3217268 or Lae Ph 4781800 Fax 4722463



PLEN BAGARAP...

WANPELA saspek o man ol polis i ting em i asua na brukim lo i sindaun sore aninit long han bilong wanpela polisman long Waigani, Pot Mosbi. Polis i holim em bihain long em i laik traim stilim kar ausait long Beng Saut Pasifik (BSP) beng las wik Fraide. *Poto: Andrew Molen*

Ol telepon kisim mak nogut

PLANTI ples insait long Pot Mosbi siti i kisim mak nogut long ol lain long Telikom bilong wanem ol bikhet manmeri long ol dispela ples i save bagarapim ol waia bilong telepon olgeta taim.

Ol i save katim ol waia bilong telepon long hap klostu klostu na ol wokman bilong mipela tu i save kisim taim long han bilong ol bikhet lain long hap." Menesing Dairekta bilong Telikom, Martin Veisame i tok.

Mista Veisame i tok ol i putim mak long ol dispela ples bilong wanem ol man i wok long katim na bagarim ol waia olgeta taim na ol i save holap long ol wokman bilong Telikom taim ol i go long stretim.

Em i tok ol ples ol i makim em: Tokarara, Rakatani strit, Jun veli, Hohola stes 3 na 4, Burns Peak, Morata, Gerehu stes 5 na 6, Sabama Hill, Kaugere setelmen, Hos Kem, Pari aspies, Faiv-mail (sait long liklik mauten na Kanage strit setelmen), Siks mail dam, Erima Funeral Home, ATS kompau, ATS hanga bilong balus, Dekenai konstraksen, DPI, Laloki, Badili na sampela hap long Paga hill.

"Ol man i save katim telepon waia long dispela ol komyuniti bilong ol yet olgeta taim," Mista Veisame i tok.

Em i tok ol man i katim dispela ol waia i save laik kisim ol dispela waia we ol i mekim long kopa bilong wanem ol i save laik salim long ol hap bilong salim ol haphap ain o "Scrap Metal" na kisim moni long en.

Dispela em bilong wanem waia bilong telefon i save kisim bikpela moni taim ol i salim ol long hap.

Mista Veisame i tok ol bai i nap long go hariap long stretim telefon long ol dispela ples we ol i putim mak long ol pinis bilong wane m ol i save katim ol waia long hap olgeta taim.

Em i tok, "Taim ol raskol i stil long ol wokman bilong Telikom, dispela i save mekim wok bilong ol i hat moa bilong wanem ol i save stilim tu ol tuls o ol samting bilong ol long wok na tu sampela samting bilong ol yet tu i save lus wantaim taim ol i stap aut na wok."

"Dispela i no niupela samting na i save kamap olgeta taim," Mista Veisame i tok moa.

Em i tok telikom i wok long lukluk long kisim ol telefon i kam insait we ol i no save yusim waia o ol telefon we i save salim toktok long signal bilong redio we bai inap long stretim o stopim dispela hevi bilong ol man long katim ol telepon waia.

NCDC Yunion givim sapot long siti menesa

NESENEL Kapitel Distrik Komisn wokas yunion long dispela wik i tok ol i gat bikpela bilip long nupela siti menesa, Peter Loko oisem em bai soim gutpela wok pasin olsem lida taim em i holim dispela opis.

Presiden bilong yunion, Honk Kiap i mekim dispela toktok bihain long em i bung wantaim Mista Loko.

"Long makim maus bilong NCDC wokas yunion mi laik tok amamas long Mista Loko long ol i makim em na mi save em bai wok strong na gut long lukautim na menesim siti bilong yumi.

"Mipela i amamas long em na mipela i gat bilip olsem em i gat save na gutpela pasin long wok i

nap long laik bilong ol narapela bikpela atoriti bai ol gutpela samting na sevis i kam.

"Long sotim toktok bilong mi, mi laik tok olsem em i rait man bilong dispela wok," Mista Kiap i tok.

Nesanel eksekutiv kaunsel i makim Mista Loko tupela wik i go pinis bihain long ol i wet inap klostu 4-pela mun.

Makim bilong Mista Loko i bin winim tu sapot na amamas bilong Prais Minista Sir Michael Somare husat i givim sapot bilong em na i tok tu olsem Mista Loko i wanpela rait man bilong holim dispela wok.

Mista Loko husat i wanpela enjinia i gat save tu long wok menesa long wok telekomyu-

nikesen we em i bin stap olsem jenerel menejsa bilong intanesenel bisnis inap 20 krismas wantaim Telikom.

Em i bin wok wantaim "Pacific Mobile Communication" olsem Menesing Dairekta.

Mista Kiap i tok amamas tu olsem makim bilong Mista Loko i bihainim lo na i no kamap nating long sait o long laik bilong wanpela man o sampela lain tasol na em i toktok amamas tu long gavman long dispela.

Em i tok tu olsem yunion i redi tasol long wok wantaim Mista Loko long gutpela bilong olgeta wokmanmeri bilong NCDC husat em i bilip bai i kisim ai bilong menesmen aninit long nupela menesa bilong ol.

Kokonas projek bilong Sentrel provins

Andrew Molen i raitim

LONGPELA taim nau Sentrel Provins i bungim planti hevi long sait bilong iekonomik developmen bilong en na em i taim nau bilong dispela olgeta i senis.

Gavana bilong sentrel provins, Alphonse Moroi i mekim dispela toktok las wik Fraide taim em i bung wantaim ol bikman bilong Cocoa Copra Industri (CCI PNG), Kokonas Industri Koperesen (KIK) na dipatmen bilong Agrikalsa (DAL) long palamen haus.

Sentrel provinset gavman na CCI PNG i sainim wanpela "Memorandum ov Agrimen" o tok klia na pasim tok long kamapim wanpela Agrikalsa na risets trening na ekstensen senta long ples Hisiu insait long Kairuku distrik.

"Mi lukim olsem i gat bikpela as long kisim CCI i kam na sanapim long Sentrel provins.

"Wanpela bilong ol dispela em bai ol sevis na save bai stap klostu long ol pipel bai ol inap long kisim," Gavana Moroi i tok.

Em i tok dispela em i wanpela samting we olgeta pipel bilong Kairuku Hiri i wok long lukluk long en longpela taim na nau em i kamap na bai i helpim ol tru.

"Yumi mas wok bung na strong long abrusim ol dispela hevi provins bilong yumi i bungim long ol yia i kam i nap nau," Mista Moroi i tok.

Em i tok Sentrel provins i kam bihain long planti ol narapela provins long sait bilong iekonomik developmen bilong en na em i lukim olsem provins i mas

mekim wanpela samting long stretim dispela.

"Yumi i stat bihain tru tasol yumi noken go na i dai, dispela i mas i go moa yet," em i tok.

Samting ol bai i lukluk long en em kokonas o kopra bilong wanem i gat planti plantesen bilong ol lain long ples i stap pinis.

"Mi laik tok olsem kopra em i rait samting long yumi statim wok long en bilong wanem long kokonas bai yu inap long mekim kain samting, oil bilong gras na kuk, sop, marasin na planti moa narapela samting.

"Na tu bai yumi no inap long planim na wet ken bilong wanem ol papa bilong yumi i planim bipo yet i stap na

nau ol i redi pinis long rausim," siaman bilong KIK Joseph Eko i tok.

Long wankain taim provinset gavman i givim K100 000 i go long KIK long helpim dispela wok i go het.

"Mi laik tok tenkyu long dispela moni, gavana, na mi ken tokim yu olsem bai yu lukim kaikai bilong en," Mista Eko i tok.

Mausman bilong ol sief long Nara,

Gabadi na Hisiu we dispela senta bai stap, Arua Oa husat em yet i sief bilong Hisiu i tok, "Mipela i laik tok tenkyu long yu long dispela projek na mipela i save olsem em bai i helpim gut ol pipel bilong mipela."

Fes Mask festival long Toare kamap orait tasol

Andrew Molen i raitim

NAMBAWAN mini mask festival bilong Toare ples long Galp provins i kamap orait tru na i lukim planti ples i soim laik long stap insait long en.

Dispela i mekim Eksekutiv Dairekta bilong Nesanel Kalsa Komisn (NCC), Dokta Jacob Simet i tokaut oisem neks yia bai dispela festival i kamap gen long wankain ples.

"Mi amamas long lukim olsem i gat bikpela laik i stap long hia na mi laik tokaut olsem dispela bai i kamap ken long hia neks yia long wankain taim," em i tok.

Galp provinset etministresen na NCC i bin wok bung wan-

taim long kamapim dispela festival.

Moa long 30 ples i soim laik long kamap wantaim ol mas bilong ol tasol 12-pela tasol i bin i kamap bilong wanem ol i painim hat long rot na wokabout bilong ol i kam long Toare.

Ol lain i kamap em Karama, Pukari, Mora, Lavare, Silo, Kavako, Aike, Avere, Pomara, Lelefiru na Toare yet.

Dokta Simet i tok olsem ol i traim dispela yia long lukim sapos i gat laik long ol pipel na em i tok bekim i bikpela na i gutpela tru na dispela festival tu i ron gut tasol.

"Long dispela as bai festival i kamap long hia ken neks yia,"



Putim Mak: Sentrel Provins Gavana Alphonse Moroi i sainim pepa long tok orait long wok agrikalsa bai i ken go het long strongim provins. *Poto: Andrew Molen.*

YWCA rijinel bung long Nu Silan

Lorraine Siraba bilong YWCA i raitim

...*Naispela ples tru*

Lorraine Siraba i wok wantaim Young Womens Christian Association (YWCA) long Pot Mosbi. YWCA em wanpela Non Gavman Ogenaisesen long kantri we i save mekim ol wok i karamapim ol meri. Wok bilong en em long iukautim ol intres, wari na i laik kamapim gut laip bilong ol meri long sait bilong helt, edukesen, famili, sosel isu, save na lukautim rait bilong ol meri na i laik lukim olsem ol meri i stap insait long ol wok developmen long komyuniti na kantri. YWCA i save lukim olsem planti yangpela meri i

Wanpela bung bilong ol YWCA insait long Pasifik rijen na tu Australia, Nu Silan i bin kamap long Rotorua, Oklen long Nu Silan we i bin bungim bikipela lain meri long stap wantaim



• Eitpela meri PNG i bin makim kamtri long YWCA Rotorua bung.

long wanpela wik na toktok long ol samting we ogenaisesen i karamapim insait long rijen.

Het tok bilong bung em, "Selebretim taim bipo na tingim fiutsa o bihain taim". Em bin taim bilong serim, lukluk bek, glasim na skelim ol wok kamap wantaim ol narapela wanlain long

rijen na ol wok developmen we ogenaisesen i kamapim long sait bilong ol meri, ol yangpela pipel, komyuniti na sosaiti, tasol long wankain taim tu, lukluk tu long sampela ol bikipela samting we i wok long kamapim hevi insait long sosaiti tude. Em long HIV/AIDS na wanem samting ol sios i

mekim long dispela, long lukautim ol lain wantaim dispela sik na moa. Menesmen na gutpela gavman na lidasip, ol meri, raits na globalaisesen o we yumi wokim ol samting i stap long skelmak wantaim wol, raits na luk-save bilong ol yangpela pipel na givim ol ripot bilong ol wan wan YWCA long rijen na rijen i mekim wanem samting long autim ol bikipela samting yumi toktok long em antap. Ol lain i bin stap insait long bung i bin lainim planti gutpela samting.

Ritim moa stori bilong Lorraine daunbilo:

"Piksa bilong mi long Nu Silan em mi bin klia long em taim mi kisim, lukim na ritim liklik buk long Nu Silan Hai Komisnin long Pot Mosbi. "Kwaliti o kain laip long Nu Silan we i gat planti gutpela ea o

naispela win na nogat posin pipia tumas long en em yu no inap long painim long narapela kantri. Gutpela kiinpela ea o win, klinpela wara, gutpela kaikai ol i kisim long gaden o fam na laip insait long ol bikipela siti em i seif.

Yu lukim olsem wara i boil na smelim salfa na yu save olsem yu stap long Rotorua.

Wankain long wok na pilai." Mi lukim olsem ol dispela toktok i tru olgeta taim mi na ol narapela wanwok bilong mi long YWCA i bin go na stap insait long Wol YWCA Pasifik Rijinel Institut (RTI) long



• Maski putim kol siot, Lorraine Siraba i pilim strongpela kol yet.

Rotirua, Aetearoa." Dispela em i namba wan kain bung we RTI i holim na ol kantri olsem Australia, Nu Silan, Fiji, Samoa i bin salim ol lain bilong ol long em. Is Timor i bin salim ol lain bilong em long namba wan taim tu long dispela bung. Tingting long holim dispela RTI Pasifik

bung i bin kamap pastaim long Brisben long yia 2003 bihain long Wol kaunsel miting long autim ol samting i wok long kamap long rijen na wok bilong YWCA long traim daunim ol dispela wari na hevi.

Bung i bin stat long Mei 9 na pinis long de namba 15.

Oklen: Amamas long go kamap hia bihain long longpela wokabaut tasol ol i lus tingting long tokim mipela olsem em i kol olsem ais stret. Tasol gutpela lukaut bilong ol susa long Hamilton i bin redim ol blanket samting long bas i kam kisim mipela i sevim mipela.

Hamilton: Steven em brata bilong bosmeri long Hamilton YWCA i bin kisim mipela long ples balus na draiv long tudak long 90 minit samting. Mipela i hap slip i go kamap olgeta long siti we i gat 166,000 pipel long en. Bikipela wara Waikato i

stap namel long Hamilton siti. Siti ya em i naispela tru wantaim ol naispela flawa gaden tu ya. Hamilton em i ples bilong biknem ragbi tim bilong Nu Silan em Waikato Ragbi Tim. Mipela i stap long YWCA Hostel long Hamilton long tupela de na amamas long stap long naispela ples.

Rotorua: Long 5-pela awa draiv long Hamilton i kam long Rotorua, mi pilim na lukim long ai bilong mi stret klinpela ea, wara, planti kaikia, ol fam i gat ol apol, stroberi na ol arapela prut na ol arapela gaden kaikai.

Yu lukim ol naispela ples, ol samting i stap long em na yu lukim han bilong Bikman i bin wokim ol dispela naispela samting.


Yu lukim olsem wara i boil na smelim salfa na yu save olsem yu stap long Rotorua. Bosmeri bilong YWCA long Hamilton em Anne i tokim mipela olsem samting i smel nogut na i no kapupu, em salfa tasol ya. Planti samting i save kamap long Rotorua.

Em i ples we pasin tumbuna bilong ol Maori o asples pipel i strong tru.

• Moa long raun bilong Lorraine Siraba neks wik..



• Naispela bilas na danis bilong ol Nu Silan YWCA meri.



• Stail Haka danis bilong ol Maori i save pulim planti pipef long go lukim Rotorua.



• Naispela flawa gaden long Hamilton.



• Taim bilong kaikai ya! Ol Poto: Lorraine Siraba- YWCA Pot Mosbi.

Kuk Kona wantaim MERI WANTOK

Kaukau Crayfish

<p>Yu mas i gat: Fres kreipis o kingdam yu boilim wantaim wara bilong solwara. Yu brukim sel bilong kreipis na rausim mit Haf kilo kaukau Wanpela mekpas spring anien Haf kilo tomato Wanpela mekpas pinat 40 grem bata</p>	<p>1-Kukim kaukau na katim i go liklik 2-Katim mit bilong kreipis, katim anien i go liklik na katim ol tomato. 3- Kukim pinat long paia na rausim ol sel long ol. 4-Melitim bata na hotim olgeta samting yu redim long kukim na miksik isi. 5-Tanim ol miksa na putim i go long ol sel bilong kreipis na sevim.</p>
--	---

We long Kukim:

TOKTOK NATING Wantaim Fr. Paul Liwun SVD



LONG STORI bilong mi tude, mi laik helpim yumi long lukluk bek gen long tupela han bilong yumi. Tenkim God long wokim tupela gutpela han na givim long yumi.

Wanpela man, nem bilong em Edward Hays, i bin stori gen long wanpela stori bilong God i wokim heven na graun. Dispela stori i save kamap namel long ol lain Indian Maidu long Kalifornia. Skin kala bilong ol dispela lain em i ret.

Ol i bilip olsem bihain long wokim olgeta samting, God i bin kisim retpela graun na tanim wantaim wara na em i wokim man na meri. Tasol God i no pinisim dispela wok wantu tasol. Nogat. Bikos em i no wokim han bilong ol yet.

Olsem na God i bin askim narapela kriesen, olsem wanem em bai wokim han bilong dispela man na meri. Taim em i askim olsem, wanpela trausel i bin kamap na tokim God olsem: "yu mas wokim han bilong ol olsem han bilong mi, bai ol inap long swim olsem mi". Tasol wanpela wail dog i no tok yesa long trausel na em i tokim God olsem: "yu mas wokim han bilong ol olsem han bilong mi, bai ol i ken ron spit tru olsem mi".

Long harim dispela tupela bekim, God i bin sarap liklik, na em i tokim ol olsem: "Tenkyu long slia tok bilong yupela. Tasol mi bin tingim pinis olsem bai mi wokim han bilong man na meri olsem han bilong mi yet. Olsem na ol tu bai inap long wokim wok olsem mi."

Na God i bin wokim han bilong man na meri olsem han bilong em yet. Bikos, God i bin wokim han bilong manmeri olsem han bilong em yet, olsem na manmeri em i namba wan kriesen i winim ol narapela kriesen, bikos ol man na meri tasol inap long yusim han bilong ol long wokim wok o kamapim wok long dispela graun.

Manmeri bilong Indian Maidu long Kalifornia i save gut wanem samting yumi mas tingim oltaim. God i bin wokim han bilong yumi bihainim piksa bilong han bilong em yet. Olsem na, yumi mas bisi olgeta de long wokim wok, long kretim samting olsem God i bin wokim olgeta samting bilong heven na graun.

Han bilong yumi noken stopim narapela manmeri. Han bilong yumi i noken bagarapim ol wok ol narapela manmeri i bin wokim. Planti han nogut i stap insait long Pot Mosbi siti i save bagarapim ples, bagarapim ol samting bilong pablik, olsem kain kain rabis toktok, tromoi pipia nabaut, na narapela samting nogut i bagarapim ples bilong kapitel siti bilong PNG. Han bilong planti manmeri i bin mekim doti siti bilong yumi. Han bilong yumi i noken mekim samting i no stret long ai bilong God na ai bilong manmeri.

Han bilong yumi i mas hat wok long mekim kamap bel isi na gutpela taim long dispela graun, long dispela kantri na city bilong yumi. Han bilong yumi i no mas redi oltaim long palitim o mekimsave long ol narapela tasol na mekim ol narapela manmeri i karim hevi long han bilong yumi. Em i no stret. Han bilong yumi i mas helpim yumi long redi oltaim long tok sori na kamap wanbel wantaim ol narapela insait long ples bilong yumi.

Wankain olsem han bilong God, i bin wokim kamap heven na graun, na wok bilong em i naispela tru, han bilong yumi tu i mas bisi long mekim wok na kamapim naispela na klipela ples, bai yumi tu amamas na narapela manmeri tu bai amamas long lukim ol naispela samting i stap nabaut long yumi. God i bin givim han bilong yumi long lukautim ples na siti bilong yumi

Hamas gutpela wok yu save wokim long wanpela de yusim han bilong yu long mekim ples i kamap naispela na mekim manmeri i stap wantaim yu i amamas?



POL I SAVE RAN STRONG I GO LONG MAK

Mi no ting olsem mi kisim pinis dispela pasin bilong Kraiss, na mi kamap gutpela man tru. Nogat. Tasol oltaim mi save wok strong long holimpas dispela pasin, olsem Kraiss Jisas i bin holimpas mi. Ol brata, mi no ting mi kisim yet dispela pasin.

Tasol mi gat wanpela tingting tasol, em long mi mas lusim tingting logn olgeta samting bilong bipo, na mi mas wok strong long kisim dispela samting bai kamap bihain. Mi save ran strong bilong kamap long mak na kisim prais. Dispela prais em i olsem. Long wok bilong Kraiss Jisas, God i singautim mi bilong i go antap na i stap gut tru wantaim em.

FILIPAI 3:12-14

Otonomes Gavman bai skelim mani long sapotim sios

Veronica Hatutasi i raitim

OTONOMES Bogenvil Gavman (ABG) bai givim sampela manimak olgeta yia i go long ol sios long Bogenvil long karimaut wok bilong ol.

Presiden Joseph Kabui i bin wokim dispela toktok taim em i stori wantaim Wantok long ol tingting bilong em long Bogenvil i kam aninit long nupela gavman we em i go pas long em.

Presiden Kabui i tok gavman bilong em i givim luksave long ol sios long bikpela na gutpela wok ol i mekim long Bogenvil long longpela taim na gavman bilong em bai strongim moa yet wok patna namel long ol.

"Bilong luksave long wo we ol sios olsem Katolik, Yunaitet na Seven De i wokim, ABG bai strongim wok patna wantaim ol. Olsem na olgeta yia, ABG bai skelim sampela manimak i go long ol dispela sios long karimaut ol wok bilong ol long givim semis long helt, edukesen na ol arapela sosel, spiritual na developmen progrem na long rot we ol yet i laik karimaut ol wok progrem bilong ol," Mista Kabui i tok.

Em i no kolim hamas manimak we Otonomes Gavman i laik givim i go long ol sios.



• Ol Sande skul pikinini long Hahela Praimeri skul long Buka Piksa: VERONICA HATUTASI

Sanel Kolis bai selebretin 50 yias long Oktoba

SANEL Seminari Kolis insait long Is Nu Briten bai selebretim 50 aniveseri bilong em long mun Oktoba long dispela yia.

Dispela em long givim luksave i go long ol Sekret Hat Misinari husat i bin kirapim dispela kolis long yia 1955 na ol wok kamap long dispela taim inap i kam nau.

Ol i kirapim pinis wanpela komiti long go pas long ol wok redi bilong ol samting bai kamap long dispela de.

Dispela kolis i givim trening pinis long planti yangpela man long PNG na moa yet, long Niugini Aillans rijen long kamap olsem ol pater insait long las 50 yias na em i strongim

wok i go het yet.

Planti biknem bisop na pater we i karamapim tu ol dispela i dai pinis i bin kisim skul Sanel Kolis Ulapia.

Long dispela taim, kolis i wok long kisim ol yangpela sumatin husat i laik kamap pater bilong Bogenvil, Is na Wes Nu Briten, Nu Ailan na Manus Katolik Daiosis.

Bogenvil luksave long han bilong Bikpela

Veronica Hatutasi i raitim

BIKPELA luksave i bin go long Papa God long mekim na Bogenvil i gat nupela Otonomes Gavman bilong em.

Planti lida na pipel bilong Bogenvil i bin tokaut long han bilong Papa God yet we i no bin lusim tingting ol pipel long kra, pen, hevi na singaut bilong ol long taim bilong bikpela hevi i kam inap ol i kirapim nupela gavman we ol i kra long em long pinisim olgeta hevi, wari na kra bilong ol long planti yia.

Long seremoni bilong nupela Otonomes Bogenvil Gavman i kirapim tru wok bilong em las wik Trinde, Pasto Terry Mose taim em i wokim dedikesen preia i bin askim Papa God long givim gutpela tingting na stia na wanbel pasin i go long ol lida na pipel na ol i ken wok gut long go hetim nupela gavman bilong ol.

"Yu God bilong olgeta kantri na kirap na pondaun bilong ol. Yu givim gutpela tingting na save long ol lida. Taim ol rait lida i stap, kantri i save go gut tasol sapos nogat, ol i save pondaun.

Givim gutpela tingting na save long ol lida bilong Otonomes Bogenvil Gavman.

Inap yu stiaim ol pipel na ol lida na taim yu go pas long ol, Bogenvil bai i kamap gut. Mi pre long fridom, sekyurtii na pis o gutpela sindaun i ken stap oltaim long Bogenvil taim ol pipel na ABG lida i givim luksave na larim ol samting i stap long han bilong yu," Pasto Mose i bin tok.

Pasin bilong bel isi na lusim tingting long rong bilong wanpela narapela i narapela bikpela samting we Pasto Mose i bin pre long em long dispela bikpela de bioogn Bogenvil na pipel bilong em.

"Mi askim yu long lusim tingting long ol ol samting nogut mipela i bin wokim long ol yia bipo i kam inap nau. Kliarim tingting bilong mipela na mipela i ken stap gut wantaim ol arapela olsem ol trupela brata.

Tenkyu tu long PNG na lidasip bilong ol long helpim mipela long rot bilong painim gutpela sindaun na nupela gavman we mipela i amamas long em tude.

Mipela i purim ol lida i go long han bilong yu. Na mipela i tok tenkyu long harim ol preia bilong mipela," Pasto Mose i bin tok.



Tok ples em i bun...

NA Buk Baibel we ol i raitim long tok ples bilong yumi stret i stap long as bilong sanapim gutpela laip na pasin long en. Praim Minista Sir Michael Somare i bin go pas long opim wanpela nupela tok ples baibel bitong ol pipel bilong Agaun long Milen Be provins long wiken i go pinis.

Bikpela wok bilong tanim Niu Testamen bilong Buk Baibel i go long tok ples Daga em Sama Institut ov Lingwistik (SIL) yet i bin karimaut. Sir Michael i givim luksave long SIL long bikpela wok ol i mekim long tanim tok i go long ol tok ples bilong PNG yet.

Namba wan tanim tok bilong ol Daga pipel i bin kamap taim John Murane, wanpela man Amerika i bin go long hap namel long 1963 na 1974. Tasol tok ples i senis moa yet na Pasto Daniel Jesudason i bin mekim dispela tanim tok we ol i opim long Sarere. Murane na meri bilong em i bin kamap long Agaun long amamasim dispela bikpela de.

Kasowari Yunaitet Sios bai holim semina na dedikesen seremoni

OL bipo memba bilong Kasowari Yunaitet Sios long Lae insait long Morobe provins i kisim askim long stap insait long 4-pela de semina bai kamap long mun i kam. Long wankain taim tu, ol bai autim wanpela monument o het ston long makim 36 krismas bilong sios i stap na karimaut ol wok.

Semina o woksop bai stat long Julai 16 inap long de namba 19.

Long mun Mei yet, ol bin makim wanpela komiti long karimaut ol wok na plen long redi long dispela semina na dedikesen lotu. Vais Siaman bilong kongriksen Mathew Piruruho i go pas long dispela komiti.

Ol bikpela samting we semina bai lukluk long en em lonf visen bilong sios we em bin kamapim long taim em i kirap, sios long tude na sios long tumora.

Vatiken amamas long G8 grup rausim dinau

VATIKEN i wanbel long agrimen o pasim tok we ol bikipela kantri long wol i mekim long rausim K40 bilien (long mani bilong Amerika) dinau mani bilong ol kantri husat i nogat planti mani.

Tasol ol i tok bai i gutpela moa sapos ol i ken givim moa mani long sait bilong go hetim ol wok developmen.

Pontifiket Kaunsel bilong Jastis na Pis i tok kenselim ol dinau bilong ol turangu kantri em i namba wan long ol rot long kamapim gutpela bihain taim bilong ol kantri long wol we i nogat planti mani.

Long Jun 11, ol Fainens Minista bilong ol kantri we ol i kolim ol long G8 o Grup ov 8 em ol strongpela kantri long wol i bin bung long London na insait long dispela bung, ol bin wanbel long rausim dinau mani bilong top 18-pela turangu kantri long wol.

Ol kantri i stap long G8 o strongpela na ris kantri long wol em Amerika, Inglan,

Japan, Kanada, Rasia, Jemeni, Itali na Frans.

Eitinpela turangu kantri we planti i stap long Afrika bai stap insait long grup ol i kenselim ol dinau mani bilong ol. Plen bilong ol em long skruim dispela rausim dinau mani progrem i go long 20 moa turangu kantri sapos ol i givim ol wok mani ripot bilong ol.

Wanpela toktok i kam long Vatiken i tok amamas long ol ris kantri long rausim wanpela bikipela wari na hevi we ol turangu kantri i gat bikos dispela em wanpela samting we Katolik Sios i wok long toktok long em long planti yia i go pinis.

"Disisen long rausim o lus tingting bilong ol dispela kantri na plen long skruim i go long ol narapela em i kliapela mak long sanap strong namel long ol ris na ol developmen kantri," stetmen i tok.

Vatiken i tok i bikipela samting nau long yusim gut dispela mani i stap bihain long rausim ol dinau long bringim ol gutpela

semis olsem klinpela wara, helt na edukesen sevis i go long ol pipel.

Wanpela samting we Vatiken i no amamas long en em long ol ris kantri i no inap promis we ol bin mekim pastaim na dispela em long apim foren eit o helpim baset long 7 pesen mak bilong ol nesenel baset bilong ol.

"Ol bin wokim tok promis tasol ol dispela kantri i bin kisim liklik hap mani tasol. I gutpela long tupela progrem i wok wantaim," Vatiken i tok.

Olgeta kantri long Yurop i wanbel na tok long yia 2015, ol bai inapim tok promis bilong ol.

Vatiken Misin Nius Sevis em FIDE i autim tok amamas bilong em i go long ol G8 kantri long dispela hap nius tasol long wankain taim tu, em i tok ol i noken yusim mani long pait o baim ol samting bilong pait o long wok bilong Lokol Level Gavman. Tasol ol i mas yusim long sanapim ol haus sik na ol skul.

Ol Arab Kristen i ken kamapim bel isi na sekan pasin

LIKLIK lain Kristen grup long Israel i stap long narakain posisen long promotim bel isi na sekan pasin namel long ol lain Jew na Palestain long kantri tasol ol i laikim helpim bilong wokim dispela samting.

Wanpela Katolik pater long Melkite kongrikesen i bin tok olsem taim em i wokim wanpela wokabaut long Detroit, Amerika.

"Mi hop i gat sampela gutpela na strongpela Kristen manmeri husat bai tingim Kristen bilip na lotu i sanap strong yet long Holilen na i bikipela samting long liklik lain Muslim na ol kristen insait long Holilen bikos yumi ol Kristen i sanap makim maus bilong namel mak, Pater Elias Chacour husat i bin statim Mar Elias Edukesenel institute long Ibillin insait long Israel i tok.

Pater Chacour i bin stap long Michigan long kisim wanpela luksave olsem Doktoret long Ekumenokol Tiolojikel Institut long Detroit, Amerika. Em bin wok stap insait long ol fan resing wok long kamapim mani long skul bilong em.

Olsem ol skul we Katolik Sios i papa long ol long wol, skul bilong em i no kisim ol Katolik tasol em i kisim ol pikinini bilong ol arapela Kristen sios, Muslim na Jews. Skul i gat 4,500 sumatin.

"Mipela em namel maus tasol mipela i liklik lain tumas we i wok long toktok isi isi tru na i no go yet long yau bilong planti lain. Long ol dispela projek, bai ol i ken harim gut mipela long ol Muslim na Jews komyuniti," pater Chacour i tokim Michigan Katolik niuspela bilong Ditroit Asdaiosis.

Ol Lutheran Sios meri lida i bung

WANPELA konfrens bilong ol meri Bisop na presiden i kam long ol Lutheran Wol Federesen (LWF) memba sios i bin lukluk strong long lidasip long ol memba kantri na tu, long Lutheran sios long wol.

Bung i bin kamap las wik long jiniva, Swiselan na em i namba wan kain bung bilong ol LWF memba.

Jenerel Seketeri bilong LWF Reveren Dokta Ishmael Noko taim em i tok welkam long ol lain i sindaun long konferens i bin tok dispela em i wanpela bung long histri bilong sios na em i mas karim kaikai.

Em bin tok long 1994 bung bilong ol sios lida bilong LWF, tripela meri bisop tasol i bin stap insait long em na moa long 114 LWF memba i

bin salim ol lain long dispela bung.

Em bin tok insait long dispela bung, bikipela samting i wok long kamap we ol meri sios lida i makim 9-pela kantri i bin bung long toktok long ol samting we ol i save gat bikipela tingting long em.

Em long lidasip na gutpela trening i sut long kamapim gut wok bilong ol na ol lidasip modul we bai helpim ol i etresim ol salens ol i bungim olsem ol lida long ol wna wan kantri bilong ol.

Taim em i prisenim ripot "Velu beis Lidasip," Dairekta bilong Misins na Developmen (DMD), Reveren Dokta Kjell Nordstokke i bin tok ol meri lida i save kamap ol gutpela rol modul.



• Ol Lutheran Sios meri lida i bung



• Wanpela meri sios lida i toktok. Ol Foto: LWF

Biknem Kadinel bilong Filipins i dai

BIKNEM lida bilong Katolik Sios long Filipins i dai long dispela wik.

Cardinal Jaime Sin i bin gat 79 krismas na em bin sik longpela taim nai i dai long Tunde Jun 21. Kadinel Sin i bin go pas long "People Power" o pipel i mas holim pawa muvmen we i bin rausim tupela presiden bilong Filipins.

Kadinel Sin i bin sik long planti yia wana-taitaim hevi long kidni.

Dispela i bin mekim na em bin ritaia hariap bikos em i mas lukim ol Dokta olgeta taim long kisim marasin.

Em bin stap olsem Asbisop bilong Manila taim sik i mekim na em i ritaia long yia 2003.

Sik i bin wokim tu na em i no bin stap long ileksen bilong nupela hetman bilong Katolik Sios Pop Benedict 16.

• Wanpela man i putim flawa klostu long poto bilong leit Kadinel Sin katitrel long Manila long soim luksave long blkman.



ELC/Papua Distrik skruim HIV/AIDS wok

Paulus Tali i raitim

OL lain husat i go pas long pait egensim sik HIV/AIDS i amamas long Lutheran Sios i karimaut ol wok aweanes insait long komyuniti long daunim dispela sik.

Hetman bilong Nesenel AIDS Kaunsel Dokta Ninkama Moya i tok em i amamas long lukim Lutheran Sios i go insait long pait egensim HIV/AIDS bikos dispela sik i kilim planti manmeri long kantri.

Em i tok olsem na Helt dipatmen laik bai yumi olgeta mas wok bung long karim aut kain progrem olsem long daunim dispela sik.

Em bin wokim dispela toktok taim em i sindaun long wanpela bikipela bung las wik Sande we 26 yut i bin greduet long tupela wik trening bilong ol "Pia" eduketa bilong ELC/PNG Papua Rijen.

Wan wan kongrikesen long Papua Distrik Lutheran Sios i bin salim ol lain bilong ol long sindaun long dispela kos.

Moa long 500 Kristen bilong Koki Lutheran kongrisen yet na sampela ol arapela yangpela long Nesenel Kapitel Distrik tu i bin kamap long lukim greduesen. Het tok bilong woksap, em FIGHTING THE MONSTER WITH CHRISTANS, o pait daunim kain kain sik wantaim ol Kristen manmeri.

Long wankain taim taim tu em dispela em i namba wan taim long Papua Lutheran distrik i go het long kain progrem olsem, bihanim tok bilong het bisop bilong ELC PNG, Dokta Wesley Kigasung husat i bin tok Papua distrik i mas go het mekim sampela senis progrem long distrik na em nau ol yut bilong distrik, go het long HIV/AIDS.

Bipo Gavana bilong Isten Hailans provins, Peti Lafanama, husat i go pas long Tok Pisin kongrikesen i bin helpim long painim helpim mani long Yuropien Yunien (EU) we i bin givim K18, 000, aninit long progrem bilong ol long yunien seksual progrem bilong ol.

Bikipela spika long dispela taim em Mosbi Saut em Dame Carol Kidu. Em bin givim wanpela tok piksa we i makim liklik boi na meri bihainim het tok, bilong dispela progrem na tok i no gutpela long bihainim kastom na marit hariap na bungim ol kain hevi olsem. Em bin tok yumi lusim kastom yumi bai tingim haus kra.

Long wan kain taim Helt Minista, Melchior Pep husat i bin sapatim tru progrem Luteransios hia long Papua Distrik i kirapim long en.

30,000 sumating bai sindaun long tes

KLOSTU long 30,000 Gret 10 sumatin long 200 provinsel hai na sekonderi skul insait long kantri bai sindaun tude long Riten Ekspresen tes bilong ol.

Ekting Edukesen Seketeri Joseph Pagelio i askim strong ol skul long kodl-entim na supavaisim gut ol wok long dispela taim.

Dokta Pagelio i tok dispela tes em i wanpela bikpela samting bikos ol i save kaunim 30 pesen mak long dispela i go long fainol Inglis tes mak bilong ol sumatin

long pinis bilong yia.

Olsem na em i askim ol papamama long givim gutpela sapat long helpim ol pikinini i redi long dispela tes bilong ol.

Riten Ekspresen Skul Setifiket Eksam tes em i hap long stendet asesmen na kwalifikesen sistem ol skul i yusim long helpim kwaliti bilong ol samting ol i lainim na tising long nesenel skul sistem.

Olgeta yia, ol i save glasim ol sumatin long save bilong ol long akademik sait na

ksim ol long neks level bilong edukesen .

Dokta Pagelio i tok tu olsem skul asesmen em i bikpela samting long taim bilong painim wok na ol bikman bilong ol kampani i glasim na skelim ol long wokim disisen husag bai ol i kisim long wok.

Dokta Pagelio i makim Edukesen Dipatmen na askim ol sumatin long traim hat stret na wokim gut long dispela tes.

Moa long 29,600 i sindaun long dispela tes long olgeta hap bilong PNG.

Nius Bilong HIV AIDS

wantaim David Ephraim



LONG dispela wik bai yumi lukluk i go insait long wok bilong Nesene Aids Kaunsol long kirap bilong HIV/AIDS.

Nesenel AIDS Kaunsol (NAC) wantaim helpim bilong Nesinol HIV/AIDS supot projek (AusAID) i wok long ronim planti woksop, na fandim planti NGO long wokim awenes long Mosbi na na long ol narapela provins wantaim.

Tasol watpo na planti manmeri i wok long kisim yet binatang bilong HIV/AIDS? Ol kain askim i save kamap strong yet long tingting bilong planti manmeri.

Olsem long olgeta mun NAC i save ronim ol woksop olsem Besik HIV/AIDS woksop, pasin bilong manmeri woksop, na ol kainakin woksop wantaim long Mosbi yet i luk olsem ol sampela manmeri tasol i save sindaun long dispela woksop.

Planti ol dispela lain i no save wokim wok bilong ol stret long go aut long komyuniti na sanapim ol rot we ol manmeri i ken bihainim long abrusim HIV/AIDS hevi.

Nau yet i luk olsem planti aweanes i wok long kamap tasol HIV/AIDS i go bikpela yet. Long lukluk bilong mi em taim nau long wanwan manmeri long senisim pasin bilong ol.

Senisim pasin em i hat moa tasol em wanwan rait bilong yumi wanwan.

Mi singaut long yu long luksave long dispela birua na yu mas gat wanpela patna tasol em mas meri o man bilong yu na ol yangpela plis traim kontrolim yu yet inap yu marit na long ol lain husat i save i gat planti meri na man o yangpela husat i wok long slip wantaim ol patna bilong ol tingim gut laip bilong yu na senisim pasin o traim yusim karamap long taim bilong slip wantaim.

HIV/AIDS stap pinis, yu na em nau.

Tok Lukaut

Populesen bilong kantri bilong yumi em wok long go bikpela tumas. Nau Gavman i no kamapim sampela rot bilong kontrolim na menesim populesen. Insait long dispela yet i nogat inap risos na sevis long helpim olgeta lain.

Edukesen system in helpim tumas pipel bilong yumi. Olgeta yia moa olsem 80,000 yangpela i save kamaut long dispela system.

Planti taim planti i no save painim wok bikos ol kampani o gavman i nogat inap wok i stap.

Planti i save kamap olsem wokboi o planti i wok long stil na pasin bilong salim bodi long mani na dispela hevi i no senisim tingting yet bilong Gavman long wokim o kamapim sampela rot bilong helpim pipel.

Long kamap bilong HIV/AIDS olgeta dei moa long 5 i go long 8 manmeri i save dai. Planti save dai long wari tumas.

Long stretim ol dispela kain hevi yumi olgeta manmeri husat i gat ol gutpela ol tingting long helpim strongim kantri mas wok bung wantaim long helpim strongim kantri.

Taim yumi kamap wantaim rot na toktok wantaim narapela long helpim long strongim tingting em nau bai yumi lukim senis i kamap.

HIV/AIDS stap pinis mi nidim yu na yu tu wankain.

Wari long ol tisa i no gat gutpela kwalifikesen

Veronica Hatutasi i raitim

I GAT wari olsem akademik stendet o mak bilong ol sumatin long ol sabjek ol i lainim olsem Inglis, Mets, Saiens na ol arapela long Bogenvil i wok long go daun.

Na askim i go long ol Edukesen Atoriti long Bogenvil long lukluk gut long ol greduet

bilong Yunivesiti ov PNG na Yunitek na ol narapela teseri institusen we ol i kisim ol long mekim wok tisa long ol hai na sekonderi skul long ailan bikos planti bilong ol i no mekim gut wok.

Dispela wari i no sut long ol tisa i greduet long Yunivesiti ov Goroka na ol arapela Tisa kolis.

Pauline Kebonu em i wanpela sinia tisa long Bana provinse Hai skul long Saut Bogenvil i autim dispela wari.

Em i tok planti long ol yunivesiti greduet i no skul long ol sabjek na ol i save putim ol nating long skulim ol sumatin long ol wan wan sabjek we ol i nogat gutpela save long ol. Moa yet, sampela bilong ol i no save stap tumas long klasrum na wokim wok long taim bilong skul.

Em i tok em i nogat bel hevi long ol dispela yuni greduet tasol em i laikim bai ol Bogenvil skul i mas go bek long gutpela level ol bin stap long em bipo long hevi i kamap na planti pikinini i ken kisim gutpela save na skruim skul bilong ol o ol i go long ol teseri institusen.

Em i tok ol dispela tisa i mas gat komitmen o putim strongpela tingting long mekim gut wok bilong ol.

Long wankain taim, moa pikinini long Bogenvil i go nau long skul tasol tupela hevi i stap long ples kila we i kamapim wari long ol atoriti, ol papamama na komyuniti.

Em long pasin bilong

ol pikinini long skul i senis wantaim tu skul i hevi.

Pauline Kebonu em i wanpela sinia tisa long Bana Provinse Hai skul i tok.

Bana Provinse Hai skul em i nupela skul tasol we i bin op long 1999 na 6-pela yia bihain, em i gat 400 sumatin. Tasol em i kamap olsem wanpela gutpela skul bikos insait long las tripela yia, ol Gret 10 sumatin bilong em i wok long mekim gut tru na ol i wok long kamap ol top sumatin long olgeta skul pikinini long Bogenvil. Skul i gat 14 tisa long dispela yia.



• Ol liklik bel i slek na ol i mas pulumapim tu ya! Ol liklik Elementeri skul i baim ol kaikai samting long ol mama long Vunamami skul kentin.

Piksa: CIMC

OL EBC pasto sainim MOU long kisim agrikalsa trening

James Kila i raitim

TUPELA lain Westen Hailans long las tupela wik i go pinis i bin sainim wanpela Memorandum of Agrimen (MOA) wantaim wanpela grup bilong ol lain pasto bilong Evanjelikel Bratahud Sios long Banz bilong karimaut trening long wok bilong kopi bisnis. Nem bilong dispela grup bilong ol EBC pasto en Kin Yewandil Kopi Groas grup na wan wan bilong ol memba bilong grup em ol pasto husat i save karimaut wok bilong autim Gutnius bilong Papa God insait long Banz seket bilong EBC.

Ol lain bilong givim trening em Gregory Kamp na wanpela teknikel trena bilong Faundeses bilong Rurel Developmen (FORD) nem bilong em Henrias Pu'u. Insait long dispela MOA, Kamp bai givim trening long sait bilong kamapim kopi long

painim gutpela maket bilong salim, trenim long was long ol sik na binatang long kopi na skul long stretim kopi masin na ol narapela samting we ol fama i save yusim long kopi bisnis.

Pu'u husat i makim FORD em wanpela ogenaiesen i save givim gutpela skul long ol rurel manmeri insait long Westen Hailans na PNG bai givim trening na skul long sait bilong kisim ol liklik mani na rot bilong raitim ol projek proposel i go long ol dona ejensi long kisim helpim. FORD bai givim skul tu long sait bilong buk kiping o lukautim ol fainensol ripot long sait bilong iekonomik bilong prodaksen.

Ol lain bilong Kin Yewandil i save wok hat long sait bilong wan wna kopi projek bilong ol na i bung wantaim long lukluk i go insait long hevi bilong wan wan famili bilong ol long sait

bilong sosel na iekonomik developmen.

Ol lain bilong Kin Yewandil i save stap long Pastoro o Kisap samting olsem 5-kilomita not is long Banz taur.

Wanpela het pasto i tok ol sios memba i luksave olsem sapos pasin bilong wok long helpim spirit na tu, sait bilong bodi na ol wok insait long helpim sindaun long komyuniti bai kamap gut.

Dispela Kin Yewandil grup i bin kamap sampela yia i go pinis na ol memba yet i wok hat long wan wan kopi projek bilong ol na bungim mani long kamap wantaim K24,000 olsem kontribusen i kamap long wan wan memba. Dispela mani i stap long pasbuk akaun bilong ol long helpim ol long karimaut ol liklik projek bilong ol.

Long las yia, Kopi Industri Koporesen aninit long Rises na Groas Sevis Divisen (R&GA) long Hagen i bin karimaut wanpela wok painimaut na kamap wantaim wanpela ripot bilong dispela grup na i amamas long traim aut wanpela projek long helpim ol. Ol i glasim olsem dispela grup em i gutpela grup. Olsem na ol i putim dispela ripot bilong ol i go long wanpela Patisipetori Rurel Apreisol na ol wokman bilong CIC long Hailans rijon i karimaut dispela long skelim wanem ol hevi ol dispela lain bilong Kin Yewandil i gat na wanem samting i nidim long sapatim wok bisnis bilong ol insair long komyuniti long helpim gutpela sindaun.



• Ol EBC pasto i sanap kisim piksa wantaim ol sevis provida.

Yut bai kisim helpim long Mosbi Ats Tieta

MOSBI Ats Tieta (MAT) long Pot Mosbi bai lonsim wanpela at progem long dispela yia bilong strongim ol yut.

MAT bai lonsim dispela progem long mun Septemba we ol i kolim "Pride" na ol i wokim bai em i ken helpim ol yut long edukesen na awenes long sindaun bilong ol insait long komyuniti.

MAT i gat bilip olsem sapos ol i yusim ol samting bilong at olsem musik, drama o ekt, visuol ats olsem droim na penim ol piksa na danis na bungim dispela wantaim ol kalsa na tumbuna pasin bilong wanwan komyuniti insait long Pot Mosbi bai ol i ken helpim ol yut wantaim awenes bilong ol samting na tu long sait bilong edukesen.

Dispela progem i makim ol sumatin bilong ekspresif ats husat i mekim gred 9 na 10 long ol skul bai ol i ken wokbung na save long ol yut bilong ol narapela skul long wankain samting.

Dispela progem bai go insait tu long dispela skul bilong ekspresif ats long ol skul husat i laik stap insait long en na bai i kamap olgeta yia.

MAT i laikim bai dispela progem i ken soim rot long ol narapela NGO olsem em yet long traime na helpim ol lain insait long komyuniti we i nogat planti samting i save go long ol olsem ol yut bai ol i ken i gat sans long givim han long ol samting i save kamap insait long komyuniti bilong ol.

Long progem ya bai i lukim ol sumatin i go long Mosbi Ats Tieta wanpela taim long olgeta wik.

Ol bai kisim skul long lukim ol samting long TV, ol wokman long tieta bai toktok long ol na ol bai kisim ol samting bilong skul i go wantaim ol long haus.

Ol bai lukim tu ol lokal tieta grup i soim ol long rot bilong mekim ol so.

As tingting bilong dispela em long strongim tingting bilong ol sumatin bai ol i noken

sem na tu long bungim ol narapela wanlain bilong ol long ol arapela skul.

Sampela ol bikpela samting ol bai toktok long en long ol dispela bung em sik HIV/AIDS, rait bilong ol meri na strong bilong envaironmen o bus, graun na wara.

PM kisim ripot bilong gavman infomesen sistem

GUTPELA infomesen sevis sistem bai inap long helpim wok bilong gavman taim ol i laik tokaut long ol pien bilong ol.

Praim Minsta na minista bilong Stet Enteprais na Infomese, Sir Michael Somare i mekim dispela toktok long dispela wik.

"Ol gavman i save wok gut moa sapos i gat inap infomesen i stap," Sir Michael i tok.

Sir Michael i mekim dispela ol toktok taim em i kisim ripot bilong wanpela fisibiliti stadi o wok glasim long wanpela Integretet Gavman Infomesen Sistem (IGIS) long Software

Alliance (PNG) na wanwok bilong en Heitech Padu Bernhard bilong Malaysia.

Dispela stadi we i ron inap tripela wik na i stat long Jun 2 long displa yia yet i lukluk long yusim Infomesen Kompyuta Teknoloji (ICT) insait long pablik sevis na tu long streim IGIS bai i ken stap insait long ol wok ples.

Displa ripot bai tokaut long gavman long wanem kain bai i gutpela long gavman i kisim na bihainim we bai inap long han na risos bilong ol na long wankain taim bai inap long kisim ol gutpela sevis na infomesen i go aut long ol kain eria olsem helt, dike-

sen, agrikalisa, imigresen o wok-about bilong ol pipel long wanpela ples i go long ol narapela, sivil rejistresen na komon rol rejistresen.

Sir Michael i tok dispela ripot i soim stat bilong dispela projek.

"Yumi gat longpela rot long i go yet," em i tok.

IGIS em i wanpela we bilong gavman long yusim nupela teknoloji o save long kisim ol gutpela gavman sevis na infomesen i go long ol pipel we bai inap long givim moa sans long ol long kisim planti moa gutpela sevis bilong gavman.

Maski tok giaman

MEMBA bilong palamen na siaman bilong Nesenel Kapitel Distrik Komisnin (NCDC) bod Sir Mekere Morauta i bekim toktok bilong memba bilong Pot Mosbi Not Is Caspar Wollom husat i mekim sampela sut toktok long makim bilong Peter Loko olsem nupela siti menesa.

Sir Mekere i tok ol toktok bilong Mista Wollom i no stret na i nogat wanpela gutpela as long en.

"Ol toktok bilong Caspar i no bagarapim nem bilong mi na Mista Loko tasol. Em ol giaman tok-tok tu ya," Sir Mekere i tok.

"Mi yet i no makim Mr Loko i go long dispela posisen, kabinet i makim em," em i tok.

"Casper i save gut tru olsem kabinet i makim wanpela biknem kampani bilong kisim ol man long wok long soim dispela posisen na tu painim ol man na kisim stori bilong ol.

"Peter Loko i bin kamap namba wan long olgeta man i stap long pepa we dispela kampani i salim i kam long NCDC na long Pablik Sevis Komisnin," Sir Mekere i tok.

Em i tok olgeta manmeri long PNG i mas amamas olsem makim bilong mista Loko, long wanem ol minista long palamen i bihainim stret rot bilong makim man i go long dispela kain posisen olsem lo i tok.

"Peter Loko em i no memba bilong PNG pati olsem Mista Wollom i tok na mi save na bilip olsem em i no memba bilong wanpela politikel pati.

"Mi ken tok olsem mi yet i no bin bungim Mista Loko wanpela taim long laip bilong mi inap em i kamap long intavyu we ol narapela komisina bilong NCD olsem Sir William Skate, Davd conn, Michael Malabag na siaman bilong Motu-Koitabu kaunsil.

"Bihain long nambawan taim mipela i bung, mi i no bin bungim em gen inap long taim em i stat wok long Siti Hol," Sir Mekere i tok.



PNG GAN KIBUNG (SAMIT)

Mande Julai 4 - FRAIDE Julai 8, 2005
YUNIVESITI OV GOROKA

Intenel Sekyuriti Minista Hon. Bire Kimisopa bai holim PNG Gan Kibung long Yunivesiti bilong Goroka, Isten Hailans provins long Mande Julai 4 i go inap long Fraide Julai 8.

Praim Minista Rait Hon. Sir Michael Somare bai opim kibung.

Long dispela kibung Gans Kontrol Komiti bai tokaut long ol wok painimaut bilong Rot So.

Long dispela Kibung aninit long Hon. Bire Kimisopa Komiti bai redim ol polisi na ol toktok we em bai givim long Nesenel Eksekyutiv Kaunsel long kamapim sampela wok long em.

Husat i gat laik na i laik kamap long dispela Kibung i mas toksave long dispela ol lain:

GANS KOMITI

Siaman

Mesa Jenerol Jerry Singirok, MBE (Rtrd)
Email: jsingirok@hotmail.com
Mobile: 686 5343

Deputi Siaman

Sir Barry Holloway
bholloway@online.com.pg
Mobile: 682 8934

GAN SEKETERIAT

Mr Mathew Nelson
Eksekyutiv Opisa
Ph/Feks: 311 2141
Email: pnggunscon@global.net.pg

NRI SEKETERIAT

Mrs Loa George
Ph: 326 0300
Email: nri@global.net.pg

Jenerol Korespondens


PNG GANS KONTROL KOMITI
P.O. Box 1270
Boroko
NCD
Papua Niugini
Ph/Feks: 311 2141
Email: pnggunscon@global.com.pg

Atoriti i kam long

Mesa Jenerol Jerry Singirok, MBE (Rtd)
Siaman



Australian Government
AusAID



Salim ol pas i kam long WANTOK NUSPEPA: P.O. Box 1982, Boroko N.C.D 111 Fax: 325 2579 Email: word@global.net.pg

Senisim lida klostu klostu i no gutpela

Dia Edita

Mi wanpela rida bilong Wantok Niuspepa na mi save laik tru long ritim ol pas. Nau mi gat wanpela wari mi laik autim long ol pipel bilong Sauten Hailans provins.

Wanpela wari bilong mi go olsem. Bilong wanem tru na yumi makim ol 9-pela memba bilong yumi long Sauten Hailans? Long karim sevis na developmen i kam long provins.

Taim yumi senisim ol memba bilong yumi klostu klostu, em yumi bagarapim ol sevis na developmen tu wantaim.

Wanpela memba i staitim sevis, narapela memba i no inap long pinisim. Olsem na moabeta yumi larim ol i mas stap 10 i go inap 15 yia samting na bai yumi lukluk gut long wok bilong ol.

Olsem na taim yumi senisim ol memba, ol sevis na developmen tu i senis na pipel i bagarap olgeta. Mipela i no kisim ol gutpela sevis na developmen, em asua bilong yumi yet.

**PAUL EYO TUBIRI
MENDI
SAUTEN HAILANS
PROVINS**

Pamuk pasin stap long olgeta hap long wol

Dia Edita

Mi LAIK bekim belkros bilong Petrus Mondo i bin kamap long Wantok Niuspepa, Mi lukim dispela toktok bilong yu i no stret. Bilong wanem yu nogat rait long sigalim ol meri. Petrus Mondo yu marit man yu i mas stiarim meri bilong yu o pikinini meri bilong yu. Yu tok olsem ol meri Hailans i save mekim pasin pamuk.

Dispela pasin pamuk em wanpela kain pilai bilong olgeta insait long PNG na long wol. Mista Mondo yu nogat rait long sigalim ol meri Hailans. Olgeta meri bilong Papua Niugini wankain. Ol i save pamuk na painim mani na kaikai. Sapos yu man tru, noken mekim dispela kain tok. Em tasol bekim bilong mi long pas bilong Mondo.

**TILA POPPY
KAINANTU
SAUTEN HAILANS
PROVINS**

I nogat gutpela sevis long Menyamya ilektoret

Dia Edita

Mi WANPELA Langs Meto i stap long Lae. Mi i go long Aseki na Menyamya na i nogat gutpela sevis na developmen insait long ilektoret. Kainkain gavman divisen haus na rot na arapela samting i nogat gutpela mentenens. Haus bilong ol dokta long Aseki Helt Senta i nogat gutpela mentenens na ol wokman i stap long ol haus nogut. Dispela i no stret na tu inogat gutpela sevis i go long ol manmeri long ples insait long ilektoret. Mi laik save i gat Memba bilong Menyamya i stap o nogat? Sapos i gat memba i stap, bai i gat senis bilong sevis insait long ples na Aseki, Menyamya stesin bai senis long developmen. Mi laik givim strongpela tok long pipel bilong Aseki na Menyamya 2007 ileksen tingim gut na makim man we inap long bringim sevis insait long ples na ilektoret. I no ken pasim ai na makim man long wantok system, tingim komyuniti sevis em bikpela samting na pesenol sevis i no gutpela. I no ken tingim long pesenol sevis na makim man nating nating. Yumi Anga pipel i stap long las long sevis insait long provins olsem na tingim gut na makim man long 2007. Gutpela lidasip i stap, ilektoret bai senis, i nogat gutpela lidasip na yumi i stap yet long taim bipo. Em tasol yu husat i laik sapotim o agensim mi amamas tasol.

**ERIC WONEX
LAE
MORBE PROVINS**

Yupela paiawut bilong hell

Dia Edita

Mi LAIK bekim dispela pas i go long Peter Kelo wei i bin kamap long Me 5/5/05.

Yes brata Peter yu bin tok olsem, nem bilong yu i stap long buk bilong laip pinis nau. Hau yu save olsem nem bilong yu i stap long buk bilong laip?

Yu kamap rait wantaim God long wanem rot tru? Bikos Rom 8:9 em i tok man nogat spirit bilong

Krais em i no bilong Krais. Jon 15:16 em tu i tok yupela i no bin makim mi bilong i stap wantaim yupela. Nogat. Mi makim yupela bilong i stap ol lain bilong mi.


Dispela tok bilong God Rev. 20:15 i no tok nem bilong Peter Kelo i stap long buk bilong laip, nogat.

Em i tok olgeta manmeri nem bilong ol i no stap long buk bilong laip ol bai tromoi ol long paia na bai

yupela i kamap paiawut bilong hell. Noken rausim tok bilong God Rev 22:18 larim tok bilong God i stap stret olsem God yet i tok.

Nogut yu adim na rausim tok bilong God bai God i mekim wankain long yu. Em tasol na God blesim yu.

**DANIEL WESLY
KIMBE
WES NU BRITEN
PROVINS**



Toksave: Sampela ol pas mipela i kisim i longpela tumas na i no givim spes long ol arapela pas, plis raitim pas liklik. Na tu putim nem na adres bilong yu long olgeta pas yu salim i kam, tenkyu. - Edita

Kondom stap na pasin pamuk i go het

Dia Edita

Mi LAIK sapotim toktok bilong Roman Mawen long HIV/AIDS awenes. Tru mi tu mi i no wanbel long HIV/AIDS komiti long tokaut long ol kainkain kondom na givim bikpela tingting long kamapim sikirap long slip wantaim planti tru.

Bilong wanem na mi tok olsem, ol man i no pret long sik AIDS bikos ol save olsem kondom i stap. Ol i kisim tasol long liklik mani na pamuk i go het na

sikirap long slip wantaim i go bikpela moa tru.

Kondom stap na pasin pamuk i go het na kamap bikpela tru. Planti marit meri i pamuk bai man bilong ol i save? Kondom stap na em i no kisim bel.

Planti ol pikinini meri bilong ol i liklik yet i stat wokim dispela kain pasin long wanem ol i yusim kondom.

Long dispela as tasol, mi laikim yupela stopim kondom long stua na faktori tu.

Sapos nogat, yupela salim kondom long bikpela mani tru.

Inap olsem K200 samting. Dispela bai mekim mipela pret long sik HIV/AIDS.

Sapos ol i go het long slip wantaim yet em sait bilong ol, bikhet bilong ol, pawa bilong skelim ol samting i stap long han bilong mipela yet. Em tasol.

**DICKSON PAPOL
BOROKO
NCD**

I nogat rot bilong daunim sik HIV/AIDS

Dia Edita

Mi WANPELA manki long ples na mi sapotim tok bilong brata Charlie Kaogo. Mi tok nogat wanpela marasin bilong sik HIV/AIDS i stap. Dispela sik em i kam long plen bilong Bikman.

Em wanpela hevi i kam long dispela graun. Olgeta bilip manmeri bilong dispela kantri yumi olgeta prea long Papa God. God wanpela tasol em bai stretim dispela sik. Yumi bai sutim tok long

Gavman i wokim rot long daunim dispela sik tasol em bai nonap long wokim wanpela rot long daunim dispela sik.

Papa God wanpela tasol em i as bilong olgeta samting. Mi laik sapot tasol bilong pas bilong brata Charlie Kaogo.

**TASUA SPARKS GOMO
TAMBUI
WESTEN HAILANS PROVINS**

Noken bagarapim Yawari

Dia Edita

Mi BILONG liklik ples Kendagl insait long lalibu distrik. Mi agensim wanpela wari bilong Mista Stanley Kewa i kamaut long Wantok Niuspepa long 19/05/05.

Mi laik autim kros bilong mi go long Mista Kewa olsem yu mas paul tru na raitim dispela kain pas.

Yu tok olsem sevis o developmen i no go long ol dispela distrik Imbonggu, lalibu, Pangia na Kagua-Erave.

Mi laik askim yu olsem, hamas vot yu wantaim ol dispela distrik i givim long Hami Yawari?

Na tu mi laik askim yu olsem tru tru yu ting Yawari i no givim wanpela sevis o developmen long ol dispela distrik?

Ating mama karim yu aste tasol ya o yu mas stap long narapela planet na kamaut aste tasol ya. Ol man inap long paul na mekim kainkain toktok long Gavana.

Mi wanpela manki i save gut tru long wok bilong Hami Yawari na mi save amamas nogut tru long wok bilong em. Mi lukim na harim olsem planti bikpela bikpela sevis i kamap long ol distrik we i givim vot na i no givim long em.

Wankain pasin i save kamap long olgeta distrik bilong Sauten Hailans provins na mi gat bilip long Yawari olsem em i tru tru papa bilong Sauten Hailans.

Mista Kewa yu tok olsem Imbonggu, lalibu, Pangia na Kagua-Erave em birua ples bilong Yawari.

Plis, gutpela brata bilong mi yu noken hatim bel na tok olsem. Tru tru mi save olsem Yawari i save kamapim bel isi long olgeta ples na pipel bilong Sauten Hailans provins.

Mista Kewa yu traime na skelim bipo ol gavana bilong Sauten Hailans provins i save givim sevis o developmen long olgeta distrik o nogat?

Yu pikinini man, orait yu mas skelim gut olgeta samting bai i kamap tumora na wanem samting i wok long kamap nau na ol wanem samting i bin kamap bipo.

Hami Yawari em trupela eksen man na papa tru bilong Sauten Hailans provins bikos mi lukim laip wan stret em i stretim wari na klinim ai wara bilong Sauten Hailans provins pipel.

Taim Hami Yawari i kamap Gavana ol pipel i wok long bagarapim nem na wok bilong em long ol *nuspepa*.

Lukim na harim i go i go na belhat nogut tru na nau mi autim kros bilong mi.

Em tasol na ol pipel bilong Sauten Hailans yupela i noken bagarapim nem na wok bilong Hami Yawari gen.

**DANIEL MANDIKERA
IALIBU
SAUTEN HAILANS PROVINS**

Agensim Tewae-Siassi Memba

Dia Edita

Mi WANPELA boi bilong Tewae-Siassi eria bilong Morobe provins. Mi kisim maus na tingting bilong planti mamapapa bilong dispela eria na askim olpela memba Mao Zemming long lusim tingting long kot kes na go bek long ples.

Mipela harim olsem em i apil gen long kot na mipela olgeta pipel bilong Tewae-Siassi i tok Mao Zemming yu westim taim bilong yu yet na bilong ol pipel tu. Nau yet mipela bai lukluk gut long gutpela na save man long nupela ileksen long 2007. Sapos yu man tru o papa tru tru bai yu tingting olgeta pasin yu mekim pinis ya na sem long en. Mi bai amamas na wet tasol long lukim bekim bilong pas i kam long olpela memba yet ol wok manmeri bilong em. Na tu yu husat sapot o i no sapot rait tasol na mi lukim.

**SULU MENDEP
LAE
MORBE PROVINS**



WANTOK
KOMENTRI

Glasim gut as bilong ol sut toktok

OLGETA yia taim bikpela haus tambaran bilong yumi long Nesenel Palamen i save sindaun long paitim toktok long ol bikpela samting insait long kantri, i save gat wan wan samting we gavman na oposisen i save bihainim.

I kam inap tete, gavman na oposisen i save painim rot long bagarapim ol yet. Taim Palamen i bin sindaun long namba tu wik bilong em long dispela mun, oposisen i bin tromoi bikpela sut toktok long gavman na Praim Minista Sir Michael Somare.

Dispela i kirapim bikpela bel kros long sait bilong gavman na Sir Michael yet i bekim ol dispela sut toktok na tok klia olsem nogat wanpela famili bilong em i bin kisim halivim long gavman bilong PNG, na ol i save wok hat long strongim ol yet - wankain olsem olgeta arapela PNG manmeri.

Tasol bikpela toktok long dispela wik i no long ol dispela sut toktok. Nogat. Bikpela samting i kamap insait long Palamen em long sait bilong Spika bilong Nesenel Palamen Spika Jeffrey Nape.

Taim Gavana bilong Milen Be, Tim Neville i sanap long askim Praim Minista long wanem as tru na gavman i senisim ol bod memba bilong Independen Pablik Bisnis Koporesen (IPBC), Spika i daunim em na tok em i wok long kolim nem bilong ol man. Em i tru olsem pasin bilong kolim nem na sutim tok long ol man insait long Palamen i no bihainim lo bilong Palamen.

Tasol Mista Neville yet i tok em i no bin asua. Mipela olgeta i luksave long wok bilong Spika olsem em i mas lukautim gut Palamen na was long ol memba bai ol i noken bagarapim nating nem bilong ol manmeri i no stap long givim bekim.

Tasol bikpela askim nau i kamap long wanem as tru na spika i no lusim gavana bilong Milen Be, husat em i wanpela memba bilong palamen long pinisim gut ol askim bilong em.

Long wankain taim, pipel i laik save long wanem as tru na spika i tok Mista Neville i wok long kolim nem bilong ol manmeri. Pipel bilong Papua Niugini i bin lukim Mista Neville i toktok long TV, na em i no kolim nem bilong wanpela manmeri.

Na bihain long en, ol bai askim. Long wanem as tru na Spika i no laikim oposisen long tromoi ol askim i go long gavman.

Mista Nape i givim bekim olsem em i pasim palamen long wanem em i belo taim. Tru tumas, ol memba em ol man tu.

Na i tru ating sampela long ol askim bilong oposisen em praime minista i bin bekim pinis bipo.

Tasol long ol yia i go pinis, taim i gat wanpela bikpela samting i kamap insait long palamen, spika i gat pawa long givim wankain sans long gavman na oposisen long tromoi ol askim.

Sapos spika i bihainim na sapotim tasol gavman, bai ol pipel i save long ol asua bilong gavman olsem wanem?

Narapela stori long dispela we ol manmeri bilong kantri i mas tingim em taim bilong ileksen i wok long kamap klostu na dispela kain pasin bilong tromoi ol sut toktok i go kam bai kamap bikpela moa.

Sapos Spika bilong Palamen i no inap long mekim, mipela wan wan manmeri i mas skelim gut toktok na as tingting bilong ol toktok bilong wan wan memba insait long palamen.

Na tingim - ol memba i ken pasim palamen long go kaikai. Tasol yumi ol manmeri i no inap long rausim memba bihain long mipela yet i makim ol. Sapos mipela i no tingting na mekim stretpela wok, mipela bai stap hangere narapela 5-pela yia gen.

Sampela tingting stap long brif kes bilong Lida

LONG olgeta hap bilong kantri, insait long bus, maunten na ol ailan i gat planti yangpela pipel i wok long tanim laip bilong ol i go long pasin bilong dring hom bru, smukim spak brus na yusim gan long poretim na kilim ol pipel.


Dispela em i bikpela hevi nau long kantri. Ating wanpela distrik o ples o taun bipo em gutpela ples na ples bilong kristen pasin na lotu bung i nau senis na kamap ples bilong kain kain trabel.

Kain olsem long Finschafen long yia 1970 na kam antap, i nogat pasin bilong kilim man long naip na gan. Tasol nau, i gat planti ripot bilong stil, smuk brus, hom bru na kilim man long gan.

Dispela kain hevi i soim wanem tingting long yumi ol lida bilong ples, komyuniti, provins na olgeta arapela hap insait long kantri.

Long ples na komyuniti level, ating tumbuna pasin bilong lidasip em i bruk daun.

I nogat strongpela wok lukaut long ol pipel



Ol prinsipol bilong gutpela lida
wantaim
Evangelist
OHARE JABERE

na yangpela. Lida i no putim strongpela stia tok na pasin bilong givim mekimsave.

Ating Lida i pret long ol yangpela i gat gan na larim ol i mekim planti pasin nogat. Ating ples manmeri i no bung wantaim lida long lukautim na kontrolim pasin na wokabout bilong ol yangpela pipel.

Ating ol kaunsela i no kirapim wok we inap mekim ol yangpela pipel i bisi na mekim gutpela wok long ples na insait long komyuniti.

Long provinsel na nesinol level, ating lida i no kamapim trening skul o holim sampela woksop we bai inap helpim ol yangpela long kamap strong long stap long ples na helpim ol yet.

Ating ol yangpela pipel ol i gat graun, solwara, na bus, tasol ol nogat save na tuls long helpim ol yet, olsem planim kopi o lukautim pis o kisim pis long solwara na salim.

Ating planti bus ples i nogat rot, pawa na trenspot we bai inap helpim ol long salim o

lukautim gut ol samting ol i mekim.

Nau yet, i gat bikpela hevi i stap yet maski kantri i kamap independen inap 30 krismas. Sampela hap ples, distrik na provins skel bilong developmen em i stap daun bilo na arapela provins o distrik skel em stap antap. Kain olsem provins i gat 'minerol developmen' dispela hap, gutpela sevis em i kamap.

Na wanem hap i nogat dispela kain developmen ol pipel i stap long en, em i nogat sevis.

Olsem na pasin bilong helpim yangpela pipel long kisim bikpela save na save bilong helpim ol yangpela pipel em i bikpela tru long provins i gat minerol developmen i stap long en.

Olsem na hevi ol yangpela i kamapim o i stap insait long en, em i hevi lida long provins na nesinol i mas helpim na painim rot long stretim wan wan provins o komyuniti.

Gutpela lida long provins na nesinol mas askim o singautim ol

yangpela long go long asples.

Sapos ol i stap nating long taun o ol yangpela pipel long asples bai i ken kirapim wok long graun o solwara o bus bilong ol sapos dispela lida em i:

1. Kamapim trening skul bilong ol dispela yangpela pipel long kirapim wok long graun bilong ol yet;
2. Sanapim infomesin senta long distrik o sevis senta we bai inap helpim ol yangpela pipel long kisim skul tok long mekim ol wok projek bilong ol olsem buk bilong kisim dinau mani long Agrikalsa benk, na narapela benk, ol dona ejensi husat i save givim fri helpim mani na ol tuls;
3. Kamapim 'besik' infrastraksa olsem rot, bris, pawa na wara;
4. Givim liklik helpim mani long statim projek; na
5. Singautim ol komyuniti beis oganaisesen olsem CBO, na Yangpela Didiman long lainim na skulim ol yangpela long wok projek.

Long kamapim pasin na rot olsem lida inap helpim ol yangpela pipel long tusim ol kain bikhet pasin na tu bai inap helpim skel bilong laip long kantri i stap wankain namel long wan wan provins.

WANTOK

Published Weekly, Wednesday, for Word Publishing Company, Ltd.
P.O. Box 1982, Boroko, NCD
Papua New Guinea
Telephone: 325 2500
Fax: 325 2579
Email: word@global.net.pg
Pe bilong wanpela yia
52 niuspapa

Ples:	Air:
PNG	K140.00
AUSTRALIA	US\$100.00
ASIA PACIFIC na JAPAN	US\$80.00
AMERICA na EUROPE	US\$150.00

General Manager
Justin Hansu Kili

Editor
Neville Choi

Published by Justin Hansu Kili, MBE of Section 58, Allotment 3, Office 2, Waigani Drive.

Word Publishing Company Limited is owned by 14 major churches of Papua New Guinea - Catholics 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



PASIFIK NIUS

**SOLOMON ISLAND:
Solomon Ailans senisim tingting na sapotim Japan**

BIHAIN long bikpela toktok i go kam, i gat ripot i kamap olsem Solomon Ailans nau i senisim tingting bilong em long dispela intanesenel weil moratorium o tambu long kilim ol weil na i laik sapotim Japan long rausim dispela bikpela tambu we i sanap 20 yia nau.

Long stat bilong dispela mun, Solomon Ailans Praim Minista alan Kemakeza i tok gavman bilong em bai no inap vot long kibung bilong Intanesenel Weiling Komisn long Saut Korea. Dispela tokok i kam bihain long toktok wantaim envaironmen minista bilong Australia i stap long Honiara.

Tasol Nu Silan Konsavesen Minista Chris Carter, husat i stap long Saut Korea nau i tok Solomon Ailans bai bung wantaim Tuvalu na Kiribati long sapotim Japan.

Carter i askim nupela Pasifik memba bilong Intanesenel Weiling Komisn long senisim tingting bilong ol long sapotim Japan. Em i bin bung wantaim ol mausman bilong Tuvalu, Solomon Ailans na Kiribati long askim ol long senisim tingting bilong ol tasol ol i no laik.

Long Honiara yet, Sir Allan i strongim tok bilong em olsem Solomon Ailans bai sapotim Japan long ol kain kain bikpela intanesenel bung long bekim gutpela halivim i kam long Tokyo.

Em i mekim toktok long lonsing bilong wanpela resotresen projek long intanesenel ples balus bilong Honiara we Japan bai givim moa long 1 milien US dola. - RNZI/Pacnews

**FIJI:
Biskit tambu painim mak bilong Praim Minista**

FOREN Afes ministri bilong Fiji bai bungim ol praim minista bilong Fiji na Vanuatu long traim rausim dispela tambu long biskit we Vanuatu i bin sanapim.

Foren Afes Minista bilong Fiji, Kaliopate Tavola i tok wanwok bilong em Vanuatu Tred Minista James Bule i no givim bekim long em yet na ol bai stretim wanpela pas long salim go long praim minista bilong Vanuatu. Em i tok dispela em i las mak tru bihain long ol i givim 10-pela de toksave long Vanuatu long rausim dispela tambu ol i sanapim long stat bilong dispela yia.

"Sapos ol toktok namel long tupela lida bilong mipela i no karim kaikai, bai mipela i nogat rot na mipela i mas givim dispela kain bekim," Tavola i tok.

Dispela bekim bai i ken karamapim wanpela tambu long Vanuatu kava we em i wanpela samting tasol we Fiji i save baim long Vanuatu.

Melanesien Spiahet Grup nesenenel komiti i strong long rausim dispela tambu Vanuatu i putim long biskit bilong Fiji.

Flaua Mills bilong Fiji i bin stat long salim ol biskit i go long Vanuatu long 2001 na long wan wan yia, em i save kisim klostu \$1.5 milien.

**TONGA:
Nupela pipia ples bai helpim Tongatapu**

WOK long nupela Tongatapu pipia ples i stat long Trinde las wik wantaim saining bilong wanpela AUD\$460,000 (US\$357, 600) kontrak wantaim John Gildea bilong karimaut Solid Weis Menesmen Projek na Sione Tafolo bilong Tafolo Quarry.

Tafolo Quarry bai go pas long klarim Tapuhia Quarry klostu long Vaini ples long sentrel Tongatapu.

Mista Gildea i tok aninit long kontrak dispela wok bai karamapim klarim na levelim plua bilong ston kwari bai ol i ken sanapim wanpela 'sefti blanket'. Dispela sefti blanket em ol i mekim wantaim ol sintetik samting we bai i karamapim ai bilong 19 mita kwari. Longpela bilong em inap long tripela futbol fil.

Antap long dispela sefti blanket, bai i gat moa graun o retpela graun na karanas long pasim ol marasin nogut long go insait long Tongatapu pres wara tebol.

Tafolo Kwari bai stat wok long Jun 28 na bai pinisim wok bilong ol long Oktoba 28 na ol bai opoim long mun Novemba.


Tafolo Kwari kontrak em i wanpela kontrak we i bikpela tru bilong Solid Weis Menesmen Projek we wanpela lokal kampani yet i wok bung long kamapim na Sione Tafolo i tok olsem kampani bilong em i amamas long kisim dispela kontrak na wok long dispela projek we dispela bai senisim tingting bilong ol Tonga manmeri long tromoi gut pipia bihainim stretpela rot.

Dispela projek i kisim helpim mani long gavman bilong Tonga na gavman bilong Australia.

Australia i givim AUD\$8.5m na Tonga i givim narapela hap.


Dispela projek i no bilong givim nupela pipia ples bilong Tongatapu, tasol long skulim komyniti long stretim gut pipia bilong ol.

Dispela Tapuhia pipia ples bai i ken karamapim pipia bilong Tonga inap long 35 krismas olgeta.



Painim birua...

DISPELA helikopta i bin painim birua long namba 14 de bilong dispela mun long Niu Yok siti long Amerika. Namel long 4-pela de tasol i gat tupela helikopta i bin abrus na pundaun long solwara insait long Niu Yok siti. AFP/Getty Images/File



Naispela kala...

DISPELA man, Sancho Gonzalo Green i wok insait long wanpela bikpela balun tru we i ken plai na karim ol manmeri. Em i stretim balun long Kikng Cup Balun 2005 resis long Vilanueva del Pardillo klostu long Madrid long kantri Spein. AFP/Pedro Armestre

Traim siot pastaim...
OLOMAN, dispela monk i wok long tok dispela siot em i sais bilong em stret, olsem na em i traim. Dispela monki em nem bilong ol em orangutan na ol i kam long kantri Sumatra long Indonesia. Dispela monki i stap long Moscow Zoo long Jemeni. AFP/Yuri Tutov




Nogat rot nau...


POLIS bilong Irak i sanap was long tupela bikhet man ol i holim bihain long ol i pait wantaim ol long wanpela bikpela pait long sautwesten Al-Bayaa distrik bilong Baghdad. Polis, ami bilong Amerika na intiria ministri foses i bin raunim dispela hap bihain long ol paitman i bagarapim wanpela polis stesen. Faivpela iraki polisman i bin dai na ol i holim 11-pela paitman.



WOL NIUS WOL NIUS WOL NIUS



WOL NIUS WOL NIUS WOL NIUS



Tok gutbai...

BOKIS bilong Ami Spc. Louis E. Niedermeier, wanpela long ol soldia bilong Amerika husat i bin indai long Irak. Em i bin indai pastaim long namba 21 krismas bonde bilong em. Ol soldia bilong Old Guard i karim kofin bokis bilong em i go long matmat. AP Photo/Susan Walsh



Longpela laip i stap yet...


DISPELA meri bebi elefant i stap laip tripela de tasol na em i gat longpela rot bilong wokabaut yet. Nem bilong em Shaina Pali na em i sanap klostu long mama bilong em Pang Pha long namba wan taim em i soim pes long ai bilong ol manmeri long pablik. Shaina na mama bilong em i stap insait long banis bilong ol animal o zoo long Berlin long Jemeni. REUTERS/Arnd Wiegmann

Lusim wanfamili...

WANPELA brata bilong wanpela soldia i bin indai long Saut Korea bihain long wanpela soldia i bin long long na kilim 8-pela wanwok bilong em bihain long wanpela sinia opisa i bin paitim em na bagarapim em. Em i bin tromoi wanpela han granet na kisim gan na sutim ol wanwok bilong em long gat pos bilong em long Yonchon i stap 60 kilomita long not bilong siti Seoul.



EM mango ya. Ol dispela fama bilong India i sindaun insait long wanpela mango gaden long wanpela liklik ples ol i kolim Malihabad i stap 40 kilomita long westen sait bilong siti Lucknow long India. Malihabad em i namba wan bikpela ples i save groim ol kain kain mango. REUTERS/Stringer



Bia tru tru?

NOGAT ya. Em ol traipela balun ol i mekim na penim skin bilong ol na ol i makim tru ol glas bia na wain. Ol i bin sanapim ol dispela balun long promotim na salim wanpela bia long kantri Jemeni. REUTERS/Alexandra Winkler

Mini Mask Festival strongim kalsa

Nesanel Kalsarel Komisen (NCC) i wok strong long sapotim na strongim kalsa na ol pasin na bilip bilong ol tumbuna bilong yumi. Andrew Molen i bihainim ol i go long ol ples Kerema na lukim tru kala bilong ol...

Andrew Molen i raitim

KALSA bilong mipela i bikpela samting we em save soim olsem yumi wanem kain lain. Sapos yumi nogat kalsa em i soim olsem yumi nogat pasin, yumi ol manmeri bilong raun raun tasol.

Long dispela as Nesanel Kalsarel Komisen (NCC) i wok strong long sapotim na strongim kalsa na ol pasin na bilip bilong ol tumbuna bilong yumi.

Long Kwins Betde (Mande 13, Jun), long las wik tasol, wanpela bikpela bung bilong helpim long strongim dispela wok i kamap long ples Toare long Galp provins we dispela ripota i bin go wantaim NCC long lukim.

Dispela bung i bin makim namba wan "Mini Mask Festival" bilong Galp na Toare. Inap olsem 12-pela Mask o giaman-pes kaving o tambaran bilong Karama, Pukari, Mora, Lavare, Silo, Kavako, Aike, Avere, Pomara, Lelefiru na Toare i bin kamap na soim ol yet.

Mipela i kalap long wanpela 25-sita Coaster bus bilong Polis Trensport Bod na lusim Pot Mosbi long 8:35 long Sande moning. Narapela L-200 kar i ron long baksait wantaim ol kago. Tripela polisman bilong Bereina i ron bihainim mipela olsem eskot.

Mipela abrusim boda bilong NCD na Sentrel provins long Laloki bris long 8:50 na ron long Hiritano Haiwe long painim Sapeharo, klostu long Malalaua.

Long 11:20 mipela i kamap long Bereina we rot i bruk i go tripela han.

Wanpela i go antap long Not Mekeo, narapela i go daun long Bereina faun na i go long ol Kairuku ples na dispela han we i go stret em Trens Malalaua Haiwe. Mipela i amamas long ron long kolta rot ken bihain long bas i sikirapim das long Hisiu i go olgeta long Bereina.

Long hap i go olgeta long Malalaua rot i gutpela long wanem i gat kolta na draiva bilong mipela, Joe i pasim ai tasol na mekim save long rot.

Mipela i abrusim boda bilong Sentrel na Galp provins long Apa Naipi na i go yet.

Sampela i ai silip bilong wanem ol i kirap long bik moning yet na kam wetim bas long opis bilong NCC tasol mi opim windua na kisim gutpela win i stap.

Narapela sinia opisa bilong NCC husat i sindaun opsait long draiva i wok long soim ol ples na kolim nem bilong ol long ol lain husat em i namba wan taim olsem mi i go long dispela hap.

Bihain long longpela rot na baksait i pen long sindaun, mipela i kamap long Sapeharo bris long 12:20 apinun na kisim tupela bot na bihainim wara i go daun long solwara. Bihain long tanim na raunim planti kona mipela kamap long maus bilong wara long 1:40 na ron long solwara bihainim nambis i go daun.


Solwara i nogut liklik tasol ol lain long bot mipela i stap long en i amamas tasol long kalap i go antap long ol bikpela si bruk

Long 2:15 long apinun mipela kamap long Toare na

ol ples lain i singsing long nambis long soim amamas long lukim mipela na tromoi saksak antap long mipela. Ol i putim ol flawa na buai long

rausim long haus na karim i go daun long nambis long ol liklik haus ol i mekim bilong wanwan ples long hait na senis.

"Mi askim olsem yumi sapotim kalsa bai yumi salim na mekim moni long en, nogat, tasol em i hap na luk-save bilong yumi ol pipol bilong Galp na PNG na mi



• Ol meri Toare i samsam wantaim mask bilong ol. Kerema, yu yet yu kam lukim.

nek bilong mipela taim mipela i go daun long bot.

Bihain mipela i malolo na raun lukim ples na redi long narapela de we bikpela singsing bai i kamap.

Wanwan haus i lukautim wanwan bilong mipela na sampela i lukautim ol lain bilong narapela haus husat ol i kam long singsing.

Long nait we ol narapela manmeri i no stap long lukluk ol mask danis man i karim mask bilong ol i go long ol haus em ol i makim long wanwan bilong ol.

Long traipela moning taim san i no kamap yet, ol i

Haus bilong ol biklain na ol bikman i sanap na lukluk i go daun long nambis we ol singsing grup i kam danis wantaim ol mask bilong ol.

Planti manmeri tru bilong ol ples i stap bihainim nambis i kam antap olsem long Lelefiru na i go daun olsem long Silo i kamap long lukim dispela bikpela festival.

Wanpela opisa bilong Galp Gavana, Chris Haiveta i makim em long opim dispela festival.

"Dispela kain festival em i gutpela bilong wanem em i promotim turisim na tu em bai i helpim long strongim kalsa na tumbuna pasin bilong yumi," dispela man i tok.

"Mi save olsem Galp provins i gat klostu 61 mask i stap tasol ol i no save kisim i go aut long provins long ol narapela ol bikpela so bilong wanem hatwok bilong karim ol raun i bikpela tumas.

"Sapos olgeta samting i orait long wokabout bilong ol long sait bilong trenspot (o kar, bas sip) em bai mipela inap go long ol bikpela bung olsem Nesanel Mask Festival.

Em i tok planti bilong ol man maski we ol i kamap nau i no bin i kamaut long ples klia moa long 10-pela na sampela 100 yia.

"Taim yumi strong kalsa na tredisen bai inap long daunim ol hevi bilong lo na oda na tu sapotim sastenabol developmen bilong ol pipel na kantri.

laikim bai em i mas i stap laip na strong," pesman i makim Gavana i tok.

Eksekutiv Dairekta bilong NCC, Dokta Simet tu i makim amamas bilong em taim em i pasim festival long ol samting i kamap.

"Mi laik tok tenkyu long ol ogenaia na ol lain husait i wok wantaim long mekim dispela samting i kamap.

"Dispela em i wanpela gutpela samting stret i kamap na wanem samting yupela i mekim long en nau na bihain em i stap long han bilong yupela yet nau," em i tok.

Long dispela em i tokaut tu olsem namba tu festival bai i kamap long Toare ken long wankain taim neks yia we NCC bai i givim sapot bilong ol yet na em bai i kamap olgeta yia.

Em i tok tenkyu tu long Galp Provinsel Gavman husat ol i putim han wantaim NCC long kamapim dispela festival.

Siaman bilong ol ogenaising komiti long Toare i tok amamas bilong ol tu long dispela samting i kamap long ples.

"Mi laikim bai dispela kain festival i noken kamap long ol bikpela taun na siti tasol em i mas i kam bek long ol ples.

"Mi laikim bai dispela i mas i go het moa na i noken i dai long hia," em i tok.



• Ol lain man Toare i mekim mask danis bilong ol long nambis. Nambis em kamap kalaful stret taim ol ples lain i autim bilasbilong ol.

Planti rot long bus ples bagarap tru

Insait long kantri i gat planti rot we planti long ol manmeri bilong yumi i save yusim long karim ol maket na gaden samting i go long maket long salim. Insait long ol bikpela taun na siti, ol rot i gutpela. Tasol insait long planti bus ples bilong kantri, hevi bilong rot i bagarap i wok long kamapim moa hevi olsem daunim wok developmen. JAMES KILA i bin go raun lukim sampela long ol dispela rot we i wok long daunim strong bilong ol manmeri.

James Kila i raitim

LONG las wik tasol mi bin raun i go olsem long ples Keremanga insait long Dei Kaunsel eria long Westen Hailans provins.

Bihain long mipela i yusim maus rot long Gumanch na kamap long rot i go olsem long Kitip Hai Skul, dispela Toyota Hailaks mipela i ron long en i stat long pairap long ol hul long rot na mipela i kalap na ol samting insait long kar tu i kalap na pundaun nabaut. Bihain dispela kar mipela i ron long en i go insait long wanpela bikpela baret stret na tru tumas, mi ting olsem wara bai karamapim mipela stret.

Insait long narapela raun bilong mi insait long kantri mi skelim planti ol eria em ol pipel i bungim bikpela hevi tru long sait bilong rot tasol. Ol i gat ol gutpela gaden kaikai na tu ol kes krop olsem kopi tasol dispela hevi bilong rot i stopim ol long karim ol dispela samting i go aut long maket.

Taim mi stap long Keremanga yet mi lukim sampela lain fama bilong Jimi i karim kopi bilong ol na wokabaut i kam daun. Ol i

tokim mi olsem ol i harim olsem prais bilong kopi i go antap na ol i wokabaut longpela rot tru long bringim kopi bilong ol i go aut long salim. Mi sore tru long ol dispela lain.

Dispela hevi bilong rot bagarap o nogat rot i daunim tru developmen long kamap insait long kantri. Tru tumas PNG i gat planti ples maunten na baret na ol samting tasol sapot gavman i lukluk gut na givim moa luksave long rot ating kantri bilong yumi bai develop. Taim gutpela rot na bris i stap em sevis bai go long ol rurel pipel na tu ol rurel pipel i ken karim ol kes-krop bilong ol i go na salim na bringim nupela mani i kam insait long kantri.

Taim mipela i save toktok tumas long ikonmik developmen, ating rot na bris em wanpela bikpela eria tru we gavman i mas lukluk long en. Taim dispela ol samting i stap ol pipel bai kisim sevis na helpim long sait bilong edukesen na ol helt sevis.

Dispela hevi bilong rot bagarap na narapela hevi i stap long planti distrik insait long PNG tude. Planti ol lain long ol distrik i save painim

...dispela hevi daunim ikonmik wok developmen



• Hap bilong rot long Dei Kaunsel long Westen Hailans i bagarap tru.

hat tru long wokabaut longpela hap tru long bringim ol samting bilong ol long salim i go long taun na kisim mani. Dispela hevi i mekim na planti bilong ol i no save salim ol pikinini bilong ol i go long skul na kisim skul.

Ol ples rot bagarap tru

I no long taim i go pinis Minista bilong Trensport na Sivil Eviesen, Don Polye i bin mekim wanpela lukluk raun bilong em i go long Okapa na i guria ru olsem rot long dispela hap i bagarap tru.

Mista Polye i tokaut long pablik long Okapa stesen olsem em i guria tru bikos ol ripot em i save kisim long ol lain long provinsel woks na ol lain long opis long Mosbi i save tok olsem wok i kamap na ol i yusim mani long stretim rot. Tasol taim em yet i lukim long ai bilong em, minista ya i guria stret.

Mista Polye i tokaut stret olsem em bai karimaut wanpela wok painimaut i go insait long dispela hevi bikos ol ripot em i kisim long ol lain Woks dipatmen long ol provins na tu long bikpela opis long Mosbi i narakain na samting em yet i lukim i narapela stret.

Nesenel gavman i kamap wantaim dispela program ol i kolim Distrik Rot Impruvmen Origren (DRIP) long karimaut wok insait ong ol distrik long ol rurel eria o bus ples long kantri.

Helpim yu yet projek

Tasol nau yet dispela wok i no kirap yet na sore tru olsem maski insait long dispela kopi sisen planti ol kopi we i ken go aut long kantri na bringim nupela mani i kam insait i stap yet long bus.

Planti ol lain long sampela rurel eria long kantri olsem ol lain ong ples long Domil i yusim tingting bilong ol yet long kamapim ol gutpela wok long stretim rot insait long komyuniti bilong ol yet. Ol i no sindaun nating na wetim gavman long bringim sevis long ol.

Sampela hap seksen bilong rot insait long viles na eria bilong ol em ol lain manmeri long ples yet i stretim. Ol i no stap na wetim gavman long givim mani long ol o wetim ol palamen lida long putim mani na ol bai stretim rot bilong ol. Ol i laik kisim sevis olsem na ol yet i givim taim bilong ol tu yusim ol sawol na arapela samting bilong ol yet long mekim wok.

Mi bin glasim dispela wok i kamap long hap bilong Nebilya long Westen Hailans provins na tu long Domil klostu long Nondugl.

Wanpela komyuniti bilong Kuwar long towa-Nebilya insait long Westen Hailans provins i soim tru olsem self rilains o wok bilong helpim yu yet i ken senisim laip na bringim sevis long komyuniti bilong ol.

Ol manmeri insait long Kuwar i karim sawol, bus naip na ol arapela samting bilong wok na stat long stretim rot stat long Kaugle praimer i skul i go olgeta long Okuk Haiwe.

Dispela rot seksen ol i klinim na stretim em klostu 8 kilomita. Rot ya tasol i save bringim gavman sevis long ol na tu helpim ol long karim kopi bilong ol i go salim long Maunten Hagen.

Moa long 7,000 manmeri i tok orait na amamas long stretim rot na planim ol gutpela plaua long sait bilong rot.



• Wanpela Toyota Land Cruiser i katim bikpela wara Yambale long Paela Rot long Sauten Hailans.

Dispela seksen bilong rot em ol i bin mekim long taim bilong Australia gavman i go insait long eria bilong ol i bin bagarap tru. Las taim wok stretim i kamap long rot em long 202, tasol bihain long en rot i go bagarap gen.

Dispela rot i karamapim 5-pela kaunsel wod long Lowa-Nebilya. Olsem na ol manmeri i pasim tok na tok orait ong ol manmeri long wan wan dispela wod bai wok long 1.5 kilomita seksen bilong rot long eria bilong ol.

Kaunsel bilong Kuwar eria Thomas Nimba i tok komyuniti yet i laik yusim taim bilong ol long stretim rot na bringim sevis i go insait long eria bilong ol.

Dispela kain wok ol lain long Nebilya na Domil i soim gutpela piksa tru long planti arapela manmeri na komyuniti insait long kantri.

Tasol narapela bikpela askim i stap olsem, gavman i stap we?

Ating gavman em ol pipel i makim long givim sevis long ol olsem na em i mas lukluk i go insait long hevi na wari bilong ol pipel long ol rurel eria na helpim ol long wokim rot na bris na ol pipel i ken kisim gutpela sevis.

Ol man stretim rot na askim long mani

Dispela pasin nogut we i save lukim ol sampela man i stretim rot na askim long mani em i bikpela tru long planti ol bus rot insait long Hailans rijen na tu long PNG.

Mi bin raun long planti ol rurel rot insait long Hailans rijen na mi save lukim planti ol yangpela i save sanap long rot wantaim sawol na bus naip na stopim ol kar na PMV na tokim ol olsem ol i stretim rot na ol kar i mas peim pastaim sapos ol i laik yusim.

Dispela tingting bilong gavman long DRIP program na tu long yusim PNG Difens fos balus long helpim ol bus ples long kantri long karim ol kes krop na ol arapela samting i go aut long salim long maket i gutpela.

Tasol wanem taim dispela wok bai kamap em yumi no klia tumas. Ating sapos gavman i putim moa mani long helpim long stretim rot na mekim rot wei ken stap longpela taim maski long taim bilong ren ating dispela bai helpim tru ol manmeri long ol bus ples long PNG long kisim gutpela sevis.



• Wanpela famili i karim kopi bek na wokabaut longpela hap long Obura-Wonenara long Isten Hailans.

Twinhox bosim PNG musik

Dispela em i stori bilong tupela brata husat i bin lus long solwara tasol musik bilong ol nau i luk olsem bai em i stap oltaim...

MUSIK bilong ol nau i kukim PNG musik i stap, wantaim singsing bilong ol Maten Kandiek i brukim nupela rekot long Yumi FM taim em i go insait long Nesenel Wikli Hit Pareit long namba wan wik long dispela mun long namba 10.

Long namba 11 de bilong dispela mun, singsing bilong ol i bin kalap i go sindaun long namba 3 long namba tu wik bilong em. Long namba 3 wik bilong em, Maten Kandiek i rausim namba wan posising long han bilong Sebeats na singsing bilong ol Lala Tora.

Dispela em i wanpela rekot we wanpela arapela ben tasol, em TRAMPS i bin mekim wantaim bikipela hit singel bilong ol Goi Thau Thau Guai long 2002.

Singsing Maten Kandiek bilong albam Sorpendeng i gat stori bilong em yet we tupela papa bilong em, ol Wol brata, Tony na Paul bilong Lihir Ailan i bin dai long solwara taim ol i painim birua namel long Namatanai na Lihir bihain long ol i rilisim namba wan albam bilong ol.

Tony, Paul na ol kasen brata bilong ol, Andrew, Thomas na Kenneth i bin rekodim albam bilong ol long Cyclone Studios long Pot Mosbi long pinis long las yia aninit long nem Twinhox. Tupela brata em ol pikinini bilong James na Rose Wol bilong Lipuko ples long Lihir Ailan - ples we Twin Hox i dediketim albam bilong ol Sorpendeng long en.

Tony i bin painim 27 krismas bilong em las yia taim em i lus long solwara. Em i bin greduet wantaim wanpela Diploma long Akaunting long Divain Wod Yunivesiti long 2001 na brata bilong em Paul i bin greduet wantaim wanpela Diploma long Akaunting long City College of Technology, Pot Mosbi long 2004.

Edita bilong Wantok, Neville Choi i tingim taim em i bin bungim Tony Wol taim em i mekim las yia bilong em long DWU long 1996. Tony i wok long statim namba wan yia bilong em.

"Tony i bin wanpela manki bilong toktok na tok pilai na olgeta manmeri i bin laikim em tru. Long ol bung bilong Nu Alan Sumatin Asosiesen, em wanpela gutpela man long harim tok na mekim wok."

I laik go olsem klostu long Krismas las yia, Tony na Paul na kasen brata bilong tupela Andrew Sapot i bin ron long wanpela spit bot i go long ples bilong mama bilong ol



• Tony Wol, manki Lipuko long ples Lihir husat i bin lus long solwara wantaim brata bilong em Paul.

long Lavongai we ol manki i bin go long wanpela bikipela Krismas bung bilong Membra bilong Kavieng, Martin Aini long haus bilong em long Nu Hanova.

Taim ol i wok long ron i go bek long Lihir, banana bot bilong ol i bungim bikipela taim nogut. Solwara i bagarap na traipela ren i pundaun. Long namba 10 de bilong mun Januari 2005 bot bilong ol i bin tanim long solwara i no long we tumas long Sumun Poin long Lihir Ailan. Dispela em i last aim dispela tupela brata, Tony na Paul na kasen brata bilong ol Andrew i bin stap laip.

Wanpela wanfamili bilong Wol famili, Martin Simol bilong Lihir i tokim Glasim Musik olsem i bin i gat wanpela ten 3 manmeri i bin stap long dispela dingi taim em i painim

birua na wanpela pasindia tasol i stap na i ken stori long hevi ol i bungim. I kam inap tete, bodi bilong Tony na Paul i lus yet.

Wanpela gutpela poroman na Pablik Rilesens Opisa bilong Lihir Gol Main, Jimmy Peter i tingim bek dispela de we ol pipel bilong Lipuko na maining taun bilong Londolovit i harim toksave.

"Long misa bilong matmat bilong ol long Lipuko, lewa bilong ol manmeri bilong Lihir i bin bruk taim ol manki bilong ples i pilaim ol singsing tupela i bin rekodim," Jimmy i stori. "Em i sutim tru bel bilong mipela olgeta, na i brukim stret lewa bilong papamama bilong ol James na Rose Wol taim ol i harim nek bilong tupela pikinini man bilong ol long matmat bilong ol na nogat wanpela man i lukim indai bilong tupela."

Jimmy i tok em i bin save long tupela brata long wok ol i bin mekim wantaim Red Cross Lihir Brens we ol i bin karim aut ol wok aweanes long HIV AIDS na ol singsing na danis ol i save mekim wantaim ol drama ekt we ol i soim pasin bilong no laikim arapela lain husat i gat sik AIDS na Tony na Paul i bin helpim long go pas long yut spots na ol arapela volantia wok helpim nabaut long Lihir.

"Andrew Sapot i bin mekim bikipela wok bilong Red Cross Lihir Brens na em i bin namba wan yut bilong Lihir long go raun long Fiji long stap insait long wanpela yut konfrens long HIV/AIDS.

Taim em i bin go long Fiji, mi bin bungim dispela yangpela man Andrew taim em i bin kam stap sambai long Pot Mosbi na mi skelim em olsem wanpela man we lewa bilong em i stap wantaim pipel bilong em.

Ol dispela manki em planti manmeri long Lihir na ol arapela hap long ailan i save long ol na olgeta i bin sore tru long lusim ol dispela yangpela manmeri.

"Taim ol i pilaim ol singsing long misa bilong matmat em i karim bikipela bel sori long dispela bagarap i painim ol dispela yangpela man na i lusim wanpela bilakpela klaut antap long komyuniti bilong Lihir long ol wik bihain," Jimmy i stori. "Ol pipel long olgeta hap long Nu Ailan na Nu Hanova i bin sore tru long dai bilong ol dispela manki husat i bin singsing long Nu Ailan na ol pipel bilong en."

Martin Simol i tok papamama James na Rose Wol na ol famili i wok long pilim yet pen long lusim tupela pikinini bilong ol na ol i givim luksave na tok tenkyu long ol tok sori i kam long ol lain pipel husat i save laikim musik bilong tupela long radio.

"Long narapela sait, mipela i amamas tru olsem singsing bilong mipela Maten Kandiek i kamap namba wan singsing long radio tete na mipela i tok tenkyu long olgeta fens na long radio stesen long sapot bilong ol," Martin i tok.

Maten Kandiek nau i kamap strong tru olsem wanpela singsing i makim ol pipel bilong Lihir husat i bin laikim tru Tony na Paul na singsing bilong tupela i kamap bikipela tru. Nau em i kamap olsem wanpela we bilong onaim strong bilong dispela tupela brata bihain long mama graun i pulim rausim laip bilong ol na kisim ol long han bilong Rose na James Wol.

Maten Kandiek i gat wanpela kain strong bilong em we i save pulim yau bilong yu namba wan taim yu



• TWINHOX CD kava - Namba wan na wanpela CD bilong Twin Hox - Sorpendeng

harim na bai pinga bilong yu i pairap na tek bai meknais bihainim spit bilong singsing inap em i pinis.

Jimmy Peter i tok Twinhox nau em i nupela namba wan musik albam long Nu Ailan na dispela albam bilong ol i pinis insait long provins na i hat tru nau long painim kopi bilong dispela albam. Planti manmeri bilong Nu Ailan nau i wok long go long Rabaul na Kokopo long traun painim na kisim wanpela kopi.

"Taim alba mi bin kamap long Lihir Ailan, em i pinis long tripela aua tasol na planti moa manmeri i wok long painim yet."

Em i sore samting tru olsem Sorpendeng em i namba wan na wanpela albam bilong Twinhox tasol na long Nu Ailan, em i wok long kamap olsem wanpela albam we olgeta manmeri i mas painim.

Sief Progema bilong Yumi FM, Kas-T i tok Twinhox i gat sampela moa musik we i wok long kamap isi isi long musik sat bilong stesen. Ol singsing olsem Londolovit Town, Boina Tuna, Maloko na Lihir Ailan.

Namba tu singsing bilong ol, Boina Tuna i soim pes long musik sat las wik na i luk olsem em bai muv i go antap insait long Top 10 bihain long em i sindaun long namba 11. Em i luk olsem em bai bihainim namba wan single Maten Kandiek we nau i stap long namba tu wik antap long musik lainap.

Neville Choi i kirap nogut long harim dispela singsing Boina Tuna las yia taim em i harim Sorpendeng. "Dispela singsing em wanpela tumbuna singsing bilong Lihir mipela i bin lainim long wanpela lapun man bilong Lihir long 1996 Kalsarel De long Divain Wod na mi kirap nogut olsem Tony i luksave long strong bilong en na rekodim."

Singsing Lihir Ailan em ol bin dediketim long Ben Menesa bilong Twinhox, Henry Yanasa husat nau i silip long wanpela bet long haus sik silip Kokopo bihain long em i painim birua long rot klostu long ples bilong ol long Lipuko.

"Wantaim strong bilong Maten Kandiek nau we i wok long pulim inap long 56 rikwes i kam long ol manmeri long olgeta wan wan wik

na ol arapela singsing, Sorpendeng bai kamap wanpela strongpela albam bilong Nu Ailan na winim ol arapela albam bilong bipo," Kas-T i tok. "Tasol em i hat tru olsem dispela em ol wan wan singsing mipela bai harim i kam long ol manki bilong Twinhox".

Ol singsing i stap long tok ples Lihir na Lavongai wantaim 4-pela singsing bilong 10-pela i stap long albam i stap long tok pinis. Olgeta singsing i bikipela tru insait long provins na i soim klia olsem Tony, Paul, Andrew na Kenneth em ol tru tru pikinini bilong Nu Ailan.

Jimmy i tok bikipela rilis bilong Twinhox atbam bai bihainim laik bilong Paul na Tony stret na ol bai amamas tru long harim musik bilong ol i pairap long radio. Na long dispela as tasol em papamama bilong ol na komyuniti long Lihir i amamas.

"Tony i bin askim mi pastaim long ol i bin ron long dingi sapos mi inap long stretim ol vidio klip long sampela long ol singsing," Jimmy i tok. "Tasol nau yet mi no klia sapos mipela i ken mekim long wanem mi mas lukim ol vidio klip bilong Pawahaus Records pastaim."

Sorpendeng albam em tupela narapela brata Emmanuel na Tarcissius Mugauna i bin stretim long Cyclone Digital Studios long Gordons na rilisim wantaim Pawahaus Studios long Lae.

Emmanuel, husat i mekim nem wantaim namba wan albam bilong Niu Age Ben tupela yia i go pinis i pilai lid, ridim na bes long ol rekoding na em i stretim tu drams programming.

Sapos yu harim pinis tupela singsing bilong ol long Yumi FM na yu tait long painim CD na kaset bilong ol, yu ken sekim ol Papindo na SVS stua klostu long yu.

Olgeta toktok na luksave long olgeta samting insait long dispela stori olsem toktok na poto i kam aninit long ol PNG Kopirait Lo na long dispela as, olgeta luksave i mas go long Wantok Niuspepa tasol na yu no inap long yusim nating.



• Ol manmeri bilong Lihir i brum i go long Papindo stua long Lihir ailan long baim CD bilong Twin Hox. Olgeta CD long hap i bin pinis insait long tripela aua tasol.



MAN, GRAUN na SOLWARA
Solwara awenes long "Laip Rip Kaikai Pis Bisnis" (Live Reef Food Fish Trade)

SUSA Bikmaus na Bata Bikmaus em tupela bikmaus pis o long tok inglis, nem bilong ol wrass husat i save stap insait long Gaden rip long nambis bilong Kavieng. Ol rip raunim dispela ples bilong ol i gat planti abus na kain kain samting i stap long em. Ol i save amamas na swim i go kam namet long ol rip long painim kaikai. Tasol olgeta taim ol i save go bek long Gaden rip long wanem em i haus bilong ol.

Tasol nau nait em i narakain olgeta. Long san taim ol i wok long kaikai i stap long Hangamap rip, ol i harim toksave olsem Laip Rip Kaikai Pis Bisnis (Laiv Rif Fud Fis Tred), wanpela bikpela bisnis we i save holim pasim ol grupa pis na ol bikmaus bilong salim long ol bikpela bisnismen na meri long Hong Kong na Sauten Bikples Saina bai kamap long solwara bilong Nu Ailan provins. Olsem na nau nait, ol i no sindaun gut na ol i lukluk tasol long wanpela samting long kamap. Ol i tingting tu long ronawe i go long arapela ples. Ol i kirap nogut long harim toksave i kam long solwara.

"Bai i gat kibung long Hangamap rip tumora moning. Olgeta grupa pis na bikmaus i mas kamap. Bai mipela toktok long Laip Rip Kaikai Pis Bisnis!"

"Susa, yu harim tu? I gat toksave long olgeta grupa na bikmaus pis i mas bung long moninglong wanpela bikpela kibung. Bai mipela i toktok long Laip Rip Kaikai Pis Bisnis. Mipela i mas go na harim wanem kain toktok bai kamap."

"Yes Bata, mipela i mas i go. Na mipela i mas toksave long ol wan famili bilong mipela olsem sapos dispela bisnis i kam long solwara bilong mipela, ol haus bilong mipela bai bagarap long wanem ol man bai kam na traim pulim mipela long ol bikpela bikpela namba. Ol bai no inap long yusim pising lain tasol. Ol bai stat long yusim ol strongpela marasin nogut na posin rop we bai i ken rausim strong bilong mipela na ol bai i ken holim mipela isi tasol. Mipela i mas kirap long bik moning tumora," Susa i tok.

Bata Bikmaus na Susa Bikmaus i go silip. Ol i no silip gut long wanem ol i driman nogut olsem ol i pas insait long ol bikpela umben na strongpela marasin nogut i kilim ol na dainamait tu i bagarapim haus bilong ol.

"Susa, kirap, tete mipela i gat dispela bikpela kibung long Laip Rip Kaikai Pis Bisnis na mi no laik abrusim," Bata i tok. Ol i redi long swim i go long arapela sait bilong ailan long go long Hangamap rip we kibung bai kamap.

San i kam daun insait long blupela klia wara na olgeta samting i stap isi aninit long solwara. Taim Susa Bikmaus na Bata Bikmaus i swim i go ol i no inap tingting long dispela ples i nogut ol dispela naispela samting.

"Mipela i kamap nau, na dispela ples i luk olsem hangamap rip, yu lukim dispela hangamap rip we mipela i bin kaikai na pilai hait na painim taim mipela liklik," Bata Bikmaus i tok. "Yes, em i nais tru long hia, i gat planti kain kain kala na mi ken lukim olsem ol arapela grupa pis na bikmaus i stap baksait long dispela bikpela hap rip."

Gerry, wanpela lapun grupa pis i go pas long kibung na em i wok long redi long opim kibung taim Bata Bikmaus na Susa Bikmaus i kamap.

"Gutpela moning olgeta. Mipela tok tenkyu long yu long kamap long dispela bikpela kibung. Dispela kibung em long toksave long yu olsem ol man long graun i laik kamapim dispela Laip Rip Kaikai Pis Bisnis long solwara bilong yumi. Maski mipela i nogut strong long stopim dispela bisnis, mipela i ken redi tasol bai mipela i ken traim abrusim dispela bisnis. Tete mipela bai kisim ol askim long yupela na traim givim gutpela bekim.

"Wanem samting em Laip Rip Kaikai Pis Bisnis Bubu Bikmaus?"

"Ooo, Pikinini Bikmaus, Laip Rip Kaikai Pis Bisnis em i wanpela bisnis we ol bikpela Pis Kampani bilong Esia i save kisim ol as ples manmeri bilong dispela ples long hukum pis na lusim ol i stap laip long salim long ol bikpela haus kaikai long Hong Kong na Sauten Saina. Insait long ol dispela haus kaikai i gat ol bikpela mani man na meri husat i save laikim tru long makim ol laip pis i stap insait long ol dispela bikpela haus kaikai."

"Bilong wanem na mipela i mas save gut long dispela Laip Rip Kaikai Pis Bisnis?" Anti Bikmaus i askim.

"Em i bikpela samting long mipela i mas save gut long dispela pis bisnis long wanem mipela em wanpela kain pis we dispela bisnis i save painim. Ol as ples man bai i no inap wari long laip bilong yumi, ol bai yusim ol kain kain posin long holim mipela, ol dispela posin i ken bagarapim na kilim famili bilong mipela olgeta. Em i ken bagarapim kaikai bilong mipela na ol haus bilong yumi," Bubu Bikmaus i bekim.

"Bai mipela i banisim mipela yet olsem wanem?" Marna Bikmaus i askim.

"Mipela noken stap long wanpela rip tasol olgeta taim, mipela bai i go kam long wan wan ples, mipela i mas putim was olgeta taim na lukaut long ol pising bot bilong ol na ol daiva bilong ol," Papa Bikmaus i tok lukaut.

Tasol yu mas save tu olsem i gat sampela manmeri husat em ol gutpela manmeri na ol i wok long hat wok long skulim ol arapela manmeri long hevi bilong dispela kain pis bisnis.

"Na long wanem as tru na oi man i laik hukum mipela?"

"Turangu yangpela, mipela i stap bilong ol man long kaikai, tasol ol i mas kaikai mipela gut na lusim sampela long mipela i stap. Sapos ol i pinisim mipela olgeta na bagarapim ples bilong mipela, bai i nogut pis bilong ol pikinini bilong ol long kaikai long bihain taim."

Bubu Bikmaus i toktok long pasim kibung: "Long pasim dispela kibung, mi laik givim tok lukaut long yupela olgeta long was gut taim yupela i go aut painim kaikai. Long nait taim yupela i silip, yupela i mas redi bai yupela i ken abrusim ol man nogut na abrusim ol kain kain posin nogut."

"Tenkyu Bubu Bikmaus, gutbai na bai mipela i lukim yu gen," Bata Bikmaus i tok pastaim long em na Susa Bikmaus i go raun painim ol gutpela ples bilong painim kaikai.

Long painimaut moa o long kisim moa toksave, ringim:
 Barbara Masike-PNG MCN Communications
 The Nature Conservancy Tel: 323 0699 Fax: 323 0397
 Email: barbara.tnc@global.net.pg



Raun wantaim Kanage olgeta wik!!

Kanage em bilong liklik ples Mukili long Nuku, Sandaun provins. Wanpela taim wanpela kiap i go na kisim em i go long wok long plantasin long Kokopo, Rabaul. Em i save tok pisin gut so masta long plantasin kokonas na kakau i kisim em long wok olsem hausboi.

Wanpela dei Misis bilong haus i laik kukim bret long aven. Em nau em i redim ol samting na em i redim na putim insait long aven na em i setim kilok na sanapim antap long tebol. Em nau em i tokim Kanage. "Yu bai putim yau long kilok na taim bret i tan kilok bai krai okei yu bai rausim bret long aven."

Em nau Misis i kisim kar na drai i go pinis. Okei Kanage i sindaun na lukluk long kilok na lukluk long aven na em i tok, "Hau bai kilok i lukim bret i tan na em bai krai. Maski mi kisim kilok na putim insait wantaim long bret na em bai lukim na i krai." Orait em i putim kilok insait long aven.

Yupela i save wanem, hat bilong paia i kukim kilok na bret na tupela wantaim i paia. Taim Misis i kam bek em i smelim bret i paia na em i lukim kilok i no stap long tebol. Na em i tok, "Kanage kilok we?" Kanage i tok, "Kilok i stap insait na lukluk long bret."

Orait Misis i opim aven na i lukim kilok i bagarap nab ret i tan nogut. Em i belhat na solapim Kanage na em i lap nogut tru.

Seim taim Masta i kam kamap na taim em i harim stori em tu i lap nogut tru long Kanage. Kanage i sem nogut tru na em i ronawe long nait i go long Rabaul na kalap long sip na em i go wok long Buka plantasin kokonas.

TOM RAINO
ROGINARA PLES
WEWAK, IS SEPIK PROVINS

Kanage em bilong Manus tasol em kam stap long Vanimo. Papa bilong em wok olsem wanpela kuskus bilong Vanimo General Hausik. Na ol i save stap long tower.

Kanage i gat wanpela gelpren long setelmen. Wanpela taim tupela go stori arere long nambis. Gelpren bilong em ya karim wanpela naispela bilum stret na nem i stap long bilum ya em Butterfly.

Tupela stori go go na Kanage em aigris pinis long dispela bilum. Na em tokim gelpren bilong em, 'anti, mi laikim dispela bilum stret, inap yu givim mi?' Bilum em nais tumas na gelpren bilong em tingting i go na tokim em, 'lewa, maski i gat

wanpela naispela tu mi wokim ya i stap. Bai mi givim yu. Nem i stap long dispela bilum ya em pistel.'

Kanage kirap tokim gelpren bilong em olsem, 'anti lewa em orait na orait tasol.' Kanage tokim gel bilong em, 'anti lewa em orait yu kisim i kam.'

Taim yu kisim i kam bai mi kisim na hangamapim long nek bilong yu na pulim yu raun raun. Na yu mas tok, Kanage ya right man with the right mind.' Kanage yet lap nogut na tokim gelpren bilong em, 'ating mi mas kisim wanpela pukpuk mama ya.' Em kirap lek pas long as na i go pinis.

SANDRA OLROU
VANIMO
SANDAUN PROVINS

Kanage em bilong Yerakai long hap long Ambunti, Is Sepik provins. Kanage em wanpela pies mangi na em i no save long kar. Wanpela taim Paps bilong Junior Kanage kisim Kanage i go long Maprik tupela kisim kanu long Ambunti kamap long Pagui kisim kar na raun i go insait long Maprik.

Na taim draiva i spitim kar Kanage kirap na tokim Paps bilong em 'papa tokim draiva stopim kar bai mitupela i go daun na wokabaut i go.' Na Paps tokim Kanage 'hei longwe yet ya'. Kanage i poretim kar pinis olsem na em tok olsem.

HENSON MINDOBU
AMBUNTI
IS SEPIK PROVINS

Kanage em seken bon long famili, em i gat wanpela fes bon brata na narapela las bon sista i stap. Wanpela taim Kanage em i go long Lae wantaim wanpela waitman long bas.

Tupela i sindaun long wanpela sit na i go. Klostu long Makam dispela waitman i askim Kanage long introdusim famili bilong em. Kanage em kirap nogut na tok, "He born forward I after and she backfire me, we all take the short cut rot and came."

Na waitman em i faol long toktok bilong Kanage na em i askim em "Are you crazy?" Na Kanage em i ting olsem ol bai go bam long wanpela hap na em kwik taim tokim draiva long stop na em i kalap i go daun na wokabaut i go long Lae.

WILLSON JOHN
MT HAGEN
WESTEN HAIENS PROVINS





Laikim Penpren

Nem: Florence Boyap
 Krismas: 18 (meri)
 Adres: Papitalai Secondary School, PO Box 149, Lorengau, Manus Province
 Save laikim: Harim musik, danis, raitim pas na pilai basketbol.

Nem: Audrey Kaluwin
 Krismas: 16 (meri)
 Adres: Kimbe Secondary School, PO Box 225, Kimbe, West New Britain Province
 Save laikim: Pilai volibol, soka, basketbol, skelim musik, mekim fani, kukim kaikai, go lotu na raitim pas.

Nem: Daniel Bosa
 Krismas: 24 (man)
 Adres: PO Box 3726, Lae, Morobe Province
 Save laikim: Pilai spot, pilai gita, tok pilai, harim musik, serim aidia na raitim pas.

Nem: Hagai Zemo
 Krismas: 24 (man)
 Adres: Mumbe Bros, PO Box 4249, Boroko, NCD
 Save laikim: Pilai soka, volibol, lukim TV nius, mitim ol pren na planti moa.

Nem: Bernice Amoah Afram
 Krismas: 18 (meri)
 Adres: Atterbury Road, PO Box CC562, Cape Coast, Ghana, West Africa
 Save laikim: Ridim buk, ronim baisikol, lukim TV, pilai ol gems, raun lukim ples na senisim presen.

Nem: Ben Afram
 Krismas: 21 (man)
 Adres: Atterbury Road, PO Box CC562, Cape Coast, Ghana, West Africa
 Save laikim: Pilai spot, ridim buk, lukim soka long TV na raun long ol ples.

Nem: Luddy Dambui
 Krismas: 15 (meri)
 Adres: Mercy Secondary School Yarapos, PO Box 580, Wewak, East Sepik Province
 Save laikim: Pilai soka, volibol na basketbol, wokim skul wok na go lotu.

Nem: Edwik Bogosia
 Krismas: 16 (meri)
 Adres: Mercy Secondary School Yarapos, PO Box 580, Wewak, East Sepik Province
 Save laikim: Pilai soka, volibol na basketbol, wokim skul wok na go lotu.

Nem: Annette Mamogoba
 Krismas: 17 (meri)
 Adres: Popondetta Secondary School, PO Box 154, Popondetta, Oro Province
 Save laikim: Raun wantaim ol pren, go long pati, raitim pas na senisim poto na presen.

Nem: Bervelyne Puturuku
 Krismas: 21 (meri)
 Adres: Bishop Wade Secondary School Tarlena, PO Box 220, Buka, Bougainville Island
 Save laikim: Tok pilai, pilai soka na senisim poto.

Nem: Roselyne Hongopo
 Krismas: 21 (meri)
 Adres: Bishop Wade Secondary School Tarlena, PO Box 220, Buka, Bougainville Island
 Save laikim: Pilai volibol, tok pilai wantaim ol pren na raun lukim ol pren.

Nem: Florian Nakunawe
 Krismas: 18 (man)
 Adres: Ponini Agricultural Technical High School, PO Box 249, Kimbe, WNB
 Save laikim: Droim piksa, ridim na raitim pas, pilai spot, skelim ol namba long musik, senisim poto na presen na tu salim tingting long ol poro stap longwe.



STORI TUMBUNA

LONG bipo, bipo tru i gat tupela meri i stap. Nem bilong tupela olsem, Gras meri na Taro meri. Tupela i pren gut tru na i stap wantaim, slip, kaikai wantaim. Tasol wokabaut na wok bilong tupela i narakain olgeta.

Taro meri, em i save wokim gaden taro olgeta taim na Gras meri i save wokabaut tasol long ol gras na digim as bilong ol gras na kam kukim kaikai olgeta nait. Na Taro meri i save raun long gaden taro bilong em na digim na i save kam kukim kaikai olgeta apinun.

Wanpela apinun, Taro meri i kam hariap long san na kukim na em kaikai. Em i givim ol pikinini bilong em pinis na bihain em i givim sampela long ol pikinini bilong Gras meri. Ol i no kaikai gut olsem na hap i pundaun i go long sit bilong paia. Taro meri i lukim olsem na i kros i tok, hei yupela holim gut na kaikai. Mama bilong yu i no inap givim yu dispela kain kaikai. Em bai givim yu as bilong ol gras tasol; na be bilong yu bai pulap tasol long gras.

Taim Taro meri i wok long krosim ol pikinini bilong Gras meri, em yet i bin kam pinis na sanap arere tasol long haus na ol tok ya em i harim pinis na em i sem nogut tru. Em i stap liklik na i kam insait na kukim kaikai na kaikai. Em i pinis na i go daun arere long wara na em i singautim ol rokok. Bihain em i kam bek long haus na

Taro meri na gras meri



singautim narapela meri ya i tok hei poro, yu laitim bombom na yumi tupela go holim ol rokok. Orait nau tupela i laitim bombom na bihainim wara i go antap isi isi. Tupela i holim planti rokok tru. I go i go na tupela i kamap long ples nogut olsem wara i save kalap long en.

Nau na Gras meri i go antap pastaim na em i tokim Taro meri olsem, poro, han bilong yu i kam antap. Orait nau na narapela meri ya i putim han bilong em i go antap na Gras meri i pulim em i go antap isi. Em i pulim em i go antap isi nau na em i lusim em i pundaun. Turangu Taro meri ya i pundaun stret long wanpela traipela ston na em i dai. Gras meri ya i pulim em i go na tromoim em long wanpela bikpela raun wara na Taro meri i

kamap olsem traipela ston i stap namel long dispela raun wara.

Gras meri i kambek long haus na tokim ol pikinini bilong Taro meri ya olsem, wara i tait bikpela tru na i bin karim mama bilong ol i go pinis. Ol ting i tru tasol em meri i bin giamanim ol tasol.

Nau em wanpela tasol i stap na lukautim pikinini bilong em na bilong narapela meri ya tu na em stap lukautim tu ol gaden taro tu. Olsem na ol bikpela man i save tokim mipela olsem, sapos wanpela man o meri i save poroman gut wantaim yu na i save raun, slip na kaikai wantaim yu, yu mas no ken tok nogutim em o tok baksait long em. Sapos yu mekim olsem orait bai sampela taim bihain yu ken painim taim nogut olsem dispela Taro meri.

Mi wari na mi laikim helpim

Dia Laiplain,
 Taim mi go long skul yet, long dispela skul i gat tambu long mipela ol boi i toktok wantaim ol meri. Na ol meri tu i tambu long toktok wantaim mipela ol boi. Nau dispela kain tambu i karamapim mi na pren meri bilong mi.

Mitupela i wok long wanpela kampani tasol. Tasol mitupela i painim hat long sanap toktok wantaim. Mitupela i sem na i pret. Sampela taim mitupela i save toktok long telipon, tasol i gat lo long kampani mipela i tambu long yusim telipon long toktok wantaim ol pren.

Olsem wanem na mitupela inap skul long toktok wantaim mitupela, na mitupela i no ken sem long dispela samting?
Ashamed

Dia Pren,
 I tru sampela skul i gat bikpela tambu long ol boi na ol meri i no ken toktok wantaim. Na kain pasin olsem inap long mekim yu na meri ya i sem long toktok wantaim nau.

Tasol yutupela yet i no save sem tru long toktok wantaim - long wanem yutupela i amamas moa long toktok long telipon. Ating yutupela i sem tasol sapos ol arapela pipel i lukim yutupela i toktok. Em tasol. Na sapos yu na

meri i sem long toktok wantaim, em tu i pasin bilong boi na meri. Bihain bai yutupela i save gut long yutupela, bai i nogat sem moa.

Namba wan pasin bilong winim wari bilong yu em hia: yutupela i mas painim wanpela ples we i nogat man, na yutupela tasol i ken sindaun toktok na ol arapela pipel i no ken lukim yutupela. Tasol sampela taim meri i pret sapos yu laik bringim em i go long kain ples olsem. Em bai pret yu laik mekim samting nogut long em.

Narapela we em long yutupela i go sanap toktok long wanpela ples i pulap tru long pipel. Olsem long wanpela bikpela stua, o wanpela ples kaikai.

Yutupela i ken pasim tok long go long dispela hap long taim bilong painim kaikai long belo. Yutupela i kaikai na toktok liklik...na isi isi bai yutupela i no sem long ol arapela pipel i lukim yutupela na yutupela i no sem sapos ol manmeri nating i lukim.

Ating yu bikpela pinis nau na yu mas senisim sampela aidia i save pas gut long ol skul mangi.

Olsem wanem? Yu ting em i rong tru long toktok nating wantaim wanpela meri? Ating



tisa bilong yu tu i no ting olsem. Ol i bin mekim tambu long skul bikos ol i gat strongpela kristen bilip i tok: boi na meri i no ken pilai na slip wantaim sapos tupela i no marit yet....

Olsem na ol i wari long dispela na i mekim tambu. Na long planti ples bilong Papua Niugini ol tumbuna tu i holim dispela wankain tambu tasol.

Long kristian kantri dispela tambu long mekim maritpasin, em i no min ol boi na meri i tambu long toktok wantaim. Nogat. Tasol hia long PNG i gat sampela ples we i tambu long meri i toktok wantaim wanpela boi, sapos em i no wanfamili o wanpisin bilong em.

Sapos dispela pasin bilong ples i as bilong wari bilong yu, orait, mobeta papamama bilong yu i stretim tok wantaim papamama bilong meri. Orait, bai olgeta pipel long ples i ken save papamama i bin makim dispela meri long yu, na bai yu no sem moa long toktok na wokabaut wantaim em.

Yutupela i no skuimangi moa. Yutupela i bikpela manmeri. Ol to bilong skul i pinis nau long laip bilong yutupela. Ol bikpela manmeri i no painim samting i rong saopos boi o toktok nating wantaim meri. Na sapos ol i kirap toktok long yutupela i pren o kain tok olsem, maski, mi samting nating. Yutupela i mas mekim gutpela pasin long ai bilong ol pipel, na yutupela i noken wari, na yutupela i no ken sem.

Toktok wantaim meri em i no rong. Yu mas bilipim tru dispela tok. Na yu mas stat long tingting olsem: maski long toktok bilong ol pipel.

Mitupela i no mekim rong. Sanap olsem bikpela man na meri tru. Na gut lak long yutupela.

MI LAIPLAIN

Sapos yu gat wari o hevi, rait i kam long Lifeline, P O Box 6047, Boroko, NCD. Yu ken ringim mipela tu long telipon namba 3260011. Raitim trupela nem na etres bilong yu i kam na bai mipela i salim bekim long pas bilong yu. Mipela bai toktok long ol trupela samting yu askim long em tasol bai mipela i no inap long putim trupela nem bilong yu. Laiplain



Bisnis bilong Groim Diwai insait long PNG - Planim diwai long ol renfores eria

Rot bilong groim ol spisis diwai i save groa insait long PNG

Elaeis guineensis (wel pam)

Nem bilong en: wel pam

Ples diwai i kam long en: Em i kamap long Wes Afrika tasol nau em i save groa long planti kantri we san i save hot tru olsem Thailand, Saina, Malaysia, Indonesia, PNG na Filipins.



Wanem kain diwai: Wanpela diwai i nogat han bilong en na em i save groa i go inap long 20 na 30 mita na namel bikpela bilong namel bilong em i nap namel long 22 na 75 sentimita. Het bilong em i gat namel long 40 na 60 lip na wanpela raun long ol lip indai pinis. Longpela bilong wanpela lip i ken go inap long 7.5 mita na i gat namel long 60 na 160 lip i stap antap long wanpela bun. Bihain, taim ol i pundaun lusim diwai skin bilong em i save smut. Plaua i save kamap bihain long olgeta namba tu pundaun bilong lip. I gat samting olsem 1500 prut we i pepel taim em i yangpela na i save tanim i go orens na ret. Hevi bilong ol inap long 30 kilogram o i go moa yet. Longpela bilong wan wan prut inap long 4 sentimita.

makau na long rausim win insait long bel. Yu ken yusim skin bilong kokonas long planim ol arapela plaua. Ol rop insait long skin em yu ken yusim bilong mekim ol mat na matras. Strongpela sel bilong em ol i save yusim long mekim ol henkraf. Yangpela grin kru bilong em yu ken kaikai olsem kumu.

Birua bilong em: Em i save groa isi isi; bikpela hat wok long rausim mit bilong prut.

Ples we em i save groa: Em i save groa bihainim ol wara aninit long graun o long ol pres wara tais o long ol arapela ples we fores i bagarap na i gat planti lait. Em i save laikim 2000 mm ren o moa long ples hot. Em i save groa long kain kain graun.

Karim na wok bilong en: Prut bilong em namel long 45 na 120 prut long wanpela diwai long wanpela yia. Kopra - namel long 2.5 na 3.5 tan long wanpela hekta long wan wan yia. Paiawut - i no gutpela tumas tasol yu ken yusim. Em i save mekim gutpela sit bilong paia.

Rot bilong groim: Groim wantaim pikinini diwai o sidling. Yu ken groim insait long neseri inap namel long 5 na 6 mun bihain long kru bilong em i groa gut. Em i ken sindaun groa long san insait long neseri.

Sid tritmen: Katim hul long skin bilong em. Putim insait long wara inap long tupela wik. Em bai orait inap long tupela yia.

Menesmen: Sapos yu givim wara long taim bilong drai, bai yu karim planti moa prut. Planim ol arapela diwai aninit long het bilong kokonas i ken apim namba bilong prut.

Agro forestry Wok: Yu ken groim wantaim yam, tapiok, taro, kopi na ol arapela spais. Planim wantaim banana inap long tupela yia o miksim wantaim ol prut plantesen olsem ol mango, kakao, raba, na muli samting. Ol bulmakau i ken kaikai gras insait long ol kokonas plantesen bihain long em i namel long 6 na 8 krismas. I noken moa long 2 na 3 bulmakau

Strong bilong em: Prut i gat kain kain wok bilong en. Yu ken yusim long mekim ol pos, sanapim banis wantaim, yu ken kaikai, dring wara bilong em, mekim banis bilong haus, basket, ol mat bilong sindaun, bros, brum, plet, spun na pok, mekim bia long en na tu yusim wel bilong em. Yu ken yusim diwai bilong em long katim timba. Ol arapela wok bilong en em ol wel na gris. Yusim olsem marasin olsem marasin bilong kilim ol snek insait long bel bilong ol pik na bul

MCCARTHY & ASSOCIATES (FORESTRY) PTY. LTD.

National & International Forest Consultants

mccaf@datec.net.pg

"Long kisim tok stia long olgeta wok diwai"

Inglen saveman bilong binatang givim skul long ol agrikalsa saintis

James Kila i raitim

WANPELA saveman bilong ol kain binatang nogut we i save bagarapim ol kes krop olsem kopi, muli na ol arapela samting olsem kasava o tapiok i bin kam long PNG long givim skul insait long wanpela baio-kontrol wok-sop wantaim ol agrikalsa saveman long rot bilong daunim ol sik long ol kes krop.

Dispela wanpela wik woksop i bin kamap long Ricky Mitio Konfrens Senta long Aiyura Veli insait long Isten Hailans provins las wik.

Dokta Sean Murphy i bin givim skul long moa long 30 teknikel saveman bilong Kopi Industri Koporesen (CIC), Nesanel Agrikalsa Riset Institut (NARI) na ol sampela opisa bilong Smolholda Sapot Sevises Pailot Projek (SSSPP).


Insait long woksop Dokta Murphy i givim strongpela toktok olsem maski wanem kain skul o trening ol saveman i kisim ol i mas karim dispela save i go aut long fil na ol lain fama o liklik manmeri long ples i mas save. Wanem samting ol saintis i lainim em ol i noken putim tasol long pepa o raitim long buk. Ol i mas go aut na givim dispela skul long ol fama long haus lain na ol bai lainim ol dispela nupela samting long helpim ol long wok bilong agrikalsa long ples.

Dokta Murphy em wanpela lida insait long investiv spises menesmen long CAPI Baio-Sains insait long kantri Yunaitet Kingdom. Em i gat moa long 20 krismas save long ol binatang na tu ol gras notu we i save kamap na i ken kilim indai groa bilong ol kes krop.

Em i bin raitim planti buk pinis long dispela wok bilong em long ol kain kain rot bilong binatang nogut menesmen long ol.

Dispela wan wik woksop long Aiyura em Yuropien Yunien (EU) i sapotim wantaim helpim bilong mani na CIC i bin go pas long en wantaim Dokta Sean Murphy.

Plantil ol lain saintis i amamas tru long lainim ol planti nupela samting long sait bilong luksave long groa bilong ol binatang nogut na tu wanem kain ol gut-



• Dokta Sean Murphy i givim toktok long ol agrikalsa saveman long Aiyura.

pela rot long daunim ol dispela kain hevi.

Wanpela bikpela hevi bilong sik i kamap long binatang em ol lain saveman o saintis wantaim ol teknikel opisa bilong CIC na NARI na SSPP i bin lukluk long en em Grin Skeil. Dispela binatang i save bagarapim ol kopi diwai na tu ol narapela samting olsem muli na popo na ol arapela kaikai long gaden.

Ol opisa i mekim planti toktok tru long hevi bilong Grin Skeil na wanem ol rot long kontrolim ol dispela binatang. Ol i lukluk long rot bilong groa bilong dispela binatang na hevi em i ken kamapim long daunim prodak-sen bilong kopi taim em Grin Skeil i karamapim ol lip bilong kopi na rausim ol pipia bilong en we i save karamapim lip na kopi diwai i no inap kisim san.

Ol dispela opisa long dispela baio-kontrol woksop i bin mekim sampela lukluk raun i go aut long ol kopi gaden bilong ol fama insait long Aiyura veli na glasim dispela ol hevi Grin Skeil i save kamapim.

Sief Eksekutiv Opisa bilong CIC, Ricky Mitio long taim em i pasim dispela woksop i givim

bikpela tok tenkyu bilong em i go long Dokta Sean Murphy long givim taim bilong em ong kam long PNG long ronim dispela woksop.

Mista Mitio i tokim ol lain opisa husat i stap long dispela woksop olsem dispela ol samting ol i lainim em ol i mas holim gut na skulim ol lain fama long ples na hauslain komyuniti long bihainim.

Sief Saintis bilong CIC, Tom Kukhang i givim bikpela tok tenkyu bilong em tu long Dokta Murphy husat bipo i bin kam raun long PNG long 1985 long glasim ol kain kain wok bilong agrikalsa long kantri.

Bihain long dispela woksop, ol agrikalsa saintis na ol teknikel opisa i bin kamap wantaim wanpela Projek Plen Buk em ol yet i raitim bihain long dispela woksop na i givim i go long han bilong Mista Mitio.

Olgeta lain agrikalsa saveman ya i amamas tru long dispela woksop na tokaut olsem ol i lainim planti gutpela samting long en.



Cat® 428D Backhoe Loader

Raising the standards for performance, versatility operator comfort.

More than a machine. A Partner.

The 428D benefits from increased hydraulic performance and operator comfort, whilst maintaining the high levels of visibility, durability and reliability that Caterpillar Backhoe Loaders have long established in the industry.

- **Engine and Hydraulics** - The Caterpillar® 3054 turbocharged engine is designed for strength, performance and versatility. The load sensing, closed centre hydraulics system provides power where you need it, when you need it.
- **Operator Station** - Style, comfort, superb visibility and ease of operation maximise operator comfort and productivity.
- **Serviceability** - Excellent access and fewer maintenance requirements add up to unparalleled ease of service.

Hastings Deering



PORT MORESBY
Phone: 300 8300
Fax: 325 0141

LAE
Phone: 472 2355
Fax: 472 1477

TABUBIL
Phone: 548 9045
Fax: 548 9155

RABAU
Phone: 962 1244
Fax: 962 1129



Radio Australia
Tok Pisin News

Radio Australia
101.9 FM Port Moresby

Tok Pisin Service
6am - 7am : 6080, 7240 (KHZ)
7pm - 8pm : 5935, 6029, 9710, 1250 (KHZ)

PACIFIC BEAT

Planti toktok long ol Saina bisnis insait long Pasifik

ENUEL kibung bilong ol Pasifik Ikonmik Minista i bin pinis long Tuvalu long wik i go pinis na ol patisipen i kamap wantaim sampela bikipela tingting long menesim gut ol pablik sevis. Ol bikipela het tok ol Pasifik Aifans Forum Ikonmik Ministas Miting (FEMM) bai karamapim ol telekomunikesen kampani na ol kampani i save givim pawa. Dispela kibung i harim tu sampela bel hevi i kam long Solomon Ailans long sait bilong ol liklik bisnis we ol Saina manmeri i wok long bosim.

Man i askim: James Panichi

Husat i bekim: Bikenibeu Paeniu, Fainens Minista bilong Tuvalu; Greg Urwin, Sekretri Jenerel bilong Pasifik Ailans Forum; Fred Fono, Minista bilong Nesenel Plening bilong Solomon Ailans.

PANICHI: Siaman bilong FEMM long dispela yia, Minista bilong Fainens, Ikonmik Plening na Indastris, Bikenibeu Paeniu i tok pablik bisnis i nogat gutpela nem insait long Pasifik. Em i tok klia long tingting bilong em long ol nius ripota long Funafuti long wik i go pinis.

PAENIU: Ol i stap samting olsem ol milien dola i stap we em i mani bilong pablik. Ol i mas givim long pablik ekspendisa aninit long ol gavman baset, long wanem yu save, olsem ol i save kaikai bikipela hap mani bilong gavman.

Olsem na em i bikipela samting tru. Mi amamas long dispela FEMM long wanem bikipela luksave i go long dispela hevi. Na em i kam bek long ol dispela bikipela het tok, we mipela i mas askim, long wanem na mipela bai go het wantaim wanpela kibung olsem? Sapos mipela i no inap long karimaut ol dispela samting long nesenel level taim ol i stap long as long strongim gutpela wok gavanens na gutpela wok pasin long kamapim gutpela laip bilong ol pipel bilong yumi.

PANICHI: Mista Paeniu i bin kisim askim long wanem ol samting i mas kamap long luksave olsem ol Pasifik Ailan kantri i mas bihainim ol dispela

disisen i kamap long kibung olsem FEMM. Em bikos sampela man i lukim olsem ol pipel i no lukim bikipela wok na ol i no wanbel long ol minista i raun na yusim bikipela mani long ol dispela rijinel kibung.

PAENIU: Yu tok stret. Dispela hevi em mi save toktok long en planti taim insait long kantri bilong mi, insait long palamen na insait long kabinet tu. Hia mipela i toktok long wankain samting na taim mi kam insait long ministri bilong fainens, olgeta samting i stap olsem nau ya.

PANICHI: Sekretri Jenerel bilong Pasifik Ailans forum, Greg Urwin i bin givim wankain bekim taim em i toktok long wanpela laspela pres konfrens long dispela kibung.

URWIN: Mi wanbel wantaim toktok bilong yu long karimaut wok na wanpela samting we mipela bai lukluk long dispela Pasifik Plen em long planti wok bilong FEMM bai go insait long ol yet na bai i gat strongpela wok bung. Sapos mipela i no inap long soim olsem wok mipela i mekim i ken strongim ol nesenel strateji, ol nesenel polis, nesenel wok, maski long mipela i mekim insait long rijen.

Yu mas kamapim dispela wok bung. Na dispela bai soim rot bilong yu long mekim wok karimaut. Nau samting ya i wok long groa, em bai sanap nau long strong bilong politikel tingting na wanem samting ol lida i laikim tasol mipela bai stat lukluk long ol rot we i gat ol agrimen i stap long rijinel level bai em i gat moa strong long ol samting mipela i mekim nau.

Narapela samting em mipela i mas wok. Dispela i sut stret long as bilong karimaut wok. I mas i gat ol nesenel level wok tu. Long wanem samting bai go het nau em long planti yia i go pinis i bin i gat planti wok i kamap insait long rijen long kain kain hap. Em i save senis i go long ol nesenel plen. Tasol em bai no inap senis i go long ol nesenel baset saikol.

Nau mi ting olsem sapos mipela i gat bikipela tingting long kamapim, ol kantri ol yet i mas kamapim ol nesenel plen we bai i larim ol i karimaut olgeta dis-

pela rijinel wok long painimaut wanem samting i stap insait long rijen na tanim i go bihainim ol nesenel sindaun bilong ol.

Na long narapela sait, larim ol kantri long tokim ol rijinel ogenaisesen long ol bikipela wok bilong ol.

PANICHI: Solomon Ailans Minista bilong Nesenel Plening, Fred Fono, i bin toktok tu na em i kirapim wanpela bikipela hevi taim ol i paitim toktok long daunim mani mak long wok bisnis insait long Pasifik.

FONO: Samting rijen i mas tingim em bikipela namba long ol Esia bisnis manmeri i wok long kam insait long rijen, long sait bilong ol bik ples Saina i kam na bosim ol bisnis we i mas i go long ol as ples manmeri bilong Pasifik.

Mi gat bikipela sapot i kam long ol arapela rijinel minista na dispela wankain hevi i wok long kamap long ol.

Bipo bai yu no inap long lukim ol Saina manmeri i lukautim ol ritel, holisel bisnis. Tasol nau sapos yu raun i go long kain kain hap insait long rijen, bai yu lukim planti Saina bisnis i bosim ol liklik tred stua we ol as ples manmeri i mas bosim.

Olsem na dispela kain kibung i mas lusim o givim pawa long Sekreteriet long wok long kamapim ol rot we mipela i ken strongim tingting bilong ol lokol manmeri long mekim wok bisnis. Wantaim dispela bikipela namba bilong ol Saina bisnis pipel insait long rijen, sampela long ol i save haitim tru mani bilong ol long takis, na ol i save traim haitim ol samting bilong ol long abrusim ol kastam duti na gavman i wok long lusim bikipela hap mani.

Mipela i paitim tok pinis olsem sampela kantri i wok long kamapim ol wok we ol i traim long makim ol Saina investa long bihainim ol lo bilong kantri.

PANICHI: Mista Fono i tokim kibung olsem Solomons i tok ol bai lukautim FEMM long neks yia long Honiara.

FONO: Long 5-pela o 6-pela yia i go pinis, mipela i nogat sans long lukautim ol rijinel kibung long wanem mipela i bin i gat bikipela hevi long kantri. Na nau mipela i stretim ol hevi bilong mipela na lo na oda i strong bek, em i gutpela sans long lukautim dispela rijinel kibung long soim olsem i gat bikipela bilip long Solomon Ailans. I no long dona komyuniti tasol. Long ol bisnis manmeri tu.

RADIO TOK PISIN PROGRAM
TUNE IN: 101.9 FM

Radio Australia Tok Pisin Program - stat long nun Mas 2005

MANDE Moring	6AM Stesen Op - Nius Hetlain - Musik na ol intaviu
6.30AM Nius na Karent Afes	
7AM Stesen Pas	
Nait	
7PM Stesen Op	
7.01PM Ol Hetlain na Program Priviu	
7.15PM Musik na Chit-Chat	
7.30PM Nius na Karen Afes	
8PM Helt	
8.15PM Musik	
8.30PM NIUS	
8.40PM Spots Riplei	
8.55PM Musik	
9PM Stesen Pas	
TUNDE Moring	
6AM Stesen Op - Nius Hetlain - Musik na ol intaviu	
6.30AM Nius na Karent Afes	
7AM Stesen Pas	
Nait	
7PM Stesen Op	
7.01PM Ol Hetlain na Program Priviu	
7.15PM Musik na Chit-Chat	
7.30PM Nius na Karen Afes	
8PM Mama Graun	
8.15PM Musik/Spots	
8.30PM NIUS	
8.40PM Helt Riplei	
8.55PM Musik	
9PM Stesen Pas	
TRINDE Moring	
6AM Stesen Op - Nius Hetlain - Musik na ol intaviu	
6.30AM Nius na Karent Afes	
7AM Stesen Pas	
Nait	
7PM Stesen Op	
7.01PM Ol Hetlain na Program Priviu	
7.15PM Musik na Chit-Chat	
7.30PM Nius na Karen Afes	
8PM Focus	
8.15PM Musik/Spots	
8.30PM NIUS	
8.40PM Mama Graun Riplei	
8.55PM Musik	
9PM Stesen Pas	
FONDE Moring	
6AM Stesen Op - Nius Hetlain - Musik na ol intaviu	
6.30AM Nius na Karent Afes	
7AM Stesen Pas	
Nait	
7PM Stesen Op	
7.01PM Ol Hetlain na Program Priviu	
7.15PM Musik na Chit-Chat	
7.30PM Nius na Karen Afes	
8PM Youth	
8.15PM Musik/Spots	
8.30PM NIUS	
8.40PM Focus Riplei	
8.55PM Musik	
9PM Stesen Pas	
FRAIDE Moring	
6AM Stesen Op - Nius Hetlain - Musik na ol intaviu	
6.30AM Nius na Karent Afes	
7AM Stesen Pas	
Nait	
7PM Stesen Op	
7.01PM Ol Hetlain na Program Priviu	
7.15PM Musik na Chit-Chat	
7.30PM Nius na Karen Afes	
8PM Wantok	
8.15PM Musik	
8.30PM NIUS	
8.40PM Youth Riplei	
8.55PM Musik	
9PM Stesen Pas	
SARERE	
Nait	
7PM Stesen op - Ol Nius Hetlain/Program Priviu	
7.05PM Musik na Chit Chat	
7.30PM Nius	
7.40PM Wantok	
8PM Lokal Ben	
8.30PM Nius	
8.40PM Musik/Chit Chat	
9PM Stesen Pas	
SANDE	
Nait	
7PM Stesen op - Ol Nius Hetlain/Program Priviu	
7.05PM Musik na Chit Chat	
7.30PM Nius	
7.40PM Femli Blong Serah (Radio Plei)	
8PM Lukluk Bek Long Wik	
8.30PM Nius	
8.40PM Musik/Chit Chat	
9PM Stesen Pas	

TOKSAVE: YU KEN HARIM RADIO AUSTRALIA TOK INGLIS LONG 24 AUA 7 DE LONG WAN WIK.

Pacific BEAT

Listen to Radio Australia
101.9 FM Port Moresby

4, 5, 6am & 4pm, 5pm
including sport

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.

RAGBI LIG

SP Lig Pom Mosbi

Sarere Jun 25, 2005
PRL 1
09:00 Magani vs West Res
10:30 Brothers vs Hawks A
12:00 DCA vs Waliya A
1:30 Magani vs West A
3:00 Kone Tigers vs Tarangau A

PRL 2
09:00 Brothers vs Hawks U17
10:00 DCA vs Waliya U17
11:00 Magani vs West U17
12:00 Waliya vs DCA U19
1:00 Magani vs West U19
2:00 Waliya vs DCA Res

PRL 3
09:00 Kone Tigers vs Tarangau U17
10:00 Brothers vs Hawks U19
11:00 Kone Tigers vs Tarangau U19
12:00 Brothers vs Hawks Res
1:30 Kone Tigers vs Tarangau Res

Sande Jun 26, 2005
PRL 1
09:30 Puma vs Paga Panthers A
11:00 Royals vs Souths A
12:30 Dobo vs Defence A
2:00 School Boys Development Squad

3:00 B/B Bulldogs vs Agmark Gurias SPC

PRL 2
09:00 Royals vs Souths U17
10:00 Dobo Warriors vs Defence U19
11:00 Royals vs Souths U19
12:00 Puma vs Paga Panthers Res
1:30 Royals vs Souths Res

PRL 3
09:00 Dobo vs Defence U17
10:00 Puma vs Paga Panthers U17
11:00 Puma vs Paga Panthers U19
12:00 Dobo vs Defence Res

SOKA

Evadahana Soka Asosiesen

Sarere Jun 25, 2005
ESA 1
08:00 Batisalem vs Gala Konok D3
08:40 Raitopos vs Natara D2
09:20 Finka vs Simbai Utd meri
10:00 Gara Utd vs K-Imindos meri
10:40 Gee Neps vs Kilengs Res
11:10 Junctions vs Finka Res
11:50 D-Rats vs Gara Utd D1
12:40 Siale vs Gee Neps meri
13:20 TKSS vs Country Roots D2
14:00 Wasu Crabs vs Texas meri
14:40 K-Tops Mahnduz vs K-Imindos D3
15:30 Siale vs Sulu D1

ESA 2
08:00 D-Rats vs Namagawi meri
08:40 Simbai Utd vs Outsiders D2
09:20 Gala Konok vs Sulu Res
10:00 TKSS vs Nen Konok D3
10:40 Natara vs Gara Utd Res
11:10 Wopa Utd vs Wasu Crabs D2
11:50 K-Top Mahnduz vs Natara meri
12:30 Sapphire vs Batisalem meri
14:20 Liwale vs Gee Neps D1
15:10 Graveside vs Finka D1

Sande Jun 26, 2005
ESA 1
08:00 Country Roots vs AGM Roots D3
08:40 Siale vs Simbai Utd meri
09:20 Nen Konok vs K-Imindos D2
10:00 D-Rats vs Kilengs Res
10:40 Wasu Crabs vs Gala Konok D3
11:10 Kilengs vs Batisalem meri
11:50 Nalas vs Liwale D1
12:40 Gala Konok vs Texas D1
13:20 Simbai Utd vs K-Top Mahnduz D2
14:00 Liwale vs Nalas Res
14:50 Gee Neps vs Gara Utd D1
15:50 Gaidi vs Graveside D1

ESA 2
08:00 Texas vs Gara Utd meri
08:40 Sapphire vs Simbai Utd D3
09:20 Graveside vs Gaidi Utd meri
10:00 Brothers vs AGM Roots D2
10:40 Notna vs Outsiders D3
11:10 TKSS vs Natara D2
11:50 Namagawi vs BS Natives D1
12:40 Names vs Finka D1
13:20 Sapphire vs Junction meri

14:10 Names vs Gara Utd Res
15:00 D-Rats vs Kilengs D1

PMSA

Sarere Jun 25, 2006
Bisini 1
08:00 B/Kumul vs Mirel Momase U21
09:30 Verave vs Orogen D2
10:30 Jaha vs Los Negros W1
11:50 University vs Cosmos WP
13:10 Sunset vs Mopi Soweto W1
14:20 Guria vs Badili Utd D1
16:00 PS Rutz vs Kurti Andra P

Bisini 2
08:00 University vs LBC Defence P/Res
09:30 Cosmos vs Souths Utd U21
10:30 Bavaroko vs Cellnet D1
11:50 Rapatona vs Sunset U21
13:10 Naniu vs Sobou W1
14:20 University vs LBC Defence Premier
16:00 Souths Utd vs Cosmos Premier

SJGS - Oval 1
08:00 Telikom vs Korion D2
09:20 Lus Prutz vs Tarangau D2
10:30 Souths Utd vs Cosmos P/Res
11:50 PS Rutz vs Kurti Andra P/Res
13:05 Guria vs Badili Utd U21
14:15 Cellnet vs Los Negros U21
16:45 B/Kumul vs Mirel Momase P/Res

Sande Jun 26, 2005
Bisini 1
08:00 Rapatona vs Sunset P/Res
09:20 PS Rutz vs Kurti Andra U21
10:30 Telikom vs PNG Gardener WPC
11:50 LBC Defence vs Mungkas W1
13:10 Murat vs Lamana GFN WP
14:20 Murat vs Manambu D1
16:00 Rapatona vs Sunset Premier

Bisini 2
08:00 University vs LBC Defence U21
09:20 Souths Utd vs Tawala W1
10:30 PS Rutz vs Guria WP
11:50 Naniu vs Ela Utd D1
13:10 WMI vs Rapatona WP

14:20 Mungkas vs Pacifica Utd D1
16:00 B/Kumul vs Mirel Momase Premier

SJGS - Oval 1
08:00 Tawala vs Tarangau D2
09:20 Maset vs Sobou D3
10:30 Bomana PC vs KG Utd D3
11:50 Nomads vs Mopi Soweto D3
Note: All other D3 games will be played at a later date due to shortage of playing fields.

BASKETBOL

CBL

Sarere 25/06/05
Kot Wan
8:30 Exodus vs Titans U19B
9:30 Exodus vs Titans U19G
10:30 Exodus vs Titans RW
12:00 Exodus vs Titans RM
1:30 Exodus vs Titans AW
3:00 Exodus vs Titans AM

Kot Tu
8:30 Muruks vs Saints U19B
9:30 Muruks vs Saints U19G
10:30 Muruks vs Saints RW
12:00 Muruks vs Saints RM
1:30 Muruks vs Saints AW
3:00 Muruks vs Saints AM

Sande 26/06/05
Kot Wan
8:30 Tamaraws vs Chariots U19B
9:30 Tamaraws vs Chariots U19G
10:30 Tamaraws vs Chariots RW
12:00 Tamaraws vs Chariots RM
1:30 Tamaraws vs Chariots AW
3:00 Tamaraws vs Chariots AM

Kot Tu
8:30 Souths vs Jazz U19B
9:30 Souths vs Jazz U19G
10:30 Souths vs Jazz RW
12:00 Souths vs Jazz Rm
1:30 Souths vs Jazz AW
3:00 Souths vs Jazz AM

VOLIBOL

FAIRFAX

Sir John Guise Indoor Stadium
Sarere Jun 25, 2005
Kot 1 (meri)

08:30 Wet vs Fire Fox WAR
09:30 TI Doria vs Badili Hides WAR
10:30 Kakidos vs Dolphins 1 WAR
11:30 Telikom vs Lagoons WA
12:30 Arnotts vs Badili Hides WA
1:30 Trans Hi Way vs Frenz WA
2:30 Fire Fox vs 14 Mixers WA

Kot 2 (meri)
08:30 Telikom vs Dolphins 2 WAR
09:30 Yonkies vs Arnotts WAR
10:30 14 Mixers vs Trans Hi Way WAR
11:30 Freeway Hox vs Seeto Kui WAR
12:30 Dolphins vs Esi Loan Neibas WA
1:30 TI Doria vs Yonkies WA
2:30 Badili Hides vs Esi Loan WA

Kot 3 (man)
08:30 Lagoons vs Wet MAR
09:30 Badili Hides vs Frenz MAR
10:30 Esi Loan Neibas vs Telikom MAR
11:30 14 Mixers vs Kakidos MA
12:30 Esi Loan Neibas vs TI Dorua MA
1:30 Lagoons vs Yonkies MA
2:30 Moukele vs Dolphins MA

Kot 4 (man)
08:30 Kakidos vs Dolphins MAR
09:30 TI Doria vs Arnotts MAR
10:30 Freeway Hox vs Fire Fox MAR
11:30 14 Mixers vs Moukele MAR
12:30 Telikom vs Seeto Kui POM MA
1:30 Frenz vs Arnotts MA
2:30 Wet vs Fire Fox MA

Toksave

Sapos yu laik putim spot dro bilong yu long Wantok Niuspepa orait salim i kam long feks namba 325 2579, email word@global.net.pg o ringim Wantok Spot Des telepon namba 325 2500.

trukai
RICE

21 06 2005

PAY **P.N.G SPORTS FEDERATION**

THE SUM OF **THREE HUNDRED & FOURTEEN THOUSAND NINE HUNDRED KINA ONLY** K 314,900.00

SIGNED [Signature]


• L-R Trukai jenerol menesa Bret Schofield, PNG Spot Federesen jenerol seketeri Sir John Dawanincura Kt. na Trukai Industri menesing dairkta Phil Franklin.

Long dispela yia PNG Spot Federesen i kisim K314,900 long Trukai Fan Ran. Dispela iem i bikpela mani tru long ol yia em Federesen i bin holim long ol ron, Spot Federesen jenerol seketeri Sir John Dawanincura i tok taim em i kisim dispela mani. Em i tok Federesen bai yusim dispela mani long salim tim go long Palau mini Saut Pasifik Gems long narapela mun tasol. Em bai yusim tu sampela long 2006 Komenwel Gems long Melbon, Australia.



• PNG Spot Komisen long dispela wik i sainim wanpela Memorandum ov Agrimen (MOA) wantaim Nesanel Voluntia Sevis long tupela bai wok bung wantaim long strongim dispela tingting bilong voluntia sevis.

PNGSC wantaim helpim mani i kam long PNG Silva Jubili spot Progrem i sponsaim na trenim 13-pela NVS long mekim wok olsem spot edministreta, kosa na trena long wanwan ol spot olsem soka. basketbol, volibol, ragbi na sampela moa. Aninit long dispela agrimen PNGSC bai givim K40,00-K50,000 long ol NVS husat i mekim wok bilong spot. Minista bilong Komyuniti Developmen Ledi Carol Kidu i stap tu long dispela saining. Foto: A/MOLEN



• Lydia Veali bilong Telstra i redi long skoa. Long sapatim em em yangpela tasol bikpela gol suta Tiata Baldwin. Baldwin i givim hat taim long Koinimo tim long Pot Mosbi netbol pilai.



• Salens: Greg Kairi bilong June Vali Praimeri Skul i laik ronawe long tupela pilaia bilong Ted Diro Praimeri Skul long skul soka long Sir John Guise Stedum.



• Pot Mosbi skul AFL: Winnie Ben bilong Taurama Praimeri (I) i kikim bal na pilaia bilong Idubada i laik traim long stopim long pilai bilong ol long anda 15 divison. Ol skul meri nau i kilim skin long pilai osi ruls.



Basim gut...Tupela pilaia bilong Rebels i blokim bal long pilai bilong ol egsim Marunone long NCD volibl long Taurama Lesa Senta.



• Givim mi... Pilaia bilong Defence i laik kisim bal long poro bilong em na hatim skin long banis bilong ol Crusaders long Pot Mosbi ragbi yunion resis long Bava Pak.



• Wina bilong 91+ divison G. Weenick bilong Niu Silan i kisim taim nogut long han bilong B. Brambridge bilong Tahiti long Osenia Sempionsip long Sir John Guise Indo Stedum. Ol foto: ANDREW MOLEN



NRL NIUS




• (Long lep han) BRISBANE Broncos i luk olsem bai bungim hevi long ol yia i kam bihain long tripela hatpela man bilong em, Tonnie Carroll, Sam Thaiday na Neville Costigan i risain long klab long aste. Long nau yet Carroll i stap long sait lain bihain long em i kisim bagarap long lek bilong em. Tasol gutpela nius long em i kisim tupela gutpela man- Casey McGuire na Corey Parker i kam long kisim ples bilong ol stap wantaim klab long narapela tripela yia.


• NUPELA Gold Coast tim long NRL i lukim ful bek bilong Penrith Panthers Preston Campbell i namba wan NRL pilai long sain wantaim ol. Gold Coast tim bai stat long pilai long NRI long 2007. Campbell bai stap yet wantaim Panthers inap long 2006 tasol bihain long dispela em bai lusim na pilai wantaim Gold Coast. Dispela 28-yia man i tok em i putim han bilong em i go antap sapos em mas kamap namba wan kepten bilong tim. Campell i statim primia pilai wantaim Gold Coast Charges long 1998.



• Nau yet sampela toktok i kamap long bikpela fowet bilong Brisbane Broncos Shane Webcke long em i kamap long mak we em i mas pinis long pilai. Tasol Webcke i ting olsem em i strong yet long pilai maski kain tingting i kamap. Em i tok wanpela man tasol husat bai tokim em olsem taim bilong em long pilai i pinis em long kosa bilong em Wayne Bennett na i nogat narapela man bai tokim em long pinis.



• SYDNEY Roosters kepten Luke Ricketson i tok Orijin i bin kisim taim bilong planti tim long pilai gut na em ting dispela i bagarapim as we ol i stap pilai. Long dispela as em i laikim i moa gutpela sapos Orijin i mas pinis.



• Oh noken! Blues Mark Gasnier na Maroons Matt Sing i kalap na resis long kisim bal long namba tu Stet ov Orijin pilai long Telstra Stedum long Sidni las Trinde. Blues win 32-22. Namba tri Stet ov Orijin pilai bai kamap long Lang Pak long Julai 6 long painim wina.

Raun 16

Fraide, Jun 24 -
Dragons vs West Tigers. Yu ken lukim long EMTV long 8.30 long nait.

Sarere, Jun 25 -
Raiders vs Cowboys
Roosters vs Eels
Knights vs Panthers

Sande, Jun 26 -
Sea Eagles vs Bulldogs. Yu ken lukim dispela long EM TV long 4:00-6:00 avinun.

Storms vs Rabbitohs
Warriors vs Broncos
Bai: Sharks

NRL Poin Lata (after rnd 15)

Klab	P	W	D	L	B	P/D	Pts
1 Broncos	14	12	0	2	1	145	26
2 Eels	14	10	0	4	1	85	22
3 Sea Eagles	14	10	0	4	1	51	22
4 Cowboys	13	8	0	5	2	62	20
5 Sharks	14	9	0	5	1	8	20
6 Dragons	15	9	0	6	0	54	18
7 Storm	14	7	0	7	1	113	16
8 Roosters	13	6	0	7	2	17	16
9 Raiders	13	6	0	7	2	-44	16
10 Bulldogs	13	5	1	7	2	-27	15
11 Warriors	14	6	0	8	1	23	14
12 Wests Tigers	14	6	0	8	1	-48	14
13 Panthers	14	5	0	9	1	-20	12
14 Rabbitohs	14	3	1	10	1	-147	9
15 Knights	13	0	0	13	2	-272	4

* P: Pilai, W: Win, D: Dro, L: Lus, B: Bye, P/D: Poin Diferens, PTS: Poin

Top 10 poin skora

Pilala	Tim	Poin
1. Hazem El Masri	Bulldogs	140
2. Luke Covell	Sharks	124
3. Michael Witt	Sea Eagles	122
4. Brett Hodgson	Sharks	116
5. Luke Burt	Eels	108
6. Darren Lockyer	Broncos	107
7. Preston Campbell	Rabbitohs	104
8. Clinton Schifcoske	Raiders	88
9. Matt Orford	Storms	86
10. Josh Hannay	Cowboys	78

• Blues hap bek Andrew Johns i wet long kamap kepten bilong Blues bihain long Danny Buderus i kisim bagarap.



Lae holim tupela pilai

...i kam long bek pes SP Kap kamap hot

LONG tupela SP Kap pilai we bai kamap long dispela Sande Chemica Cowboys bai mekim olgeta samting long skruim yet dispela gutpela ron bilong ol long win LBC Lae Bombers long wanpela pilai. Na long narapela pilai Mabey & Johnson Mendi Muruks bai brukim bun wantain Pot Mosbi Monier Broncos.

Na long ol narapela pilai we bai kamap long Pot Mosbi na Goroka em Toyota Enga Mioks bai bungim as ples Coca-Cola Lahanis long Goroka na Agmark Rabual Gurias bai pait wantaim Pot Mosbi Brian Bell Bulldogs.

Ol Cowboys i bin autim tiket bilong Broncos 27-6 long Pot Mosbi las wiken na olsem ol bai gat bikpela plen long go het long lukim narapela win.

Kosa bilong Cowboys Bobby Ako bai kisim wankain lain ap olsem em i yusim long pilai egensim ol Broncos long las wik.

Long fowet em bai yusim tupela prop em Peter Noki na Rodney Pora. Stap long seken rowa em Leo Koipa na Simon Iyan na huka bai Richard Gary. Long stap long lok em Fred Tom.

Long go pas long beklain em hap bek Isaac Wek husat bai kisim helpim long fai eit Rex Ray. Na long stap senta em kepten Robert Beni na Francis Ray. Ol winga em Jack Gilip na Kupa Rumints na fulbek em Rueben Ruing.

Long ol Bombers bihain long ol i kisim taim nogut long han bilong ol kompetisen lida Brian Bell Bulldogs bai traim mekim ol samting long bekim dispela dinau.

Na olsem kosa Joe Katsir i bai gat bikpela plen long lukim olsem ol i win long dispela taim.

Long go pas long ol em bai kepten Tony Dai, Brown Willy, Lucas Daniel, John Milba na nupela man long pek em Junior Roipa bilong Goroka. Long beklain em bai Defence senta Jnr Russ Kaupa, husat bai



Monier Broncos senta Lerory Muriki i laik ronawe long senta na kepten bilong Chemica Cowboys Robert Beni long pilai bilong ol long las Lloyd Robson pilai graun las Sande. Cowoys win 27-6. Poto: ANDREW MOLEN

bungim strong wantaim Ralph Kaupa. Ol narapela em em Lae Reds Thomas Kala, bipo Goroka ragbi union pilai Kevin Vitolo. Long senta em Joshua Nablu na Luke Ainui.

Long lukluk long dispela pilai Dean Sinclair i tok ol Cowboy i redi tasol long mekim samting stret.

"Mi ting kosa Joe katsir i luksave long hevi bilong mipela na kamap wantaim rait beklain na olsem em i gat bilip long dispela beklain we bai helpim tim long dispela pilai," Sinclair i tok.

"Hevi bilong mipela em long mipela i no lukautim gut bal. Mipela i mekim planti asua long holim na lukautim bal na olsem ol manki bai i no inap moa long givim sans long ol penolti long dispela ol asua," em i tok.

Em i tok difens bilong ol Cowboys long dispela taim bai strong na olsem ol bai lukluk long pinisim dispela ful set we ol i no wok long bihainim tumas. Ol i laik stap lida tu.

Olgeta tim bai pait hat long win long dispela wiken long kisim ples.

Senta em Emmanuel Palme na Samuel Nap. Long fowet em strongpela lain olsem Joseph Ormai na Joe Sipa bai go pas.

Ol boi Rabaul tu i gat ol gutpela spit long beklain na tu ol i save yusim gut ol hap bek bilong ol long kamapim ol spes long go na skoa.

Resa man bilong ol long dispela posisen em Jessie Alunga. Em bai "katim ples" long soim rot. Long helpim em na brukim ol difens em kepten na lok Michael Marum.

Dispela ol boi bilong Is Nu Britan i save gut tru long pilai open-futbol na i save yusim spit bilong ol long beklain long kamapim spes long go putim ol trai.

Ol i bin yusim gut tru dispela stail bilong pilai las wiken na bagarapim sindaun bilong ol Lahanis long asples bilong ol long Goroka.

Dispela gem namel long Chemica Mt Hagen Cowboys long Lae bai paia lait stret bikos ol lain Kange las wiken i winim gen na bai lukluk go het yet long win bilong ol.

Kosa bilong ol Cowboys na bipo Kumul fowet Bobby Ako bai yusim ol bikpela fowet bilong ol olsem Rodney Pora na lain olsem Komp Timbi na hap bek Isaac Wak long brukim ol gem plen na soim ol rot bilong ron. Na helpim ol tu em bipo na nau yet Kumul pilaia Reuben Ruing. Dispela lain bai mekim ol strong tru long givim ol Kange long skoa.

Long Goroka ol manmeri bai lukim narapela strongpela pilai namel long ol Mioks na Lahanis. Long fes raun bilong kompetisen Mioks i bin winim Lahanis long wanpela poin tasol.

Dispela wiken tupela tim wantaim bai paia lait long pilai long lukim husat tru em strong insait long dispela resis.


Kosa bilong Lahanis bai yusim ol gutpela fowet bilong em olsem kepten Nigel Hukula, tupela brata Wayne na Timothy Warigiso, Kasawa Kauga na lok yet Adam Billy long banisim ol atek bilong ol Mioks. Kosa bilong Mioks Toksy Nema i no nupela long Sir Danny Leahy oval na olsem em bai yusim ol pilaia bilong em long banisim gut na daunim strong bilong ol Lahanis.

Em i save olsem Lahanis bai laik bekim dinau tu na olsem em bai putim gutpela was.

SP Kap eksen poto namel long Cowboys na Broncos



• Wanpela haptela pilai... Pot Mosbi Monier Broncos seken rowa Luke Kolalio i kisim takol long ol pilaia bilong Mt Hagen Chemica Cowboys pilai bilong ol long Lloyd Robson graun. Cowoys win 27-6



• Yu bai kisim taim... Broncos pilaia i tingting taim em i hapim Chemica Cowboys senta na kepten Robert Beni. Turangu em i traim tasol strong i sot. Ol poto: ANDREW MOLEN


PNG i mekim gut



Andrew Molen i raitim

samting PNG i ken amamas long en bilong wanem em i kamap gut tru," Spitainic i tok.

PNG i winim tupela gold long Jack Willie (48kg, na Chavis Kora (60kg) na foapela silva i kam long Francis Oake (48kg), Paul Lare (51kg), Jack Gabriel (54kg) na Jeffrey Karedong (60kg). Sevenpela brons medol bilong ol i kam long Eugene Keto (51kg), frank Kanau (54kg), Theo Torot (57kg), Rickson Yamo (64kg), Billy Mamu-Kian (69kg), John Korake (75kg) na Victa Lani (81kg). Kosa bilong PNG tim, Steven Tsivele i tok amamas bilong em tu long ol samting i kamap. Em i tok tu olsem dispela i bin namba wan taim bilong sikspela PNG boksa i go insait long failol we long tupela divison i lukim ol PNG yet i mekim save long failol. Nuau i tok dispela em i wanpela samting we tok tok bilong em bai i no i nap long makim amamas bilong em tasol bikipela tenkyu i go long bikipela sponsa bilong ol, Lamana Hotel na tu PNG gavman. Em i tok sapos OABA i laik holim tonamen ken long PNG ol bai amamas



• PNG Boksa Billy Manukia long 69 kilo grem i kisim brons medol bilong em. Tupela Niu Silan man i kisim gol na silva medol long dispela divison. Foto: ANDREW MOLEN

tasol long en. Oganaisesen i bin kamap wantaim sapot bilong Nenesol Minisat bilong Diwai Hon. Patrick Pruaitch olsem tonamen petron na Sir George Constatino olsem petron bilong PNGBU.

LONG pions ol i kam namba tu long Australia na long namba bilong ol medol ol i winim, ol i kam namba tri bihain long Australia na New Zealand.

Dispela i mekim presiden bilong Papua Niugini Amata Boksing Yunion, Lohial Nuau i amamas tru long dispela namba 31 Osenia Boksing Sempionsip we i kamap long Pot Mosbi las wik.

"Dispela tonamen i kamap gut tru, nogat wanpela samting i go krangki we mipela i no harim wanpela toktok wari i kam long ol tim i kam long pilai," Nuau i tok.

Narapela samting olsem em i fes taim bilong dispela kain sempionsip i kamap long PNG na i kamap gut tru we i winim tu amamas bilong Presiden bilong Osenia Amata Boksing Asosiesen, Sol Spitainic.

"Dispela tonamen em i wanpela

Pot Mosbi rot rana kamap long bikipela salens

OL rot rana insait long Pot Mosbi i gat bikipela salens dispela wik taim ol i ronim Ela Bis-Baruni hap marathon resis dispela Sande.

Dispela bai i stat long Ela Bis, i go long Taun na Hanuabada, Baruni na i go olgeta long Atlas Steel we ol bai tanim na i kam bek gen long Ela Bis.

Resis bai stat long 5:30 long moning we ples i tudak na i kol na ol rana i mas lukaut long ol hol long rot nogut ol i bagarapim lek na tu ol dok long Hanuabada we inap long kaikaim ol.

Rot long nambis na POMRR i tok lukaut long ol rana long ol i mas isi isi.

Dispela hap marathon bai i

stap insait long Must run Challenge tu. Ron bilong ol Pot Mosbi rot rana long las wik i stat na i go olsem long Korobosea.

Resis i bin stat long Korobosea praimeru skul i go olsem long Korobosea draiv, Queenscliffe rot na i go kamap long ol stua long Taurama.

Bihain long ol i kamaut long ol stua long Taurama, ol i ron bihainim rot i go aburumim haus sik na go kamap ken long Pipigari strit.

Dispela rot i bin hat long ron bilong wanem i gat planti manmeri na ol ka tu i go i kam i ken bagarapim ol rana.

Long sotpela resis olsem 2.2 km i lukim Daniel Junia i winim long taim 7.36 na bihain long

em na klostu true m Kesa Nathan na Francis Xavier wantaim taim bilong 7.45 na 7.50.

Tupela i wok hat long painim Daniel tasol ol i no bin i nap long aburumim em.

Insait long dispeal taim i lukim Rison Bane, Pete Barbara, Noko Negosa na Junia Waki i kam insait aninit long eit minit tasol bilong wanem ol i spit tru klostu long pinis lain bilong wanem ol i laik pinis pas long ol lain i go pas.

Long 5km resis, Pete Nula i mekim gutpela spit tru long ron bilong em we i lukim em i winim resis wantaim taim 18.24 na Simon Pinampio i kamap namba tu wantaim 19.00.

Roger Holis i pinis namba tri

wantaim 20.32 na namba foa ples i go long Gumsie Taulobi (20.41).

Gumsie i bin i ron wantaim ol POMRR dispela yia na dispela i bin fes resis bilong em.

Ol strongpela man stret bilong ron i kukim long 10km resis we i lukim Milton lakosi i winim resis wantaim 36.57 taim bilong em. Simon Pinampio i kamap namba tu wantiam 37.11 na James Gurumi painim gutpela spit long kamap wantaim taim olsem 38. 16 we i mekim em i stap nambawan yet long "Must Run Challenge".

Tasol i luk olsem em bai i hat tru long narapela rana long aburumim Pinampio long dispela salens.

Finshafen distrik gat gutpela skul spot progrem

Paulus Tali i raitim

PLANT skuls nau go het long progrem bilong pikinini spots.

Long Finshafen Distrik long Morobe provins dispela i wankain bihain long ol pikinini i go insait long kamapim ol skul kompetisen olsem soka, basketbol na volibol.

Na Finschafen Distrik spot kodineta Oscar Kosong i amamas tru long dispela kain ol progrem na i tok tenkyu long ol wan wan lain bilong dispela ol spot long kamapim na lukim dispela ol progrem i kamap tru tru.

Em i tok Morobe i gat nem long kamapim ol gutpela spot manmeri bilong kantri na i gutpela long lukim olsem spot i strong yet long provins.

Kosong i tok, progrem i bin stap long taim pinis tasol hevi em ol i nogat gutpela menesmen bilong ronim ol progreme bilong ol long karim aut wok bilong spots long distrik.

Bipo ol skuls i save go tasol long pilai long skul kompetisen long ol skuls long distriks tasol nau i senis.

Tupela skul we nau go het long pikinini spots em Kambali na Gagidu Praimeri Skul Kosong i tok.

Em i singaut nau i go long ol skul we i stap klostu long Gagidu long ol i mas putim nem na kamap long dispela ol skul progrem.

Na tu husat ol pikinini i stap long stesen o seteleman ol i laik kamap em i nogat rong long dispela.

Tasol sapos yu tingyu inap pilai long divison bilong yu stret olsem anda 13 na anda 17 orait toksave long kodineta bilong pikinini o go na lukim Kosong distrik spot opis.

Kosong i askim ol bisnismanmeri long Finshafen na tu long Lae sapos ol i ken helpim long mani o long sampela samting bilong pilai long kamapim dispela ol skul spot progrem long distrik. I gutpela ol i givim sapot.

Westen Hailans gavman bai stretim Minz pilai graun

MEMBA bilong Anglimp-Saut Waghi, Jamie Maxtone-Graham i tokaut long moa long 5000 manmeri long Minj gavman stesin long las wik Sarere olsem Westen Hailans provinsoal gavman bai givim moni long baset bilong en long stretim gen ragbi lig pilai graun na ples bilong pilai golf long Minj. Graham i tokaut long displea long las wik Sarere taim ol nesenol lida olsem Minista bilong Agrikalsa, Mathew Siune, ol Gavana bilong Westen Hailans na Simbu Palas Wingti na Peter Launa na Embeseda bilong Taiwan, Jenerol Michael Cheng.

Ol i bin bung long Minj gavman stesin long lukim lonsing bilong rais sid multiplikesen na distribyusen senta long Minj.

Graham i tokim ol pipel

olsem ol i mas amamas long provinsoal gavman long wanem aninit long Gavana Paias Wingti ol i lukluk long ol hap bilong developmen insait long provins we planti manmeri i ken kisim helpim long en.

Em i tokaut long ol manmeri olsem provinsoal gavman, insait long baset bilong en long dispea yia i putim K25,000 long katim gras na stretim Minj ragbi lig graun na putim tu narapela K15,000 long wok bilong stretim gen Minj golf kos.

Dispela tupela ples bilong pilai i bin bagarap taim tupela lain birua i bin pait na stopim ol gems long kamap long Minj sampela yia i go pinis.

Em i tokim ol pipel olsem dispela disisen bilong provinsoal eksekutiv kaunsel i kamap bihain long gutpela wok bung namel long em yet na Minj

Distrik Lokel Levot Gavman presiden. Ol i laik bai ol manmeri i amamas long pilai spots na stap amamas wantaim.

Minj long bipo i gat gutpela golf na ragbi lig pilai graun tasol hevi bilong bikipela pait namel long tupela wan pisin klostu long Minj stesin i bagarapim spots long i go het.

Minj wantaim Banz bipo i save i gat ol pilaia husait i save pilaia bipo long Waghi tumbe, wanpela tim insait long SP inta-siti kap salens long 1990's. Minj i gat nem tu long kamapim planti gutpela golf pilaia bilong western hailans.

Dispela gutpela ples Minj i nais tru.

Long bipo em i wanpela stesin we planti waitman i save amamas long go raun long hap, pilai spots na lukim ples. Tasol taim i senis nau we i lukim ol i no go moa.

Trukai Industri givim K300,000 long PNGSF

Andrew Molen i raitim

TRUKAI Industris long dispela wik i givim wanpela sek moni bilong K314, 900 ol i kisim long "Trukai fun Run" dispela yia i go long PNG spots federesen we i brukim rekot bilong ol moni ol i wokim long dispela pilai bipo.

Sekreteri-jenerol bilong PNGSF Sir John Dawanincura i tok amamas long dispela na i tok dispela moni bai i helpim ol etlit bilong PNG husat ol bai i go long Mini Saut Pasifik Gems long Palau.

"Mi laik tok tenkyu long Trukai na tu long ol pipol hia long Pot Mosbi na ol narapela senta husat i ron insait long dispela 'Trukai Fun Run'.

"Ol i helpim mipela gut tru," Sir John i tok.

Em i tok narapela taim we Fan Ran i kisim bikipela moni tru em long 1991 taim Saut Pasifik Gems i kamap long Pot Mosbi.

"Tasol long olgeta Fan Ran long 1983 i kam inap long nau, dispela em i mekim rekot bilong wanem em i bikipela long olgeta," Sir John i tok.

"Dispela i aburumim mak bilong K250, 000 mipela i mekim bipo."

Em i tok tenkyu na amamas tu i go long Trukai Industris long helpim bilong ol we i helpim na sapotim PNGSF na ol spotsmanmeri wantaim.

Menesing dairekta bilong Trukai industris Phil Franklyn i tok amamas i go tu long ol lain i wok wantaim em na ol pipol long kamapim dispela moni na tu long PNGSF na em i tok amamas na tok olsem dispela moni i brukim rekot.

Long makim maus bilong ol etlits, tim menesa spot ripota bilong Post-Courier Numa Alu husat bai go long ol pilai olsem wanpela opisel i amamas na tok tenkyu i go long PNGSF na Trukai.

"Mipela save olsem long dispela taim em i hat long go long wanpela hap o mekim wanpela bikipela samting sapos yu i nogat sponsa na mipela i laik tok tenkyu na amamas i go long Trukai," em i tok.

PNG bai pilai long 7-pela bitong ol 12-pela spot we bai kamap long dispela Mini Saut Pasik Gems long Palau.

Spitmeri Koime brukim rekod gen

PNG spitmeri Mae Koime i brukim gen taim em i kamap long 7.65 seken long 60 mita long Brisbane long Yunivesiti bilong Kwinsten long Australia long wiken.

Koime stat long dispela yia i wok long stap long Australia long mekim ol trening bilong em.

Long wankain taim Toea Wisil tu i wok long kamapim ol gutpela mak long ol ron bilong em. Toea bai kamap long Wol Yut Sempionsip long Morocco long 400m iven.

Na long taim dispela taim PNGAU i makim 23-memba tim (13 na 10 meri) long kamap long dispela mini Saut Pasifik Gems we bai kamap long Palau long Julai. PNGAU seketeri Philip Rehder i tok i no tok klia husat bai mekim 4 X 100m meri tim long wanem ol mak i miks nabaut. Ol mak i stap klostu klostu na hat tumas long makim rait tim. Long salim tim PNGAU baim K2000 levi fi tasol i askim wanwan ol pilai long baim K500.



WANTOK SPOTS



¥ Pes 25
Lukim Stet ov Orjin/NRL
stori insait



¥ Pes 30
Lukim moa SP
Kap priviu na
riviu stori

¥ Pes 31- WHP
gavman stretim
Minj pilai graun

Husat i lida?

... SP Kap kamap hot, top tim pait long ples

James Kila i raitim

OLGETA pilai insait long SP Kap resis i wok long go strong tru nau wantaim ol gutpela salens tru i kamap namel long ol tim insait long kompetisen.

Planti ol ragbi lig sapota insait long kantri i guia tru long wanem ol dispela tim we planti i ting i no inap long winim ol pilai bilong ol i soim stret olsem ol i gat strong yet na i daunim ol tim i go pas long resis.

Dispela i soim olsem yumi i no save nau husat tru bai go long fainol insait long dispela bikpela ragbi lig kompetisen long kantri na winim pilai bilong ol.

Wankain olsem long las wiken we Mabey & Johnson Mendi Muruks i soim stret pawa bilong ol long winim Toyota Mioks. Na Chemica Mt Hagen Cowboys i bagarapim tru sindaun bilong Monier Broncos long Mosbi long win 27-6.

Dispela gutpela salens insait long kompetisen i soim olsem taim fainol taim i kam klostu i luk olsem planti lain bai i no inap save husat tru bai go insait long wanem olgeta dispela tim long kompetisen i gat kampela kain marila bilong ol yet long gem plen long difens na atek long winim gem.

Dispela wiken bai lukim narapela gutpela ol raun bilong gems i kamap gen insait long raun 8 bilong kompetisen.

Gutpela pilai bai kamap namel long Mosbi we bai lukim ol kompetisen lida Brian Bell Bulldogs bai traim long stap antap yet taim ol i bungim Agmark Rabaul Guria long PRL.

Na long Sir Danny Leahy oval long Goroka bai yumi lukim as ples Coca-Cola Lahanis bai slekim bun wantaim Toyota Mioks.

Long Lae tupela pilai bai kamap- em long Chemica Cowboys bai bung wantaim as ples LBC Bombers na narapela pilai em long Mabey & Johnson Muruks wantaim Monier Broncos.

Las wiken ol lain tobaras bilong Rabaul Guria i bin soim gutpela gem tru long Goroka taim ol i winim ol boi bilong Lahanis 30-25.

Dispela gem long Mosbi bai i gutpela tru bikos ol Bulldogs bai lik stap antap yet long lata insait long kompetisen na bai putim olgeta strong bilong ol long daunim paia bilong ol Guria. Ol lain pawa haus bilong Bullogs husat i pilai strong long winim gem em kepten Stanley Hondia, faiv eit Charlie Wabo, huka Andrew Andiki.

... i go moa long pes 30



Go wantaim win! ...sapot na tingting stap wantaim yupela

Sampela pilaia bilong PNG SP Kriket tim husat bai go long Ireland ICC Tropi sempionsip we bai stat long narapela mun.

Dispela em i namba wan tim long PNG Kriket histori long go insait long bikpela pilai olsem. Ol strongpela tim tasol i save go olsem na sapos ol i win ol bai joinim 12-pela Kriket Tes pilai kantri olsem Australia, Inglan, Niu Silan, Pakistan, India, Bangladesh, Sri Lanka, West Indies, Zimbabwe, Kenya na Saut Afrika long kamap long Wol Kap pilai long West Indies long 2008.

PNG tim i bin mekim gut long Is Esia-Pasifik kwali-faing tonamen we i bin kamap long Malaysia long Februari dispela yia we ol i mekim gut na kamap namba wan.

Dispela i helpim ol long go insait long ICC Tropi Kap wantaim narapea 12-pela kantri wankain olsem PNG husat i painim ples long stap long Wol Kap pilai. Sapos PNG i mekim long fes 5-pela ples PNG bai kamapim nupela rekot na go insait long Wol Kap pilai. Long dispela sapot na tingting bilong mipela i stap wantaim tim taim ol i lusim sua long dispela Sande na kamap long ol pilai long Ireland.

Long lukim kain sapot olsem SP Brewery i givim K150,000 long tim long kamap long ol pilai. Na long dispela wik yet Inta-Gavman Rilesen Minista Sir Peter Barter i makim gavman na givim K10,000 long wok-about bilong tim.

Long makim tim long ol pilai top betman Jamie Brazier i tok: Mipela bai mekim olgeta samting long makim kantri. Mi askim ol pilaia long pilai strong, long bet gut na holim gut bal. Tingting bilong pilai i mas stap stret, em i tok. Foto: NICKY BERNARD